

ЎЗИҶОҲИРИЯ УЗБЕКСИ

**ДОКТОР  
МОРО  
ОРОЛИ**



# ГЕРБЕРТ УЭЛЛС

## ДОКТОР МОРО ОРОЛИ

*Инглиз тилидан Тилаволди ЖҮРАЕВ ҳамда  
Маҳбуба МАМАЖНОНОВА таржимаси.*

*Тошкент*

*"НАВРҮЗ" нашиёти*

*1993*

**Герберт Уэлс. Доктор Моро ороли. Фантастик қисса. "Наврӯз" нашриёти — 1993 йил, 128 бет.**

Машҳур инглиз фантаст ёзувчиси Герберт Уэлс номи китобхонларга яхши таниш. Унинг "Вақт машинаси", "Кўринмас юдам" номли қиссалари жаҳон адабиёти дурданалари қаторида туради. "Доктор Моро ороли" асари әдибнинг учинчи машҳур қисссаси. Мазкур асарда табиат қонууларига қарши бориб, инсонни ҳайвон билан қўшиш ва шу асно янги бир махлук яратишга аҳд этган ёвуз олимнинг фожиаси бутун даҳшати билан ўз ифодасини топган.



Герберт Уэллс

# М У Н Д А Р И Ж А

I Б О Б

**7 "ЛЕДИ ВЕЙН" КЕМАСИННИГ ҚАЙИФИДА**

II Б О Б

**9 БОРАР ЖОЙИ НОТАЙИН ОДАМ**

III Б О Б

**12 АНТИҚА ҚИЁФА**

IV Б О Б

**16 БОРТ ОЛДИДА**

V Б О Б

**19 ОРОЛГА ТУШИШ**

VI Б О Б

**22 БАРКАСДАГИ БЕДАВОЛАР**

VII Б О Б

**26 ҚУЛФ ЭШИК**

VIII Б О Б

**30 ПУМАНИНГ ҚИЧҚИРИГИ**

IX Б О Б

**32 ЎРМОНДАГИ ТҮҚНАШУВ**

X Б О Б

**40 ОДАМЗОД ФАРЁДИ**

XI Б О Б

**43 ОДАМ ИЗИДАН ОВ**

XII Б О Б

**47 ҚОНУН ЖАРЧИЛАРИ**

XIII Б О Б

**54 М У З О К А Р А**

XIV Б О Б

**58 ДОКТОР МОРОНИНГ ТУШУНТИРГАНИ**

XV Б О Б

**68 ҲАЙВОНСИФАТ ОДАМЛАР ТАЪРИФИДА**

XVI БОБ

**72 ҲАЙВОНСИФАТ ОДАМЛАР**

**ҚОН ТАЪМИНИ ТУЙДИЛАР**

XVII Б О Б

**83 Ф А Л О К А Т**

XVIII Б О Б

**87 МОРО ТОПИЛДИ**

XIX Б О Б

**90 МОНТГОМЕРИНИНГ "БАЙРАМИ"**

XX Б О Б

**96 МАХЛУҚЛАР ОРАСИДА ЁЛҒИЗ**

XXI Б О Б

**101 ҲАЙВОНСИФАТ ОДАМЛАР**

**АСЛ ҲОЛИГА ҚАЙТДИЛАР**

XXII Б О Б

**111 ТАНҲОЛИККА МУБТАЛО**

**114 Тилаволди Жўраев ФАНТАСТИКА ҚИРОЛИ**

## I БОБ

### "ЛЕДИ ВЕЙН" КЕМАСИННИГ ҚАЙИФИДА

Мен "Леди Вейн" кемасининг ҳалокати тўғрисида матбуотда айтилган гапларга ҳеч қандай қўшимча киритмоқчи эмасман. Маълумки, у Каляодан йўлга чиққанининг ўнинчи кунида бир кема қолдигига урилиб, чўкиб кетган. Кеманинг етти нафар дengизчиси жон сақлаган баркасни ўн саккиз кун деганда "Х.М.Мертл" ҳарбий кемаси қутқарган. Уларнинг қай тахлит омон қолганликлари ҳақидаги тафсилотлар теграсида шунақсанти шов-шув кўтарилиди, даҳшат бобида у "Медуза" воқеасидан сира қолишмасди. Бироқ мен "Леди Вейн" тафсилотига бошқа, янада даҳшатлироқ, ақлни шоширувчи бир воқеани қўшимча қўймоқчиман. Ҳали—ҳануз одамлар ўртасида ўшанда яна бир қайиқда тўрт киши қутулиб қолган эди, улар ҳалок бўлишган, деган гап-сўзлар юради. Лекин бу нотўғри. Бунинг исботи учун етарли далилларим бор, зеро, ўша тўрт кишининг бири — ўзим.

Аввало, шуни таъкидламоқ жоизки, қайиқда тўрт эмас, уч киши бўлган — "капитан кемадан сакраганини кўрган" ("Дейли Нюс", 17 март 1887 йил) Констанс баҳтга қаршими ё баҳтимизгами, қайиққача етиб келмади. Синиқ бушприт остида қалашиб ётган чигал арқонлар орасидан чиқиб, сувга калла ташлаган пайт оёғи чилвирга ўралиб, бир зум ҳавода муаллақ осилиб турди-да, сўнг сув юзасида қалқиб юрган гўллага боши билан гурсиллаб урилди. Биз у томон ошиқдик, бироқ қайтиб у сув юзасида кўринмади.

Унинг қайиққача етиб келолмагани нафақат бизнинг, балки ўзининг ҳам баҳти экан. Ичгани сувимиз оз, егани эса сувга бўккан камгина қотган нондан бошқа ҳеч вақо йўқ — фалокат ҳеч кутилмагандан рўй берган, кема бунга сира тайёр эмас эди. Биз баркасадаги шерикларимизда озиқ-овқат мўл деб хаёл қилиб (аслида уларда ҳам танқис бўлган-ов), орқаларидан роса ҳайҳайлайдик, аммо овозимизни ҳеч зоф эшифтмади, эрталабга бориб эса улардан умуман ном-нишон кўрмадик. Қайиқ бетўхтов чайқалиб турганидан туриб, у ёқ-бу ёққа қараш имкони ҳам йўқ эди. Пўртана тинимсиз қайиқни ўз комига тортар, биз зўр бериб унга чап беришга тиришардик. Мен билан қутулиб қолганлардан бирининг исми Хелмар бўлиб, у ҳам худди камина қатори йўловчи, иккинчи ҳамроҳим эса (исмини билмайман) хиёл дудукланиб гапирадиган паст бўйли, бақувват дengизчи эди.

Саккиз кун дengизда оч-наҳор тентирадик, ичимлик сув тугади, ташналиқ азоби ҳеч чидағ бўлмас даражага етди. Фалокат

юз берганидан икки кун кейин дengиз секин-аста тинчланди, сув юзи ойнадай тиниқ бўлиб қолди. Бу саккиз кун даҳшатини фақат бошидан кечирган кишигина англашга қодир! Бошдан кечирмаган бўлса, ундан баҳтироқ одам йўқ. Иккинчи кундан эътиборан биз деярли гаплашганимиз йўқ, барчамиз қимир этмай, олисга термулиб ёки олазарак кўзларимиз билан даҳшат ва заифлик бир-биримизни қай тахлит енгиб бораёттанини кузатганча ётардик. Қуёш аёвсиз қиздиради. Тўртинчи кунга келиб сув тугади, мияни даҳшатли фикрлар чулғай бошлади, бу кўзларимиздан аён эди; адашмасам, олтинчи куни Хелмар барчанинг дилидаги гапни айтди. Эсимда, биз шу қадар беҳол, овозларимиз заиф эдикки, бир-биримизга энгашиб, базур пичирлашдик. Мен Хелмарнинг таклифига бутун вужудим билан қарши турдим, зеро, бундай қилгандан кўра қайиқ тубини тешиб, барчамиз акулаларга ем бўлганимиз аълороқ эди, бироқ Хелмар шундай қилсан, чанқоқ азобидан қутуламиз, деб айтдики, бу гап дengизчига ҳам маъқул бўлди.

Ула қолсам ҳам қуръа ташлашга кўнмас эдим, бироқ тунда Хелмар дengизчи билан нималарнидир пичирлаша бошлади, мен эсам, барибир улар билан олишишга ҳолим етмаслигини билсам-да, қўлимда личнони маҳкам ушлаганча қайиқ тумшуғида ўтирадим. Эрталабга яқин Хелмарнинг таклифига кўнишга мажбур бўлдим ва биз қисматимизни аниқлашни ярим пенсли тангага ҳавола этдик.

Қуръа дengизчига тушди, бироқ у ичимида энг бақуввати бўлгани боис норозиланиб, Хелмарга ташланди. Улар ёқа бўғишиб, ўринларидан туриб кетдилар. Мен ётган кўйим Хелмарга ёрдам бериш мақсадида улар томон эмакладим, энди дengизчининг оёғидан тутмоқчи эдим, қайиқ илкис чайқалдию дengизчи қоқиниб, иккиси ҳам сувга ағанади. Улар баайни тош чўккандек дengиз қаърига сингиб кетдилар. Ҳатто буни кўриб кулиб юборганим ҳам ёдимда, билмадим, қаердан босиб келди экан кулги ўша пайт.

Қайиқнинг қайси ўринидигида қанча вақт ғужанак тушиб ётганимни билмайман, хаёлимда: "Агар туролсам, тезроқ ақлдан озиб ўлиш учун дengизнинг шўр сувидан тўйиб-тўйиб симирадим", деган фикр чарх уради фақат. Бир пайт олис-олисда, уфқ этагида кема кўринди, бироқ мен худди оддий суратни кўраётгандек бефарқ ётавердим. Рост, ўша пайт хаёлим ўзимда эмасди, бироқ ҳозир ҳаммасини аниқ эслайман. Бошимнинг тўлқинга мос маромда чайқалиши, уфқ этагида кўринган кеманинг дам кўтарилиб, дам тушиб ўйноқлаши ҳамон ёдимда. Сира эсимдан чиқмайди, гўё жоним узилиб боряптию надомат билан ўйлаяпман: "Бунча имилламаса бу кема, кечикиб, фақат жасадим устидан чиқишича-я... тақдирнинг бундан аччиқроқ ҳазили бўлармикан?..."

Қайиқ ўринидигига бош қўйиб, қаршимда ўйноқлаётган кемага

кўз тикканча жуда узоқ ётдим. У мўъжазгина елканли кема бўлиб, шамолга қарши сузайтгани боис тинимсиз биланглар, тўлқиндан тўлқинга урилар эди. Қарангки, бирор йўл билан кемадагилар эътиборини ўзимга жалб этиш ўша пайт хаёлимга ҳам келмабди, фақат унинг яқинлашиб қолган тумшугини илғаганим эсимда, сўнг ўзимни чогроқчина бўлмада кўрдим, бўлак ҳеч нарсани эслайлмайман. Фақат мени зинадан кемага кўтариб олиб чиқишаётган пайт сепкилюз, қизғиш соchlари ўсиқ баҳайбат бир кимсанинг энгашиб, менга қараб тургани элас-элас ёдимда. Шундан сўнг хаёлимни аллақандай қорамтири чехраю яқиндан тикилиб турган галати кўзлар узуқ-юлуқ банд этдики, уларга қайта рўпара келмасам, босинқи туш деб гумон қилган бўлардим. Охири тишлиларим орасидан аллақандай суюқлик қуийшганини биламан. Бори — шу, бошқа ҳеч нарса эсимда йўқ.

## И Б О Б

### БОРАР ЖОЙИ НОТАЙИН ОДАМ

Мен ётган каюта тор ва ниҳоятда ифлос эди. Тепамда ўрта ёшлардагиmallasoch, оч сарғиш мўйлови дағал, пастки лаби осилиб тушган киши қўлимдан ушлаб ўтиради. Биз бир зум бир-биримизга жимгина тикилиб турдик. Унинг оч кўкимтири кўзлари совуқ, маъносиз эди.

Пича ўтгач, юқоридан аввал баайни оғир темир каравотнинг сурилишига, сўнг эса қандайдир йирик ҳайвоннинг бўғиқ ўкиригига монанд овозлар келди. Шу баробар ёнимда ўтирган киши ҳам тилга кирди.

Чамаси, у саволини такрорлади:

— Хўш, тузукмисиз энди?

Агадашмасам, тузукман, деб айтдим-ов. Сўнг бу ерга қандай тушшиб қолганимни сўрадим. Чамаси, у бу саволни юзимдан пайқади, чунки овозим ўзимга ҳам эшитилмаётган эди.

— Сизни ўлар ҳолатда қайиқдан топдик, — деди у. — Қайиққа "Леди Вейн" деб ёзилган экан. Ҳаммаёғи қон...

Шу пайт бирдан кўзим қўлимга тушди, у шу қадар озгин, ингичка эдики, худди суяқ тўлдирилган ичакни эслатарди. Шуни кўрдиму қайиқда юз берган барча воқеалар кўз ўнгимда қайта жонланди.

— Мана бундан ичинг, — дея киши менга қандайдир қизил, муздек ичимлик тутди.

Ундан қон таъми келарди. Ичиб, пича ўзимга келган бўлдим.

— Пешонангиз ёрлақаган экан, — деди у, — доктори бор кемага учраганингизни қаранг.

Унинг тили бироз чучук, гапларини уқиши қийин эди.

— Бу қанақа кема? — деб сўрадим мен оҳиста, узоқ гапирмаганимдан овозим хириллаб чиқди.

— Кичкинагина савдо кемаси, Арикадан Каляога кетяпти. Асли қаердан — билмайман. Анави тұғма тентаклар ютидан бўлса, ажаб эмас. Мен ҳам бир йўловчиман, Арикадан келяпман. Кема соҳибини фирт эшак дейсиз, исми Девис, капитан ҳам ўзи, ҳужжатимни йўқотганман дейдими-ей, тушуниб бўлмайди. Тентак бўлмаса, кемани ном қуригандек "Ипекакуана" деб номлармиди. Бироқ денгиз сокин пайти сузиши ёмон эмас.

Юқоридан яна ҳайвон ўқириги ва одам товуши эшитилди.

— Жин ургур! — деда сўқинди бошқа бирор ва яна сукунат чўқди.

— Нариги дунёга жўнашингизга бир баҳя қолган экан, — деди ҳамсуҳбатим. — Ҳа, шундай. Сал олдинроқ укол қилдим. Қўлингизда оғриқ сезаётгандирсиз? Ўшандан. Салкам ўттиз соат беҳуш ётдингиз.

Фикрлашим ниҳоятда суст эди. Юқорида итларнинг ҳуриши хаёлимни бузди.

— Бирор нарса есам дегандим, кўнглим озгандек бўляпти, — дедим мен.

— Менга раҳмат дeng, — деди киши. — Худди билгандек сизга қўй гўштидан шўрва буюриб қўйибман, ҳозир пишади.

— Раҳмат, — дедим мен руҳланиб. — Бажонидил бир қошиқ ичаман.

— Ҳа, дарвоқе, — деди у бир дақиқалик иккиланишдан сўнг, — синчковлигимни маъзур тутасиз, айтинг-чи, қандай қилиб қайиқда якка қолдингиз, жуда қизиқ-ку.

Унинг кўзларида шубҳа учқуни йилтирагандек бўлди.

— Ҳу, овозинг ўчгар! — У туйқус шартта ўрнидан туриб, бўлмадан отилиб чиқиб кетди, зум ўтмай кимгадир жаҳл билан ўшқиргани эшитилди, унга жавоб қилган одамнинг тили менга тушунарсиз эди. Сўнг нимадир гупиллади, ҳатто ёқалашгандек ҳам бўлишдими-ей, билмадим — қулоқларимга ишонадиган аҳволда эмас эдим ҳали. Киши тинимсиз ҳураётган итларга пўписса қилиб, бўлмага қайтди.

— Дарвоқе, — деди у остона ҳатларкан, — бошингиздан кечирган воқеаларни гапириб бермоқчи эдингиз.

Мен Эдуард Прендиқ деб ўзимни таништирдим, сўнг моддий жиҳатдан ўзимга тўқ одам эканим, табииёт илмига қизиқишим ҳақида гапирдим. Афтидан, гапларим уни қизиқтириб қўйди.

— Бир пайтлар камина ҳам дорилғунунда биологияни ўтганганман, чувалчанглар ирсияти, шиллиққуртлар умуртқаси, хуллас, шу сингари бало-баттарларни тадқиқ қилганман; мана, шунга ҳам бирпасда ўн йил бўпти! Хўш, сиз гапиринг, гапираверинг, қайиқда нима воқеа юз берди?

Лўндағина қилиб бўлган гапни айтиб бердим, хийла заифлигим боис чўзиб ўтирмадим, бор гапни қисқача тушунтиридим. Ҳикоям

самимияти билан уни мафтун этди, гапимни тугатгач, у яна табииёт илмига, ўзининг биология соҳасидаги тадқиқотларига қайтди, Тоттенхем Кортроуд ва Гауэрстритга тааллуқли гапларни бир бошдан суришири кетди.

— Каплатзининг ҳануз обўси жойидадир? — деди у. — Қандай ажойиб дорилфунун эди-я!

У жуда учар талаба бўлган кўринар, гапининг мавзуси энди томошоналарга келиб тақалмоқда эди. Ўша пайт бошидан кечирган қизиқ-қизиқ воқеалардан ҳам ҳикоя қилди:

— Қаранг-а, шунга ҳам ўн йил бўпти. Қандай ажойиб давр эди-я! Ёш, навқирон, лекин ниҳоятда гўл эканман, ўйнаб-кулишга-ку роса ўйнаб-кулдим, армоним йўқ, бироқ йигирма бирга кирмасдан инқилаб қолдим. Мана, энди ҳаммаси бошқача. Майли, роса гаплашдик, мен энди бориб ошпаздан хабар олай, у эшак шўрвани нима қилди экан.

Туйқус юқоридан шунақанги даҳшатли ўкирик эшитилдики, мен қўрққанимдан жойимда бир сақраб тушдим.

— Нима бало бу? — дедим сухбатдошим ортидан, бироқ эшик ёпилиб бўлган эди.

Бир оздан сўнг у шўрва кўтариб қайтиб келди, гўшт ҳиди шу қадар иштаҳали эдики, даҳшатли ўкирик ҳам ёдимдан чиқибди.

Ичимга овқат тушиб, уйқуга тўйганимга бир кундаёқ менга жон кириб, бемалол ўрнимдан турадиган ва юриб дераза олдига борадиган бўлдим. Деразадан денгизга, унинг биз билан беллашишини бас қилган мовий тўлқинларига боқардим. Чамаси, кема шамол билан бир йўналишда кетиб борарди. Дераза олдида сувни кузатиб турарканман, Монтгомери —mallasoch сухбатдошимнинг исми шундай экан — кириб келди, мен ундан кийгани уст-бош сўрадим. У менга ўзининг бўздан тикилган қўпол кийимларидан айримларини берди, гапига қараганда, менинг уст-бошимни ташлаб юборишибди. Монтгомери новча, ягриндор одам эди, у берган кийим эгнимда қопдай шалвираб қолди.

У гап орасида капитан ўлгудек мастигини, ўз бўлмасида учиб ётганини қистириб ўтди. Кийинаётib, кеманинг борар манзили хусусида қизиқсан бўлдим. У кема Гаваяга кетяпти, йўлда мен тушиб қолишим керак, деди.

— Қаерда? — деб сўрадим мен.

— Бир оролда... Мен ўша ерда яшайман. Билишимча, оролнинг номи йўқ.

Шундай деркан, унинг пастки лаби янада осилиб тушди, афти эса шу қадар тундлашдики, хаёлимга беихтиёр саволларим унга ёқмаяпти, деган фикр келди.

— Мана, мен тайёр, — дедим.

У мени ўзи билан ташқарига бошлади.

## АНТИҚА ҚИЁФА

Бўлмадан чиқаверишда йўлни тўсиб бир киши турарди. У зинага бир оёғини қўйиб, бизга орқа ўгирган кўйи ҳадеб люқдан ташқарига тикиларди. Киши паст бўйли, яғриндор, қўпол, гўштдор бўйнини жун қоплаган, калласи икки елкасига чуқур ботган эди. Эгнида тим кўк астарбоб газламадан тикилган камзул, қора дағал сочлари ўсиб, пахмайиб кетган. Юқоридан итларнинг ириллаши эшитилар, лекин ўзлари кўзга ташланмасди. Шу дам йўлакдаги киши туйқус қаддини ростлаб, орқага чекинди. Урилиб кетмасин учун илкис кафтим билан ўзимни ҳимоялаганимни биламан, киши ҳайвонларга хос тезкорлик билан шартта мен томон ўгирилди.

Ёпирай, унинг қоп-қора башарасини кўриб, кайфим учиб кетди. Киши ниҳоят даражада бадбуруш эди. Ҳайвон тумшуғини эслатувчи жаги олдинга туртиб чиққан, ўрадай ним очиқ оғиздан кўриниб турган оқиш тишлари шу қадар йирик эдики, умрим бино бўлиб одам зотида бундай тишни кўрмагандим. Кўзининг оқини қон қоплаган, фақат қорачиги теграсидагина ингичка оқ доира қолган, холос. Қиёфасида ҳам ғалати ҳадик зоҳир.

— Ҳаҳ, падар лаънат! — деди Монтгомери. — Қани, қоч йўлдан!

Бадбашара кимса индамай ўзини четга олди. Зинадан кўтарилаётib ҳам сира ундан кўзимни узолмадим. Монтгомери бир зум унинг олдида ушланиб қолди.

— Ўзинг биласан, бу ерда сенга пишириб қўйгани йўқ, — деди у анча юшшаб. — Сенинг жойинг ҳўв тумшуқ томонда.

Бадбашара киши бошини қуий эгиб, ғужанак бўлиб олди.

— Улар... мени сиғдиришмаяпти, — деди дўриллаган ғалати овозда.

— Сиғдиришмаяпти? — деди Монтгомери таҳдиднамо. — Сенга мен айтяпман, қани, жўна-чи жойингга.

У яна нимадир демоқчи эди, бироқ менга кўзи тушиб, ортимдан йўналди. Ярим йўлда тўхтаб, яна ортимга қарадим, кимсанинг бу қадар беёхшовлиги мени ҳайратга соларди. Умрим бино бўлиб бунчалик бадбуруш қиёфани кўрмагандим, аммо (ёпирай, шунақаси ҳам бўларкан-да??) назаримда, қачонлардир ҳудди шу, мени ҳозир лол қолдирган афт-ангор ва юз ифодани қаердадир кўргандек ҳам эдим. Кейинроқ миямга келди: балки мени қайиқдан чиқариб олаётганларида кўргандирман. Бироқ бу ҳам менга тасалли бермади, ҳудди уни илгарироқ кўргандек эдим. Зоро, бундай гайриоддий нусхани бир кўрган одам ҳеч қачон унтутолмайди!

Хаёлимни орқамдан келаётган Монтгомерининг қадам товуши

бўлди, мен ўгирилиб, кема палубасини кўздан кечира бошладим. Пастда эшигтан овозларим кўз олдимда ястанган манзарага мени деярли ҳозирлаб қўйган экан. Бунақа ифлос палубани умримда биринчи кўришим. Сабзи пўчоги, ҳар хил барг ва кўкат қолдиқлари ҳамда таърифлашга қалам ботинмайдиган бошқа хил ахлатлар аралаш-қуралаш бўлиб ётибди. Ўтадаги грот мачтага важоҳати отни ҳуркитувчи хунук този итлар боғланган. Улар мени кўрибоқ худди занжирни узгудек жон-жаҳдлари билан ташланиб, ҳура бошладилар. Қуйруқ томондаги мачта олдига қўйилган тор темир қафасга қамалиб ҳайбатли пума\* ётибди. Ўнг томонда, борт яқинида қуёnlар билан тўла бир нечта қафас турибди, уларнинг рўпарасига — тўр яшикка эса ёлғиз лама\*\* қамалган. Итларга чарм тумшуғбоғ кийгизилган экан. Палубада кема чамбаратини бошқарип бораётган қотма денгизчидан бошқа одам уруғи йўқ.

Шамол кеманинг ямоқ-яқсоқ, кир-чир елканларини бор бўйи шиширган, денгиз бўйлаб бир маромда елдириб борарди. Осмон мусаффо, қуёш гарб сари оғган, асов тўлқинлар кўпириб биз билан бирга чопади. Биз чамбаракни ёнлаб кема қуйруғига ўтдик ва анча вақт сувнинг кўпириб ўйноқлаши, пуфакларнинг шишиб ёрилишини томоша қилиб турдик. Сўнг мен ўгирилиб, кеманинг, бошдан адок ифлос ва тартибсиз палубасига ишора қилдим.

— Нима бу, денгиз ҳайвонотхонасими? — деб сўрадим Монтгомеридан.

— Шунга яқинроқ, — деб жавоб қилди у.

— Ҳайвонлар бу ерда нимага керак? Сотгани олиб кетишяптими ёки камёб турларими? Капитан уларни жанубдаги бандаргоҳлардан бирортасида пуллаш ниятидадир-да?

— Бўлиши мумкин, — деди истамайгина Монтгомери ва кема қуйруғи томон бош бурди.

Шу пайт туйқус люк томондан қичқириқ ва кимнингдир бўралаб сўқиниши эшитилди, сўнг палубага бояги бадбашара кимса қочиб чиқди. Унинг кетидан бошига оқ фуражка қўндириганmallasoch киши бақувват бир киши чиқиб келди. Уни кўргач, менга ҳуравериб чарчаган този итлар яна жазавага минишиди. Улар кимсага жон-жаҳдлари билан ташланишар, занжирни узиб юбормоқчи бўлишарди. Бадбуруш бир зум нима қиласини билмай, итлар қошида гангид қолди, шунинг устига кетидан етиб келганmallasoch киши қулочкашлаб туриб унинг гарданига мушт солди. Шўрлик күшхонада миясига зарб еган сўқимдек қулаб, боши билан итларнинг тумшуғбоғи бор эди. Малласоч кишининг тантанавор қаҳқаҳаси янгради, у оёғида зўрга турар, ё ортидаги люкка,

\*Пума — Амриқо чангальзорларида учровчи йирик ёввойи мушук. (Муҳар..)

\*\*Лама — туюннинг Жанубий Амриқода яшовчи хили. (Муҳар.)

ёки олдинга, ҳозиргина ўзи қулаттган қурбони устига ағдарилиши ҳеч гал эмасди.

Малласоч кишининг бу ишидан Монтгомерининг газаби қўзиди.

— Ҳой, сал ўпкангизни босинг! — деди у титраб.

Бирпасда кема тумшуғига одам йигилди.

Бадбуруш кимса итларнинг оёғи тагида тинимсиз ўқириб типирчиларди. Ҳеч ким унга ёрдам беришни ўйламас, итлар уни тимдалаб, тумшуқлари билан туртиб, баттар ўтакасини ёришарди. Пастдан чиқиб келган денгизчилар, баайни қизиқ ҳангомага гувоҳ бўлгандек, қий-чув қилишиб итларни олқишишарди. Монтгомери дарғазаб қичқирди ва шаҳдам одимлар билан олға юрди. Мен унинг кетидан эргашдим.

Орадан бир дақиқа ўтар-ўтмай бадбуруш аллақачон оёқда турар, гандираклаганча даврадан нари кетиб борарди. У шу асно мачтани ушлаб турувчи йўғон арқонга яқинлашиб, беҳол суняди ва елкаси оша итларга ёёсираб қараганча ҳарсиллаб туриб қолди. Малла мириқиб ҳаҳоларди.

— Менга қаранг, капитан, — деди Монтгомери дудуқланиши яна ҳам ортиб ва келиб малласоч кишининг тирсагидан тутди. — Бундай қилишга ҳаққингиз йўқ.

Мен Монтгомерининг орқасида турардим. Капитан хиёл бурилиб, унга ўзининг маст, лоқайд кўзларини қадади.

— Нима? Ҳақ... ҳаққим йўқ? — дея у Монтгомерининг юзига бир дақиқа карахт қараб турди-да, қўшимча қилди: — Даф бўл кўзимдан ҳамманги!

Бир силтаб сепкилдор қўлларини бўшатди, икки-уч уриниб, ниҳоят, уларни чўнтакларига тикиди.

— Бу одам — йўловчи, — деди Монтгомери. — Унга қўл кўтармаслигингизни маслаҳат берардим.

— Даф бўл деяпман! — дея ўшқирди капитан яна. Шундай деб у кескин бурилган эди, гандираклаб, йиқилишига сал қолди.

— Кўнглим нимани тусаса, шуни қиласман, бу — менинг кемам.

Менимча, Монтгомери уни шу тобда тинч қўйгани маъқулроқ эди. Кўриб турибди-ку, ахир, у маст. Бироқ Монтгомери ранг-рўйи бўздек оқарганча, унинг кетидан эргашиб борт олдига келди.

— Менга қаранг, капитан, — деди бўш келмай, — хизматкоримга бундай "илтифот" кўрсатишга ҳаққингиз йўқ. Шўрлик кемага чиқибдики, унга тинчлик бермайсиз.

Мастликнинг зўридан капитаннинг оғзига калима келмай, тутилди.

— Даф бўлларинг! — деди, бўлак сўз тополмади.

Воқеани кузатиб шунга амин бўлдимки, Монтгомери унчамунчага бўш келадиган, ён бериб кетадиган одамлар тоифасидан эмас. Айни жанжал ҳам анча илгари газак олган кўринди.

— Бу одам маст, — дедим мен, аралашиш ортиқча эканини сезиб турсам ҳам, — унга тенг бўлманг!

Монтгомерининг осиғлиқ лаби титраб кетди.

— Унинг масти бўлмаган куни йўқ. Нима, масти бўлса, йўловчилар билан истаганча иш тутаверадими?

— Менинг кемамдек тоза кема йўқ эди, — деди капитан ва қўли билан қафаслар турган томонга ишора қилди. — Энди унга бир қаранг!

Дарҳақиқат, кема қараб бўлмас даражада ифлос эди.

— Одамларим ҳам ниҳоятда покиза эди.

— Ахир, ҳайвонларни олишга ўзингиз рози бўлдингиз-ку, — деди Монтгомери.

— Бошингиздан қолсин ўша лаънати оролингиз. Нима бор экан оролда бунақанги ҳайвонларга? Анави қаролингиз-чи, унинг нимаси одам? Ўша лаънати тавия-я? Унга бу ерда нима бор? Мабодо, бутун кемани ҳам ўзингизни деб ўйламаяпсизми?

— Ўша шўрлик тавия кемага чиқибдики, одамларингиз унга кун бермайди.

— Бунинг нимасига ҳайрон бўласиз, ахир у фирт иблиснинг ўзгинаси-ку Одамларимнинг уни кўрарга кўзлари йўқ, менинг ҳам. Ҳеч кимнинг тоқати йўқ унга. Ҳатто ўзингизнинг ҳам.

Монтгомери унга тескари ўгирилди.

— Барибир уни тинч қўйишингиз керак, вассалом, — деди гапини бошини қимирлатиб тасдиқлаб.

Бу гапдан сўнг капитанники баттар тутди-ку.

— Агар уни кеманинг шу томонида яна кўрсам, қорнини ёриб, ичак-чавогини бошига салла қиласман, — дея ўшиклиди.

— Ҳой, сиз кимсиз ўзи, менга ақл ўргатадиган? Кеманинг капитани менман — капитан ҳам, хўжайнин ҳам менман, тушундингизми? Бу ерда қонун менман, такрор айтаман, қонун ҳам, пайгамбар ҳам ўзим, ёлғиз ўзим. Рози бўлган бўлсан, йўловчи билан унинг малайини Арикага олиб бориб, бир неча ҳайвонлар билан бирга келтириб қўйишга рози бўлганман. Асло қандайдир худо урган иблисни... қандайдир...

У Монтгомерини чангитиб сўқди. Монтгомери шаҳд билан у томон юрган эди, шартта йўлини тўсдим.

— Қўйинг, кайфи бор, — дедим.

Капитан аввалгидан ҳам баттар чангитиб сўкинишга тушди.

— Бас қилинг! — дедим мен у томон шартта ўгирилиб — Монтгомерининг тоқати тулагани юзидан кўриниб турарди. Аммо сўкишнинг тагида энди мен қолдим.

Капитаннинг кўзига ёмон кўриниб қолганимдан қатъи назар, муштлашув олдини олишга эришдим. Турли тоифа одамлар орасида кўп бўлганман, лекин ҳеч кимнинг оғзидан бу ҳадар қўйол, уятсиз ибораларни эшитмагандим. Табиат мени қанчалар мўмин-қобил қилиб яратган бўлмасин, унинг айрим сўзларига базур чида бўлганман. "Бас қилинг", дея капитаннинг юзига оёқ қўйишга қўйиб, унга ҳеч ким эмаслигимни, шунчаки илтифот ёки инсоний раҳм-шафқатни деб кемага чиқариб олинган

ҳемириси йўқ бир текинхўр йўловчи эканлигимни мутлоқ унутиб қўйган эдим. Буни капитан менга лўндағина қилиб тушунтириб берди. Аммо нима бўлганда ҳам муштлашувнинг олдини олишга эришган эдим.

## IV Б О Б

### БОРТ ОЛДИДА

Ўша оқшом, қуёш ботар-ботмай ер кўринди ва кема лангар ташлади. Монтгомери менга манзилга етиб келганини маълум қилди. Ер хийла узоқдалиги боис ҳеч балони фарқлаб бўлмас, денизнинг мовий юзаси ялтираб, оролни тўқ кўк рангда, кафтдек қилиб кўрсатиб туради. Оролдан кўкка ингичка тутун ўрламоқда эди.

Ер кўзга ташланган пайт капитан палубада кўринмасди. У менга обдон заҳрини сочиб, пастга тушиб кетди, кейин билсан, бўлмасининг полига ётиб ухлаб қолган экан. Кемани унинг ёрдамчиси бошқарар, бу ўша — биз чамбарак олдида кўрган қотма, индамас киши эди. Кўринишидан, у ҳам Монтгомери билан чиқишимас, шу туфайлими, иккаламизга ҳам бирдек бефарқ эди. Уни гапта солишга ҳарчанд уринмай, ҳеч иш чиқмади, тушликни учовлон жим, ҳўмрайиб ўтириб қилдик. Менга яна шу нарса қаттиқ ботдики, кемадагиларнинг барчаси негадир ҳамроҳим ва унинг ҳайвонларини хушлашмасди. Мен Монтгомери ҳайвонларни олиб кетишидан қўзланган мақсадни сир тутса керак, дея хуолоса чиқардим, жуда билгим келса ҳам сўроқламадим.

Осмонда юлдузлар чарақлар, биз эсак ҳамон палуба ўртасидаги майдончада гап сотиб ўтирадик. Кеманинг сарғимтири нур таралаётган тумшуғи томондан келаётган ғала-ғовур ҳамда ҳайвонлар шарпасини ҳисобга олмагандан, тун сокин ва мусаффо. Пума қафас бурчагига тиқилиб, ғужанак бўлиб олган, бизга қўзлари ёниб, совуқ тикилмоқда. Итлар, афтидан, уйқуда. Монтгомери сигара чиқарди.

У хотиротлар оғушита қайтиб, юраги эзила-эзила мен билан Лондон ҳақида сұхбатлашди, ўтган вақт мобайнинда юз берган ўзгаришлар хусусида сўраб—суриштириди. Унинг гап оҳангидан ўша пайтдаги ҳаёт тарзини ниҳоятда хуш кўргани, бироқ қутилмагандага ундан айро тушғани яққол сезилиб туради. Мен батаври имкон сұхбатни қизитишга ҳаракат қиласдим. Орқадан тушиб турган хира чироқ ёруғида унинг озғин, рангпар юзига тикилганча гапларини эшитарканман, сұхбатдошим оддий одам эмаслигига тобора ишонч ҳосил қилиб борарадим. Гап орасида у истиқомат қилувчи фафлат пардаси оғушидаги оролчага оҳиста қараб қўйдим.

Бу одам поёнсиз кенглик бағрига фақат мени қутқариш учун

танда қўйгандек туюларди. Эртага у кемани тарк этади ва биз бир-биримизни бошқа кўрмаймиз. У билан танишувимиз оддий-одатий тарзда кечган тақдирда ҳам барибир хотирамда қоларди. Ахир шундай ўқимишли одам бетайин бир оролда ёлғиз нима қиласи, шунча ҳайвонни бу ерга келтиришдан мақсади нима? Беихтиёр капитаннинг саволини эсладим: "Нима бор экан оролда бунақанг ҳайвонларга?" Қизиқ, нега ундан илк бор ҳайвонлар кимники, деб сўраганимда, улардан тонди? Кейин анави хизматкорининг афт-ангари, ўзини тутишида ҳам аллақандай гайритабиилик мавжуд. Шуларнинг бари бир бўлиб сұхбатдошимга сирли кўланка ташлар, хаёлимни танг қилиб, тилимни боғларди.

Лондон тўғрисидаги гапларга якун ясаганимизда тун ярмидан оқкан, биз ёнма-ён, бортга энгашган кўйи ҳар биримиз ўз хаёлимиз билан банд, юлдузлар акси жимираётган сувга ўйчан тикилиб турардик. Шу тобда туйқус кўнглим эриб, дилим шукронга ҳиссига тўлди ва мен миннатдорчилик изҳор этишга тушдим.

— Ростини айтсан... — дедим мен ва бироз тўхтаб, давом этдим: — Сиз менинг ҳаётимни сақлаб қолдингиз.

— Тасодиф, — деди у, — оддий бир тасодиф.

— Лекин барибир миннатдорчилик билдиришга бурчлиман.

— Э, қўйсангиз-чи, арзимайди. Сиз ёрдамга муҳтоҷ эдингиз, менда эса бунга имкон бор эди. Қилган ишим фақат сизга укол санчишу овқатлантириш бўлди, холос. Мабодо, бирорта кам учровчи жонивор учраганда ҳам шундай иш тутган бўлардим. Барибир зерикиб ҳам юрувдим, нима биландир овунишним керак эди. Агар ўша куни кайфиятим чатоқ бўлганда ёки афтингиз менга ёқмаганда, билмадим, ҳозир ахволингиз нима кечарди.

Бу гап орага бироз совуқлик солгандек бўлди.

— Ҳар ҳолда... — дея гапга оғиз жуфтладим мен, бироқ у шартта кесди:

— Айтдим-ку, шунчаки тасодиф, деб. Инсон ҳаёти катта-кичик тасодифлардан иборат ўзи. Фақат эси пастларгина ишонишмайди бунга. Хўш, мен нега тарақкий дунёдан узилиб, Лондон кайф-сафосидан маҳрум, бу ерларда санғиб юрибман? Шунинг учунки, бундан бир йил муқаддам, туманли бир оқшом ўн дақиқага ақлини бой бериб қўйгандман...

У жимиб қолди.

— Хўш, кейин-чи? — деб сўрадим мен.

— Бўлгани шу.

Иккимиз ҳам сукутга толдик. Пича ўтгац, у кутилмаганда кулиб юборди.

— Юлдузлар аксида тилни қичитадиган нимадир борми, дейман-а. Қип-қизил эшак бўлсан ҳам ёриламан энди сизга.

— Ниманики айтманг, бари иккимизнинг орамизда қолади.

У гапириш ниятида оғиз жуфтлади-ю, бироқ кейин иккиланиб бош чайқади.

— Майли, айтгингиз келмаса, айтманг, — дедим мен. — Билишим унчалик шарт эмас. Сир сирлигича қолгани маъқул. Менга ишониб ёрилганингиз билан фақат озроқ енгил тортасиз, холос. Шайтон йўлдан оздириб, оғзимдан гуллаб қўйсам... Нима бўлади кейин?

У тарафдудланиб, нималардир деб пичирлади. Шўрлик, гап очишга очиб, энди ноқулай аҳволда қолган, нима деярини билмасди. Гапнииг пўскалласи, бўлғуси докторни Лондонни тарк этишга мажбур қилган сабабларни унчалик хушим ҳам йўқ эди. Буни хаёлан тасаввур қилиш сира бир қийинчилик туғдирмасди. Мен оҳиста елкамни қисиб, нари ўғирилдим. Сал нарида аллақандай шарпа бортга суюнган кўйи сувдаги юлдузлар аксига кўз тикиб турарди. Бу ўша, Монтгомерининг сўхтаси совуқ хизматкори эди. У, худди нигоҳимни сезгандек, менга елкаси оша қаради, сўнг тез бошини буриб, яна сувга кўз тикди.

Балки бу сизга аҳамиятсиз туюлар-у, бироқ мен турган еримда қотиб қолдим. Яқин орадаги ягона ёруғлик манбаи чамбарак олдидаги чироқ эди. У қоронгилик бағрида туриб, мен томон бошини бургандга юзини бир лаҳза чироқ ёритганига қарамай, унинг оч-яшил йилтиллоқ кўзларини аниқ кўрдим.

Буни қарангки, ўша вақт мен қизғиши шуъла одамзот кўзида баъзан акс этиши мумкинлигини билмас эканман. Қаршимда бутунлай ғайриоддий бир мавжудот турарди. Кўзлари ёниб турмиш бу бадбуруш нусха ўй-хәёлимни шу қадар чулғаб олдики, бир дақиқа олис болаликдан мерос ваҳимали хотиралар исканжасида қолдим. Ваҳима қандай тез босган бўлса, шундай тез тарқади. Қаршимда ўша шарпа ҳануз бортга суюнган кўйи сувдаги юлдузлар аксига кўз тикиб турар, энди у сира ғайриоддий туюлмасди. Монтгомери яна тилга кирди.

— Бўлмага тушсак бўлармиди, — деди у, — очиқ ҳавода шунча сайд қилганингиз етар.

Мен унга пойинтар-сойинтар нимадир дедим. Биз пастга тушдик, у мен билан бўлмам эшиги олдида хайрли тун тилаб хайрлашди.

Тун бўйи алоқ-чалоқ тушлар кўриб чиқдим. Хира зальфарон ой анча кеч пайдо бўлди. Унинг сирли заиф нурлари бўлмага хиёл қийшайиб тушиб, деворда каравотимнинг баҳайбат кўланкаси акс этди. Юқорида итлар уйғониб, ҳуриб, ириллай бошлиашди. Чўчиб-чўчиб ётиб, фақат тонготарда кўзим илинибди.

## ОРОЛГА ТУШИШ

Эрта тонгда — ўзимга келганимнинг иккинчи, кемага олинганимнинг, чамамда, тўртинчи куни — ўқ товушию одамлар талотўпини туш кўриб, алаҳсираб уйғондим, юқорида ҳадеб ҳирқираб томоқ йиртишарди. Кўзимни ишқалаб, овозга қулоқ тутганча ётарканман, қаердалигимни сира англай олмасдим. Туйқус юқоридан яланг оёқларнинг шап-шуп юргани, зилдек буюмларнинг тарақ-туриғи ҳамда занжирларнинг шарақлаши эши билди. Кема дабдурустдан бурилиб, сув қаттиқ шалоплади, бўлманинг кафтдек думалоқ дарчасига кўкиш-сарғимтир кўпикли тўлқин келиб урилди. Апил-тапил кийиниб, юқорига чопдим.

Пиллатоялардан кўтариларанман, қирмизи осмон (қуёш энди чиқиб келмоқда эди) ва капитаннинг йўғон белию малласоч бошини кўрдим, у, қўлида кеманинг бош мачтасидан ошириб ташланган арқон, пума қафасини аста сувга тушироқда эди. Шўрлик жониворнинг кўзлари қўрқувдан ола-кула бўлиб кетган, тор қафас тагига маҳкам қапишиб олганди.

— Барини туширинглар, — дея ўшқиради капитан, — биттасини ҳам қолдирманглар! Бу иблислардан кемани тозалайман!

У шундоққина йўлим устида турарди, палубага чиқиш учун елкасига қоқишига мажбур бўлдим. У жойида бир сакраб тушди, сўнг мен томон ўгирилди-да, ортга тисарилди. У ҳануз маст эди.

— Ҳа?! — дея ўшшайди у, сўнг сал ўзига келди чоғи, қолиплашга тушди: — Ҳа-а, мистер... мистер...

— Прендиқ, — дедим мен.

— Қанақа Прендиқ?! — дея қичқирди у туйқус. — Унингни Ўчир — мана, сиз кимсиз. Мистер Унингни Ўчир.

Бу чўчқа билан тенг бўлиб, обрў топмаслигимни сездим. Бироқ унинг кейинги тутган ишини сира кутмаган эдим. У қўлини Монтгомери билан кенг елкали, соchlари қордек оппоқ, энгига кўк жужундан тикилган кир камзул кийган киши (афтидан, у ҳозиргина кемага кўтарилган эди) гаплашиб турган кўприкча томон нуқди.

— Бир анавиларнинг ёнига жўнаб қолинг-чи, — дея қичқирди капитан. — Қани, мистер Унингни Ўчир, бўла қолинг!

Унинг овозини эшишиб Монтгомери билан анави кимса биз томон ўгирилишди.

— Нима деганингиз бу? — дея анграйдим мен.

— Кемадан туёғингизни шиқиллатинг, мистер Унингни Ўчир, деганим. Қани, кемани бўшатинг-чи, чақонроқ бўлинг, мистер

Унингни Ўчир. Кема, шўриинг қургур кема бир ахлатдан тозалансин. Қани, чақон-чақон!

Мен унга меровсираб тикилиб турардим. Бироқ пича ўтиб, ўзимнинг ҳам майлим шу эканини англадим. Бунақанги уришқоқ, жирраки одамнинг кемасида йўловчи бўлиб кетгандан кетмаган маъқул. Мен Монтгомери томонга қарадим.

— Биз сизни олиб қололмаймиз, — деди Монтгомери билан турган одам қатъий.

— Олиб қололмайсиз? Нега? — дедим мен эсанкираб.

Унинг чеҳрасидек қатъиятли, қўрқув билмас чеҳрани биринчи кўришим эди.

— Менга қаранг, — дея мен капитан томон ўгирилдим.

— Бўшатинг кемани, — деб ўшқирди у яна. — Бу кема ҳайвонлар ёки ҳайвондан ҳам бешбаттар одамхўрларни ташишга мўлжалланмаган. Бўшатинг. Улар сизни олиб қолишадими, йўқми — билмайман, тўрт томонингиз қибла. Бу ерда ризқ-насибангиз тугаган. Анави дўстларингиз билан бирга қўшмозор бўлинг! Тупурдим бунақанги оролга, уни қайтиб энди елкамнинг чуқури кўрсин!

— Менга қаранг, Монтгомери... — дедим мен.

У пастки лабини буриб, ёнидаги оппоқ сочли кишига ишора қилди, бу унинг ёрдам беришга ожизман, дегани эди.

— Сизга ўзим ёрдам бераман, — деди кесатиб капитан.

Шундан сўнг ўртада беҳуда мунозара бошланди. Мен уч кишининг дам унисига, дам бунисига ялиниб-ёлворар, бир оппоқ сочли кишидан қирғоққа тушишга ижозат сўрасам, бир маст капитандан кемада қолдиришини илтимос қиласдим. Шу даражага бориб етдики, ҳатто денгизчиларга ҳам илтижо қилишга тушдим. Монтгомери лом-мим демас, фақат бош чайқарди, холос.

— Кемани бўшатинг, дедимми, бўшатасиз, тамом-вассалом!

— дея тинимсиз жаварди капитан. — Қонун мен учун икки пул! Бу кемада ўзим хон, ўзим бекман.

Ялиниб-ёлворишим беҳуда эканлигини сезгач, мен дўй-пўписа-га ўтдим, бироқ оғиз очиб ултурмай овозим ғиппа бўғилди. Ўсал бўлганимдан жазавам тутиб қўйруқ томон йўналдим, чексиз бўшлиққа тикилганча маъюс туриб қолдим.

Алҳол, денгизчилар чақонлик билан юкларни, ҳайвонлар қамалтган қафасларни туширишарди. Кеманинг шамолга тескари томонида катта, елканлари кўтариғели баркас тайёр турар, юклар ўшанга туширилмоқда эди. Баркас кема панасида тургани боис юкларни қабул қилиб олгани келган оролликлар кўринмасди.

Монтгомери ҳам, унинг ҳамроҳи ҳам менга бефарқ, юк ташиётган тўрт-беш нафар денгизчига йўл-йўриқ кўрсатиш ва кўмак бериш билан машғул эди. Капитан ҳам ўша ерда, бироқ у ёрдамлашишдан кўра кўпроқ ҳалақит берарди. Мени эса дам умидсизлик, дам алам босиб келмоқда эди. Тақдирга тан бериб, юк туширишларини жимгина кузатиб турарканман, ўз

қисматимдан кулишни ҳам, йиғлашни ҳам билмасдим. Устига устак, ионушта ҳам қилмаганман, қорним оч, бу борган сари мени тушкунликка туширади. Очлик ва ҳолсизлик эса одамни қўрқоқ қилиб қўяди. Капитаннинг дарду фикри мени кемадан йўқотиш эканлигини, унга қаршилик кўрсатиш беҳудалигини яхши тушунар, шу билан бирга Монтгомери ҳамда унинг шеригини ҳам мени оролда олиб қолишгә кўндириб бўлмаслигимни билиб турардим. Борманми, йўқманми — ҳеч кимнинг парвосига келаётгани йўқ, ҳамма ўлиб-тирилиб кемадаги юкларни баркаста тушириш билан овора... Хуллас, пешонада борини кўришга рози бўлишдан бошқа иложим йўқ эди.

Ниҳоят, юклар тушириб бўлиниб, навбат менга етди. Мени кўприкча томон судрадилар, ҳолим йўқлигимдан зўрга қаршилик кўрсатардим. Буни қарангки, шу вазиятда ҳам Монтгомери билан бирга баркасада ўтирган одамларнинг ғалати қорамтири юзлари назаримдан четда қолмасди. Баркас юкларни қабул қилиб бўлиши билан кемадан ажралди. Шундоққина оёғим остида сув шалоплади ва мен бошим билан сувга қуламаслик учун жонҳолатда ўзимни орқага ташладим.

Баркасдагилар кулиб, бир нималар деб қийқиришди. Монтгомери уларни сўкиб берди. Капитан, унинг ёрдамчиси ва қарашиб юрган денгизчилардан бири мени судраб, кема тумшуғига олиб келишди. У ерда "Леди Вейн"дан мерос эшқаксиз, ярмигача сув қайиқ боғлоғи турарди. Мен унга тушищдан бош тортиб, палубага чўзилиб ётиб олдим. Лекин барибир мени арқонга боғлаб, мажбуран қайиқقا туширдилар. Сўнг шартта арқонни кесиб, мени бутқул тақдир ҳукмига топширдилар.

Секин-аста кема билан орамиздаги масофа узоқлаша бошлади. Мен ҳайкалдек қотганча денгизчиларнинг елканларни кўтариб, шамолга тўғрилашларига термулиб турардим. Ниҳоят, елканлар патирлаб шицди. Мен кеманинг довул ва бўронларда шикаст еган бортига унсиз тикилардим. У борган сари мендан узоқлашиб бормоқда эди.

Кейин унинг ортидан бурилиб ҳам қараганим йўқ, қайиқ ичига тиқилганча сокин жимирилаётган ҳайҳотдек уммонга лоқайд термулиб, карахт ўтиравердим. Секин-аста ақл-ҳушим жойига тушиб, яна ўша ярмигача сув лаънати қайиқда эканимни ҳис этдим. Орқамга ўгирилиб қайиқдан анча олислаб кетган кемани кўрдим, унинг қуйругидаmallasoch капитан масхараомуз нималардир деб қичқиради. Олдинда эса оролга яқинлашгани сари кичрайиб бораётган баркас кўзга ташланарди.

Туйқус ёлғизликнинг бор даҳшати кўз олдимда яққол гавдаланди. Агар оқим ўзи олиб бориб ташламаса, оролга сузиб этиш мушкул эди. Ўзимнинг аҳволим бу, кўргуликлардан карахт танамда куч-қувватдан асар йўқ; устига устак, қорин ҳам пиёзнинг пўсти, ҳушимдан кетай-кетай деб турибман, акс ҳолда ўзимни бунчалик йўқотиб қўймасдим-ку. Туйқус кўксим тўлиб,

бир йиғи босиб келдики, болалик пайтимдан бери бундай бўлмаган эди. Икки кўзимдан дув-дув ёш оқар, жазавада қайиқ тубида тўпланган сувни муштлар, жаҳл билан бортни текилардим. Жонимни олишини сўраб тангрига ёлворардим.

## VI БОБ

### БАРКАСДАГИ БЕДАВОЛАР

Тақдир ҳукмига ташланганимни кўриб, оролликларнинг менга раҳмлари келди. Бу пайт қайигим шарқий йўналишда орол томон аста қалқиб кетмоқда эди, бир маҳал не кўз билан кўрайки, баркас бурилиб, мен томон кела бошлади. У юк ва одамлар билан лиқ тўла эди, яқин келаркан, кўзим беихтиёр қўйруқ томонда, този итлар билан яшиклар орасида ўтирган Монтгомерининг кенг елкали, оппоқ сочли шеригини илғади. У қимир этмай, жим тикилиб турарди менга. Анави бадбуруш сўхта ҳам баркас тумшуғида, пума қафаси ёнида икки кўзини лўқ қилиб қараб ўтиради. Баркасда ғалати, ҳайвонсифат яна уч киши бўлиб, този итлар нуқул уларга тишларини кўрсатиб ириллашарди. Монтгомери баркасни мен томон ҳайдаб келди ва яқинлашгач, қайиқ арқонига узалиб, уни баркас қўйруғидаги илмоққа маҳкам чандиб боғлади — баркасада менга жой ийўқ эди.

Мен бу пайтда анча ўзимга келиб қолгандим, Монтгомерининг чорловига тетик жавоб бердим. Қайиқ сувга тўлиб, чўкай деб қолганлигини айтгандим, у ёғоч чўмич узатди. Баркас ва қайиқ орасидаги арқон туйқус тарағ тортилган эди, мен қалқиб орқага йиқилдим, бироқ ўнгланиб, қайиқни йиғилган сувдан тозалашга тутиндим.

Қайиқдаги бор сувни чиқариб ташлагунимга қадар (қайиққа фақат сув тўпланиб қолган, ўзи бус-бутун эди) баркасада ўтирганларга қарашнинг имкони бўлмади.

Ишни тутатиб қараганимда эса оппоқ сочли киши ҳануз менга тикилиб турар, нигоҳида алланечук саросима сезиларди. Кўзларимиз тўқнашди ва у нигоҳини пастга, тиззалари орасида ўтирган тозиларга олди. Аввал таъкидлаганимдек, у басавлат, кенг пешонали, юз бичими бўлиқ келишган одам эди; бироқ — одатда, ёши ўтиңқираган кишиларда шундай бўлади ўзи — қовоқлари тиришиб, халтадек осилиб қолган, оғзининг икки четидаги тириш ўта қатъиятли одам эканидан далолат берарди. У Монтгомери билан деярли шивирлашиб сўзлашар, менга ҳеч нарса эшитилмасди. Нигоҳим оҳиста ундан баркасдаги қолган уч кишига кўчди, во ажаб, улар жуда ғалати эдилар! Менга уларнинг фақат юзигина кўринарди; тавба, уларнинг афтида шундай гайритабиий аломат зоҳир эдикни, менда беихтиёр ижирғаниш ҳисси уйғонди. Кўзим алдаяптими, деб уларга диққат

билан тикилдим, бироқ тасаввурим заррача ўзгармади, нега бундай бўлаётганига эса сира ақлим етмади. Улар менга ҳабаш бўлиб кўринишиди, бироқ бутун таналари — қўлларидан тортиб оёқларигача, ҳатто тирноқларининг учига қадар юпқа, кир оқ мато билан чирмаб ташланган эди. Фақат Шарқ аёлларигина шунаقا либос кийишларидан хабарим бор, бироқ эркакларнинг бунчалик ўралиб-чирмалишларини сира кўрмаган эканман. Бошларида салла, салла остидан менга олдинга туртиб чиқсан жағлари ҳамда сирли йилтироқ кўзлари кўриниб турарди. Салла тагидан худди от ёлига ўхшашиб силлиқ ва қорамтири сочлари кўзга ташланар, ўтирган ҳолларида ҳам бўйлари тасаввуримдаги оддий одамзот бўйидан хийла баланддек эди. Оппоқ сочли кишининг бўйи сезишимча олти футдан кам эмасди, бироқ шу бўйи билан ҳам у ҳозир ўтирган ерида учовидан бир қарич паст кўринарди. Кейинчалик билдимки, улар мендан сира баланд эмас, фақат таналари ниҳоятда чўзиқ, оёқлари эса сонларидан калта, маймоқ экан. Қисқаси, улар ақл бовар қилмас даражада кунук, бедаво одамлар эдик, бошлари узра олдинги елкан остидан қоронғида кўзлари ёнувчи анави бадбуруш сўхта ҳам тикилиб турарди.

Ундан кўзимни узмай қараб туарканман, беихтиёр нигоҳларимиз тўқнашди ва у мендан кўзини олиб қочди, бироқ ўгринча тикилишини қўймади. Безор қилмай қўя қолай шўрликни, дедим-да, эътиборимни рўпарадаги биз яқинлашиб бораётган оролга қаратдим.

Орол паст текис бўлиб, бошдан адоқ дов-даражатлар билан буркалган, асосий ўсимлиги палманинг менга номаълум тури эди. Оролдан ингичка оқ тутун кўтаришлар, паға-паға бўлиб осмон бағрига сингарди. Биз иккала томондан ҳам қия бурун билан қуршалган кенг кўрфазга кирдик. Соҳил тим кулранг қум билан қопланган бўлиб, денгиз сатҳидан олтмиш-етмиш футлар чамаси қиялаб нишоб кўтаришган, унинг ҳар ер-ҳар ерида дарахту буталар ўсиб ётарди. Тепага чиқаверишда, қия соҳил ўртасида гаройиб олачипор тошлардан иборат гов девор кўринарди, кейинчалик билдимки, у иирик чиганоқ ҳамда жилвиртошлардан барпо қилинган экан. Девор ортидан бир жуфт қамиш том чиқиб турарди.

Кирғоқда бизга бир одам пешвоз чиқди. Узоқдан яна бир неча гаройиб мавжудот ўзини қияликдаги буталар ичига урганини иллагандим, бироқ қирғоққа етиб келиб улардан ном-нишон кўрмадим. Пешвоз чиқсан одам ўрта бўй бўлиб, боши худди ҳабашники каби қоп-қора эди. Урадай оғзида лаб дегандан ном-нишон кўринмас, қўллари ниҳоятда ингичка, маймоқ оёқлари товонидан сонига қадар сумакни эслатарди. У бўйинини олдинга чўзганча кўзини лўқ қилиб қараб турарди. Эгнида Монтгомери билан оппоқ сочли кимсадаги каби қўқимтири астарбоп матодан тикилган камзул ва иштон кўзга ташланарди.

Қирғоққа яқинлашарканмиз, у олди ва орқасига қараб лапанглаб чопа бошлади. Монтгомерининг буйруги билан баркасдаги тўрт бедаво ўрнидан сакраб турди ва ҳаракатлари қовушмай, елканларни тушира бошлашди. Монтгомери чамбаракни айлантириб, баркасни қирғоқ яқинидаги торгина кўрфазга олиб кирди. Қирғоқда кутиб турган одам оёғини қўлига олиб биз томон шошилди. Кўрфаз деб айтганим ернинг каттагина ўпирилган лахтаги бўлиб, сув кўтарилган пайт баркас бу ерга бемалол сузуб кира оларди.

Баркас тумшуғи қумга санчилиб, тўхташи ҳамон қўлимдаги ёғоч чўмични унинг қўйруғига тираб, қайғимни тўхтатдим, сўнг арқонни илмоқдан ечдим-да, қирғоқ сари ошиқдим. Танаси ўраб-чирмалган уч киши беўхшов хатти-ҳаракатлар билан баркасадан тушиб, қирғоқда қарши олмиш кимса ёрдамида юкларни тушира бошлашди. Мени лол қолдирган нарса уларнинг галати қадам олишлари бўлди. Файриоддий ҳам, бесёнақай ҳам деб бўлмасди буни, йўқ, оёғлари худди майиб-мажруҳ, узун-калта, баайнин алкаш-чулкаш улангандек эди. Оппоқ сочли киши итларни қирғоққа олиб тушди. Улар ҳануз ириллашларини қўймас, занжирларини узгудек бўлиб бедаволарга ташланишарди.

Учала бедаво сўлоқмон ҳам бир-бири билан гаплашаётib галати, хириллашга уйқаш товушлар чиқаришарди, қирғоқда бизни кутиб олган кимса ҳаяжон билан аллақандай ажнабий тилда минғирлади ва улар баркаснинг қўйруқ томонида таҳланган тойларни тушира бошладилар. Шунақа товушни илгари ҳам қаердадир эшитгандек эдим, бироқ ҳарчанд уринмай, эслайламдим. Оппоқ сочли кимса бир эмас, олти итни занжиридан ушлаб олган, шовқин-сурон ичиди туриб, овозини баралла қўйганча уларга буйруқ берарди. Монтгомери ҳам бўшаб, қирғоққа тушди ва юкларни туширишга кўмаклаша бошлади. Узоқ вақт тамадди қилмаганим ва беҳоллигим туфайли нақ мияга ураётган жазирамада уларга ёрдам қўлинини чўзишга ожиз эдим.

Оппоқ сочли киши туйқус мен ҳақимда эслади шекилли, яқинлашиб:

— Нима бало, нонушта қилмаганимисиз, дейман, — деди.

Қалин қошлари остидан кичкина қора кўzlари чақнаб турарди.

— Узр, айбга буюрмайсиз бизни. Чоқирилмаган бўлсангиз ҳам, ҳар тугул, меҳмонсиз, кўнглингизни олиш бизнинг бурчимиз, — дея давом этди у кўзимга тик қараб. — Монтгомерининг гапига қараганда, сиз, мистер Прендик, ўқимишли одам экансиз, илмдан оз бўлса-да хабарингиз бор эмиш. Сир бўлмаса айтинг-чи, қайси соҳа билан шуғуллангансиз?

Мен бирмунча вақт Ройал коллежида таҳсил олганим, Ҳаксли раҳбарлигига биология соҳасида илмий иш қилганимни айтдим. Буни эшитиб унинг қошлари хиёл чимирилди.

— Унда бу ишни ўзgartиради, мистер Прендик, — деди у,

овозида озрөк ҳурмат оҳанги сезилгандек бўлди. — Буни қарангки, ҳаммамиз ҳам биолог эканмиз. Қолаверса, бу ер ҳам ўзига хос биологик станция.

У тош девор томон урина-сурина пума қамалган қафасни аравачада судраб келаётган оқ матога ўраб-чирмалган кимсаларга қаради.

— Ҳа, биз Монтгомери иккимиз биологмиз, — дея давом этди у. — Бу ердан энди қачон кета оласиз — билмадим, — деди бироз сукутдан сўнг. — Оролимиз кемалар қатнайдиган йўлга тескари. Ўтса ҳам, йилда бир битта кема ўтади.

У шундай дея шартта ўрнидан туриб, пума қамалган қафасни судраб келаётган кимсаларни ёнлаб ўтди-да, қиялик ошиб тош девор ортига ўтиб кетди. Қолган икки кимса Монтгомери билан пастак аравачага енгил юкларни ортмоқда эди. Лама ва қуёnlар қамалган қафаслар ҳамон баркасада, итлар эса ўриндиқларга боғланганча туришарди. Енгил буюмларни аравачага юклагач, учовлон бир бўлиб салкам бир тоннacha юкни пуманинг қафаси кетидан юқорига олиб чиқа бошладилар. Сўнг Монтгомери уларни қолдириб, ортга қайтди ва яқинлашиб, менга қўлини узатди.

— Шахсан мен оролда қолганингиздан беҳад хурсандман, — деди у. — Капитан одам эмас, гирт эшакнинг ўзи-ку. Роса таъзиирингизни ердингиз у билан.

— Сиз иккинчи марта ҳаётимни сақлаб қолдингиз, — дедим мен.

— Нима ҳам дердим... Майли, шундай ўйласангиз, ўйлай қолинг! Ишқилиб, бу жимитдек оролда зерикиб қолмасангиз бўлгани! Сизнинг ўрнингизда мен иложи борича бу ердан тезроқ кетиш чорасини излаган бўлардим. Анави... — Шундай деб Монтгомери илкис тилини тишлади, сал бўлмаса оғзидан айтиш талаб этилмайдиган гап чиқиб кетаёзган эди. — Ҳа, қуёnlарни тусиришиб юборолмайсизми? — дея гапни чалғитди у.

Унинг қуёnlар билан туттган иши менга жуда эриш туюлди. Белимизгача сувга бўкиб, икковлон баркасадаги қуёnlар қамалган қафаслардан бирини қирроққа олиб чиқдик. Чиқишимиз билан Монтгомери қафас эшигини очиб, хиёл қиялатди. Қуёnlар тапира-тупур қилиб ерга тушишди. Сўнг у чапак чалиб, бир-бирининг устида уймалашаётган қуёnlарни ҳуркитди ва ўн бештами, йигирматами келадиган жонивор иргишилаб, қирроқ бўйлаб ҳар томонга тарқаб кетди.

— Ўсиб улгайнинг, ўзларингиздан кўпайишинг, шалпангўлоқ дўстларим, — деди Монтгомери. — Шу орол бошвоғи билан сизларники. Мана, гўшт масаласи ҳам ҳал.

Дикиллаб чопиб кетаётган қуёnlар кетидан қараб турарканман, оппоқ сочли киши қўлида бир шиша ичкилик ва озгина қотирилган нон билан қайтиб келди.

— Озроқ тамадди қилиб олинг, Прендиқ, — деди у аввалгидан ҳам дўстона оҳангда.

Ортиқча ялнитирмай қотирилган нонни тушира кетдим, киши эса Монтгомерига қүёnlарни қирғоққа туширишга кўмаклашди, яна йигирматадан ортиқроқ қўён орол бўйлаб тарқаб кетди. Қолган учта яшикдаги қуён қафасга қамалган лама билан бирга девор ортига жўнатилди. Ичкиликка қўл ҳам урмадим — онадан туғилибманки, оғзимга ичкилик олган эмасман.

## VII Б О Б

### ҚУЛФ ЭШИК

Ҳурматли ўқувчим, сезиб турибсизки, атрофимдаги ҳамма ҳамма ўта ғайритабиий эди, мен эсам туйқус бошимга ёғилган кўргуликлардан гаранг, ён-веримдагини чуқур идрок этадиган аҳволда эмасдим. Мен ламанинг қафаси ортидан юрдим, Монтгомери кетимдан етиб келиб тош девор ортига ўтмасликни уқтириди. Пума ҳануз қафасда, қафас эса шундоққина кираверишда, айрим юклар билан бирга турарди.

Ортимга ўгирилиб қирғоққа чиқарип қўйилган бўум-бўш баркасни кўрдим. Оппоқ сочли киши шошиб биз томон келарди.

— Энди мана бу чақирилмаган меҳмон масаласини ҳал қилиш керак, — деди у Монтгомерига, яқин келгач. — Нима қиласмиш-а энди уни?

— Унинг илмдан хабари бор, — деди Монтгомери.

— Unda манави янги хом ашё билан тезроқ ишни бошласак бўларди, — деди оппоқ сочли киши боши билан тош девор томонга ишора қилиб. Унинг кўзлари чақнарди.

— Ҳа, ҳа, албатта, — деди Монтгомери совуққина.

— Меҳмонни у ёққа киритсанк бўлмас, ўзига алоҳида бошпана қуриб беришга эса вақтимиз йўқ, қолаверса, унинг ишимишга аралашмагани маъқул.

— Ихтиёр сизларда, — дедим мен. "У ёққа" деганда киши нимани назарда тутгани менга қоронгу эди.

— Мен ҳам шу фикрдаман, — деди Монтгомери. — Аммо менда эшиги ташқарига қараган бир хона бор...

— Демак, ҳамма иш ҳал, — дея бетоқатлик билан гапни бўлди киши Монтгомерига синчков тикилганча ва биз учовлон тош девор томон юрдик.

— Сиздан ишларимизни сир тутаётганим учун узр, мистер Прендик, бироқ унутмангки, сиз бу ерда шунчаки бир чақирилмаган меҳмонсиз. Бизнинг кичкинагина ташкилотимиз ҳам худди Мовий Соқолнинг саройи каби ўз сирига эга. Асаби бутун одамга бунинг сира ваҳимали жойи йўқ-ку. Бироқ сиз ҳали синашта эмассиз-да...

— Ҳаққаст рост, — дедим мен. — Хафагарчилик айни чоқда қип-қизил аҳмоқлик бўларди.

Кишининг чеҳрасида совуқ табассум акс этди — у лабининг

бир четини буриб илжаядиган шунаقا тошмехр одамлар тоифасидан эди — ва маъқул дегандек хиёл энгашиб, менга таъзим бажо қилди. Биз катта дарвоза ёнидан ўтдик. Дарвоза ёғочдан бўлиб, темир билан қопланган, қулфлоғли эди, олдида ҳозиргина баркасадан туширилган юклар тартибсиз сочилиб ётарди; ўтиб, тош девор бурчагидаги кичкина эшикка яқинлашдик, мен унга аввал аҳамият бермаган эканман. Оппоқ сочли киши терлайвериб шўр боғлаган кўкимтири камзули чўнтағидан бир шода калит чиқарди ва эшикни очиб, ичкарига кирди. Қўлидаги калитлар шодаси ҳамда ўзи шу ерда туриб ҳам эшикларни эҳтиётлаб қулфлаб юриши менга ниҳоятда қизиқ туюлди.

Унга эргашиб кичкина, жўн, бироқ қулай жиҳозланган хонага кирдим, хонанинг ички эшиги тош ётқизилган текис ҳовлига қараб қия очиқ эди. Монтгомери кира солиб эшикни ёпди-да, қулф солди. Хонанинг салқин бурчагида тўр беланчак осиглиқ турар, темир панжара қопланган, ойнасиз, кичкина дераза эса тўппа-тўғри денгизга қараганди.

Оппоқ сочли киши шу ер менинг турар жойим эканини тушунтириди, ичкари эшикни эса "ҳар эҳтимолга қарши" нариги томондан қулфлаб қўядиган бўлди — ундан нарига менга йўл йўқ эди. У диққатимни дераза олдида турган қулай оромкурси билан тўр беланчак яқинидаги токчага қатор терилган эски китобларга қаратди, уларнинг асосини жарроҳликка оид қўлланмалар, табобат пирларининг лотин ва юнон тилидаги (бу тилларни мен яхши билмасдим) асарлари ташкил ётарди. У бўлак ичкари эшикни очишни истамагандек, кирган эшигимиздан чиқиб кетди.

— Бу ерда биз тушлик қиласиз, — деди Монтгомери ва нимадандир гумонсираб, шу заҳоти оппоқ сочли киши кетидан отилди. Унинг: "Моро!", деб чақиргани эшитилди, аввалига бу исмга унча аҳамият бермадим. Бироқ токчадаги китобларни титкилаётib, хаёлан такрорладим: Моро... Қаерда эшигиман-а бу исмни?

Дераза олдига ўтириб, чўнтағимда қолган қотирилган нон майдаларини иштаҳа билан кавшай бошладим. Моро?

Деразадан қараб, қирғоқ томондан яшик кўтариб келаётган анави ўраб-чирмалган бедаволардан бирини кўрдим. Пичадан сўнг дераза роми тўсиб, у кўринмай қолди. Сўнг орқамдаги эшик қулфига калит солиниб, шиқирлагани эшитилди. Сал ўтиб берк ичкари эшик ортидан този итларнинг овози келди, чамаси, уларни қирғоқдан олиб келишган эди. Итлар вовулламас, қандайдир қизиқ тарзда ириллашарди. Монтгомери ҳадеб уларни тинчлантироқчи бўлар, бироқ итлар питирлашларини қўйишмас эди.

Бу икки кимсанинг атрофларини сир билан ўраб-чирмашлари

менга қаттиқ таъсир қилди. Бир томондан бу, иккинчи томондан ниҳоятда таниш туюлаётган исм мени исканжага оларди: Моро... Лекин инсон хотираси шу қадар заифки, бу исмни қаерда, кимдан эшитганимни сира эслай олмасдим. Секин-аста хаёлим қирғоқ томонда кўринган ўраб-чирмалмиш гаройиб бедавога кўчди. У яшикни кўтарганча юриб келаркан, қадам олиш тарзи ва ҳатти-ҳаракати мени тамом лол қолдирган эди. Баъзи бирларининг менга ўгринча, олайиб тикилганларини айтмаганда, ҳанузгача биронтаси мен билан гаплашгани йўқ — беихтиёр шу эсимга келди ҳозир. Ажабо, улар қайси тилда сўзлашишар экан? Табиатан одамовига ўхшашарди, бироқ гапиришар, гапирганда ҳам жуда ғалати товушлар чиқариб гапиришарди. Қизиқ, уларга нима бўлган экан-а? Шу дақиқа туйқус кўз ўнгимда Монтгомерининг бадбуруш хизматкори нигоҳи гавдаланди.

Шуни ўйлаб турган эдим, бирдан унинг ўзи кириб келди. У энди оппоқ тоза устбош кийиб олган, қўлида қаҳва билан қайнатилган сабзовот қўйилган патнис кўтариб келганди. Илтифот билан эгилиб, патнисни олдимга қўяркан, кайфим учиб, ўрнимдан сакраб туриб кетишингта сал қолди.

Даҳшатдан ўтирган жойимда қотиб қолдим: майда қора тарам-тарам соchlари орасида... қулоққа кўзим тушган эди! У шундоққина тумшуғим тагида соч орасидан чиқиб турарди. Во ажаб, қулоқ учкур бўлиб, майин кулранг юнг билан қопланған эди!

— Сизга нонушта келтирдим, сэр, — деди у.

Тилим калимага келмас, унинг юзига бақрайган кўйи миқ этмай ўтирадим. У бурилиб, елкаси оша менга ғалати қараб қўйди-да, эшик томон юрди.

Унинг орқасидан кузатиб қоларканман, туйқус миямга "Моро ваҳшатлари" деган ибора келиб урилди. Ё "Мородан қақшаганлар" миди? Ҳа, эсладим, хаёл аталмиш учқур от ўн йил ортга қараб чопди: "Моро даҳшатлари". Бу ибора бир дақиқа миямда маънисиз сукут қилди ва зум ўтмай хаёлимдан жигарранг муқовали шапалоқдек китобча жилдига кўчди. Китобни даҳшатдан жунжикмай ўқиб бўлмас эди. Ҳаммаси бирин-сирин ёдимга туша бошлади. Бир пайтлар ўқилиб, унутилиб кетган китобча худди кечагидек кўз олдимда турарди. У пайтлар мен мўйлови эндинига сабза урган ўспирин, Моро эса, адашмасам, эллик ёшлар атрофидаги одам эди; у ўша кезлар фикрининг теранлиги, мулоҳазаларининг ўтқирилиги билан илм аҳли орасида обрў қозонганди. Бу ўша Моромикан? У қон қуийшининг бир неча янги усувлари тўғрисида ақлни шоширувчи мақолалар эълон қилган, бундан ташқари, тана ривожланишининг аномал ҳолатлари борасида ҳам беназир тадқиқотлар ўтказиб, тилга тушган эди. Аммо бирдан унинг ишлари чаппасига кетди ва

Моро Англияни тарк этишга мажбур бўлди. Бу аллақандай бир мухбир унинг кирдикорларини фош қилиб, матбуотда шов-шув кўтариш мақсадида тажрибаҳонасига лаборант ниқоби остида кириб чиққанидан кейин содир бўлди; фақат тасодиф туфайлигина — агар буни тасодиф дейиш жоиз бўлса — ўша мухбирнинг жирканч китобчasi машҳур бўлиб кетди. Бунга айни китобча босилиб чиққан куни Моронинг тажрибаҳонасидан қочган териси сидириб олинган, ўлар ҳолатдаги мажруҳ ит сабабчи бўлди.

Бу можаро айни талотўп бир даврга тўғри келиб қолди ва нуфузли ноширлардан бири, яна ҳам аниқроғи — ўша сохта лаборантнинг амакиваччаси жамоатчиликка мурожаат этди. Жамоатчиликнинг ўша пайт бу хилдаги тажриба ва изланишларга биринчи бор қарши чиқиши эмас эди. Доктор Моро мамлакатдан бадарға қилинди. Балки у бу жазога чиндан ҳам лойиқдир, бироқ казо-казо тадқиқотчиларнинг мазкур ҳодисага лоқайдлиги, аксарият маслакдош олимларнинг ундан қўлларини ювиб қўлтиқларига уриши ачинарли ҳол эди. Тўғри, мухбирнинг ёзиича, унинг айрим тажрибалари ваҳшийликдан ўзга нарса эмасди. Бўлак бундай тажриба ўтказишдан воз кечиб, жамоатчилик фикри билан ҳисоблашилса, олам гулистон эди, бироқ Моро ҳаёт-мамотини илм билан боғлаган фидойи олимлардек иш тутди, тажрибаларини афзал деб билди. У сўқабош, ишидан бошқа ташвиши ҳам йўқ эди-да...

Доктор Моро айнан шу одам эканига шубҳам қолмади. Ҳамма нарса шундан далолат берарди. Ўй орқасидаги ҳовлига юклар билан бирга ташиб келтирилган пума ва бошқа жониворлардан кўзланган мақсад нима эканини англаб етдим; ғалати, сезилар-сезилмас, ниҳоятда таниш туюлаётган ҳид ниманини эканини энди тушундим, одатда, касалхонанинг жарроҳлик бўлимидан келади шундай ҳид. Кутильмаганда девор ортидан пуманинг бўкириги ва итнинг жон аччиғида вангиллаши эшитилди.

Очигини айтганда, ўқимишли одам учун вивисекция\* сир тутишга арзигули даҳшатнинг ўзи йўқ. Ҳаёлимга лоп этиб Монтгомерининг учкур қулоқли, кўзи йилтироқ хизматкори келди. Рӯпарамда жимиirlаётган ям-яшил денгизга, енгил шамолда кўпириб ўйноқлаётган тўлқинларга тикилдим, кўз олдимдан кейинги кунларнинг гаройиб тафсилотлари бир-бир ўта бошлади.

Нима балога йўлиқдим-а ўзи? Кимсасиз оролдаги манави сирли қўналға, машҳур вивисекциячи, майибу мажруҳ бедаво кимсалар?..

\*Вивисекция — ҳайвонларни тириклайн ёриб текшириш. (Муҳар.)

## ПУМАНИНГ ҚИЧҚИРИФИ

Тушки соат бирлар эди, чамаси. Айқаш-үйқаш, шубҳали хаёлларимни Монтгомери бўлди. У хонага бадбуруш хизматкорини етаклаб кириб келди, қарол патнисда нон, озгина кўкат ва яна қандайдир егулик, бир шиша виски, кўзачада сув, учтадан стакан ҳамда пичоқ кўтариб олганди. Мен кўз қирим билан бу гаройиб мавжудотни қузатар, у ҳам менга ғалати қўzlари билан олазарак қараб турарди. Монтгомери мен билан бирга овқатланмоқчи эканини айтди, Моро келолмабди, иши ниҳоятда кўп эмиш.

— Моро? — дедим мен. — Бу ном менга таниш.

— Оббо, худо урди энди! — деди Монтгомери. — Эшак бўлмасам, ҳозир уни тилга олармидим?! Қандай қилиб хаёлимдан кўтарилидди... Ҳай, майли, нима бўлса — бўлди. Сиздан нимани сир туваётганимиз хийла ойдинлашгандир энди. Вискидан қуяйми?

— Йўқ, рахмат, мен ичмайман.

— Қани энди ўрнингизда мен бўлиб қолсам... Лекин бўлар иш бўлган, бўёғи синган. Бу ерларда сарсон бўлиб юришимга ҳам мана шу касофат сабабчи. Шу касофат ва бир туманли кеча. Моро мени олиб кетмоқчи эканини эшлитиб, теримга сифмай севинганим-чи. Ҳа, жуда ғалати ишлар бўлган...

— Монтгомери, — дея эшик ташқаридан ёпилиши билан унинг гапини бўлдим мен, — нега қаролингизнинг қулоқлари бундай учкур?

— Падарлаънат, — дея гўлдиради у ва оғзи тўла овқат, бир зум менга анграйиб тикилиб қолди. — Қулоқлари учкур?

— Ҳа, учкур, — дедим мен имкон қадар вазминлик билан, бироқ юрагим дукиллаб, — яна ҳаммаёғи жун.

У бамайлихотир вискини сувга аралашиборерди.

— Қулоқлари сочининг тагида кўринмаса керак, деб юардим...

— Мен буни шундоққина тумшуғим тагида энгashiб, қаҳвани столга қўяётганда кўрдим. Қўzlари ҳам ғалати, қоронғида ёнади.

Бошда саволимдан шошиб қолган Монтгомери энди ўзини анча тутиб олди.

— Ўзим ҳам ҳайрон бўлиб юардим, — деди у оҳиста, бироз дудуқланиб. — Қулоқларига нимадир бўлгандек туюларди. Кейин соchlари орасига олиб, яширишга уриниши... Айнан қандай кўринишда эди улар?

Монтгомерининг атайлаб ўзини билмасликка олаётганини сездим. Бироқ нима ҳам дердим, унга гапларинг ёлғон, деб айттолмайман-ку.

— Қулоқлари учкур, — дея такрорладим мен, — кичкина,

жун билан қопланган. Унинг ўзи ҳам жуда ғалати, бунақа мавжудотни умрим бино бўлиб биринчи кўришим.

Тош девор ортидан яна қандайдир ҳайвоннинг жон аччиғида ўкиргани эшитилди. Овоз шашти ва шиддатидан пума ўкираётганга ўхшарди. Монтгомери сесканиб кетди.

— Ҳм, ғалати, денг? — деди у.

— Қаердан топгансиз уни? — деб сўрадим мен.

— У... Сан Франсисковдан эди, шекилли. Нима десам экан, рост, у ҳақиқатда бедаво. Бунинг устига андак овсар ҳам. Лекин қаерданлигини аниқ айтольмайман. Сизга айтсам, унга жуда ўрганиб қолганман. Умуман, икковлон бир-биримизга жуда ўрганганимиз. Тушунмадим, унинг нимасига бунча ҳайрон бўласиз?

— У бу дунёнинг одамига сира ўхшамайди, ахир, — дедим мен. — Унда ғалати нимадир бордек... Мияси айниб қопти, деб ўйламанг-у, лекин у менга яқинлашди дегунча этим жунжикиб, авзойим бузила бошлайди. Ростини айтсам, у худди иблиснинг ўзгинаси...

Монтгомери, гапларимни тингларкан, овқат ейишдан тўхтади.

— Бўлмаган гап, — деди у. — Шу пайтгача сезмасмидим.

У шундай деб яна овқат ейишга тутинди.

— Қаранг-а, бирор марта ҳам миямга шунга ўхшаш фикр келмабди,— деди у овқат кавшаркан. — Чамаси, анави кемадагиларга ҳам шундай туюлган бўлса керак... Шўрликка кун беришмади-я, аблаҳлар!. Капитаннинг нима қилганини эса ўзингиз кўрдингиз...

Шу дам яна пуманинг ўкириғи янгради, бу гал аввалгидан ҳам аянчли ўкирди у жонивор. Монтгомери сўкинди. Мен эсам ундан қирғоқда кўрган одамларим ҳақида сўрашта жазм қилиб, оғиз жуфтладим. Бироқ шўрлик пума тинимсиз ўкириб, фарёд чекарди.

— Қирғоқдаги одамларингиз-чи, улар қайси ирқقا мансуб?

— деб сўрадим мен барибири.

— Зўр йигитлар-а? — деди у паришон, жонивор ўкиргани сари баттар қовогини уйиб.

Мен индамай қўя қолдим. Яна аввалгиларидан ҳам даҳшатлироқ ўкириқ янгради. Монтгомери менга маъюс кўқимтири кўзларини тикканча ўзига виски қўйди. У гап мавзуини ичкиликка буриб, айнан унинг шарофати билан ҳаётимни сақлаб қолганини исботлашга тутинди. Бу билан Монтгомери тирик қолганим учун ундан қарздор эканимни таъкидлаётгандек эди. Мен унинг гапларига паришон жавоб қайтарардим. Ниҳоят, нонушта қилиб бўлдик, қулоқлари учкир сўхта дастурхонни йигиштирди. Улар чиқиб кетишиди ва мен хонада яна ёлғиз қолдим. Нонушта пайти Монтгомери вивисекция қилинаётган пума овозидан безовталигини сездирмасликка хўп уринди, бироқ қўлидан келмади. Сўнг асаблари ниҳоятда бўшашиб кетганидан нолиди, мен бунга шубҳа билдириб ўтирамдим.

Бу ўкириқлар менинг ҳам асабимга тега бошлаганини сездим. Кун давомида улар кучайса кучайдики, асло пасаймади. Бошда бу шунчаки юрагимни эзаётган эди, лекин бора-бора тоқатим тоқ бўлди. Қўлимдаги Горацийнинг қайсиидир асари таржимасини бир четга отиб юбордим, муштларимни туғиб, лабимни қимтигандан хонада у ёқдан бу ёққа юра бошладим.

Сўнг кафтларим билан қулоқларимни маҳкам беркитиб олдим.

Аянчли ўкириқ борган сари кучаяр, сабр косамни тўлдириб бораарди, охири дод-вой шу даражага етдики, хонада чида бўтириб бўлмай қолди. Ташқарига, тиккага келиб қолган күннинг мудратувчи оташи бағрига отилдим, ҳамон қулфлөғли катта дарвоза олдидан ўтиб, тош девор ортига бурилдим.

Ўкириқ ташқаридаги яна ҳам кучлироқ жаранглар экан. Дунёи дуннинг бор уқубатлари шу ўкириқда мужассамдек тасаввур уйгонар эди. Ажабо, агар шу овозлар бўлмаса, қўшни хонада бирор азоб тортаётганини билсан ҳам бунчалик изтироб чекмасмидим, деб ўйладим (бу ўй ҳанузгача мени қийнаб келади). Азоб-уқубат овозда зоҳир бўлиб, асабни қақшатса, юрак ўртаниб кетаркан. Кўкда қуёш порлаб туришига, денгиздан эсаётган енгил шабада ям-яшил палма шохларини оҳиста тебратаетганига қарамай, токи тош девор билан ўралган уйдан олислаб кетмагунимча дунё остин-устиндек, ёвуз ва қонхўр арвоҳларга тўлиб-тошгандек туюлаверди.

## IX Б О Б

### ЎРМОНДАГИ ТЎҚНАШУВ

Мен уй орқасидаги тепаликни қоплаган қуюқ чакалакзор оралаб бошим оққан томонга қараб юрдим. Қадди расо гавжум дараҳтлар орасидан ўтиб қарасам, тепаликнинг нариги томонидан чиқиб қолибман. Тепалик этагида торгина сайҳонлик ястанган бўлиб, кичкинагина жилға оқиб ўтарди. Тўхтаб, у ёқ-бу ёққа қулоқ тутдим. Анча узаб кетган эканманми, ё ўрмоннинг қалинлигигами, тош девор томондан ҳеч қанақа овоз эшишилмасди. Атроф жимжит. Айни шу чоқ буталар орасидан қуён отилиб чиқди ва тепаликдан ғастга қараб чопқиласб кетди. Бироз нима қиласримни билмай иккиланиб турдим-да, ўрмон чеккасидан сояроқ бир жой топиб ўтирдим.

Теварак-атроф ниҳоятда жозибали эди. Четлари қалин ўт-ўлан билан қоплангани боис жилға кўзга ташланмас, фақат бир жойдагина сув сатҳи учбурчак тарзда йилтираб кўриниб турарди. Жилғанинг нариги ёғида, сийрак кўқимтири туман бағрида тўп-тўп қалин дараҳтлар, ер бағирлаб ўстган буталар кўзга ташланади, улар узра эса мусаффо кўқимтири осмон чараклайди. У ер-бу ерда оқ, қизил печаксимон гуллар ажиб товланади. Анча пайт қаршимдаги гўзал табиат манзараларидан кўз узолмай ўтирдим,

сўнг лоп этиб хаёлимда яна Монтгомерининг қароли, унинг галати сўхтаси жонланди. Кун ниҳоятда иссиқлигидан каллам жойида эмас, танам ҳам борган сари ҳолсизланиб, на мудраётганимни ва на уйғоқлигимни билардим.

Жилғанинг нариги ёғидан эшитилган буталар шитирлашидан ўзимга келганимда, билмадим, қанча вақт ўтган эди. Дастрлаб қирқулоқ ва қамишлар учининг тебранишидан бошқа ҳеч нарса сезилмади. Сўнг жилға ёқасида қандайдир мавжудот пайдо бўлди, айнан қандай мавжудот эди у — бир қарашда фарқлаёлмадим. У энгашиб сув ича бошлади. Фақат шундагина кўрдимки, мавжудот росмана одам, бироқ у... ҳайвон каби тўрт оёқлаб юрарди!

Эгнида кўкиш рангли либос, тана ва юз териси мис рангидек қизғиши, соchlари қоп-қора... Чамаси, бирдек гаройиб бедаволик барча оролликларга хосга ўхшайди. У сувни тили билан шалоплатиб ичаётгани шундоққина эшитилиб турарди.

Уни яхшироқ кўриш учун олдинга эгилганимни биламан, қўлим тошми-ей, кесакками-ей тегиб кетса бўладими. У енгил дўйирлаб пастга юмлади. Сув ичаётган кимса даст бошини кўтарди ва кўзларимиз илкис тўқнашди. У қаддини ростлаб, беўхшов қўли билан оғзини артганча менга тикилиб турарди. Тавба, унинг оёғи гавдасига нисбатан икки марта калта эди. Биз бир-биримизга хиёл шу асно ҳайрон тикилиб турдик. Кейин у шартта бурилди ва елкаси оша менга бир-икки ёв қараш қилиб, ўнг қўлдаги буталар ичига кириб кетди. Шоҳ ва баргларнинг шитирлаши анчагача эшитилиб турди. Узоқлашиб бораркан, у бошини буриб, менга қараб-қараб қўярди. Кўздан гойиб бўлгач ҳам хийла вақтгача қимир этмай, у кетган томонга бақрайиб ўтиридим. Танамда бояги мудроқдан асар ҳам қолмаган эди.

Орқамдан эшитилган товушдан чўчиб, ялт этиб ўша томонга қарадим, қўзим қирнинг қоқ тепасига этиб улгурган қуённинг ликкиллоқ оқиши думчасини илгади. Мен иргиб ўрнимдан турдим.

Чоштоҳ сокинлигига ҳайвонсифат мавжудотнинг пайдо бўлиши атроф кимсасиз эмаслигидан далолат берарди. Теваракка олазарак алангларканман, ёнимда қуролим ийқлигига афсусландим. Шунинг устига миямга ахир ҳозир кўрган одамим кўкимтири туслаги кийимга бурканган эди-ку, ёввойи бўлса кийим киярмиди, деган фикр келди. Жуда унақа бадфеъл эмасдир-ов, менга шундай туюлди шекилли, ўзимизга ўхшаган ювош одам бўлса керак, деб ўзимни ўзим овутдим.

Лекин барibir унинг пайдо бўлиши мени анча ташвишга солиб қўйган эди. Қияликдан чап қўлга қараб юрдим, тик ўсган даражатлар оралаб атрофга аланглаганча кета бошладим. Қизиқ, нега бу одам тўрт оёқлаб юраркан, нега у сувни тили билан шалоплатиб ичди? Алҳол, қулогимга яна ҳайвоннинг ўкириги эшитилди, мен пума бўлса керак, деб ўйлаб, терс бурилдим ва

қарама-қарши томонга қараб кета бошладим. Йўл мени жилғага боштаб келди ва мен уни кечиб ўтиб, рўпарадаги чакалакзор ичига шўнгидим.

Бирдан йўлим устида ғалати қип-қизил доғга қўзим тушиб, этим жимирилаб кетди, яқин келиб қарасам, жуда антиқа қўзиқорин экан, худди япроқсимон замбуруғ дейсиз, қўлимни теккизишим билан суюлиб, шилимшиқ модда ҳосил қилди-қўйди. Сал юриб, шохлари ҳар томонга тарвақайлаган қирққулоқлар панасида нохуш манзара гувоҳи бўлдим: ерда қуён ўлиги чўзилиб ётар, мурда устида ялтироқ пашшалар вижирлашарди. Қуён танаси ҳали совиб улгурмаган, боши сапчадек узид олинган эди. Ҳар ёққа сацраган қонни кўриб анграйиб қолдим. Во дариг, бу ерда оролнинг бир нотавон келгинди бандаси жонига қасд қилинган эди!

Жасадда бошқа ҳеч қандай ёвузлик белгиси кўринмас, афтидан, қуён қўлга тушган-у, ўша лаҳзадаёқ куни битган эди. Унинг жажжигина момиқ жисмига синчиклаб тикиларканман, ажабо, буни ким қилди экан, деб ҳайрон бўлардим. Анави сув ичган одамнинг совуқ турқини кўрган пайтим миямга ўрнашган қўрқув яна ҳам кучайди. Бу ерда, манавинақанги нотайин одамлар орасида яшаш нақадар хавфли эканини ҳис этдим. Ўрмон кўзимга энди бошқача кўрина бошлади. Ҳар бир қоронги кўланка кўланка эмас, тузоқдек, ҳар бир шитир эса таҳдид ва хавф-хатардек туюларди. Худди кўзга кўринмас мавжудотлар мени ҳар қадамда таъқиб этишा�ётгандек эди.

Мен орқага қайтишга қарор қилдим. Шартта бурилдим-да, шох-шаббалар оралаб жон-жаҳдим билан, худди жазаваси тутган одамдек олға интилдим, ишқилиб, омон-эсон очиқ жойга чиқиб олсан бас, дердим ўзимга ўзим нуқул.

Катта бир ялангликка чиқаверишда тўхтадим. У ер аслида яланглик эмас, дарахтлари кесиб олинган майдон эди; бироқ майда ниҳоллар аллақачон уни эгаллаб, ортидан яна қалин дарахтзор бошланиб кетган, шохларга илашиб чирмовуқлар ўсиб ётар, ер қуюқ қўзиқорин, гулдор замбуруғлар билан қопланганди. Рўпарада, ийқилган каттакон дарахтнинг замбуруғ қоплаган мўрт танаси устида яқинлашаётганимни сезмай, оёқларини чалиштирганча уч нафар ғалати одамсимон мавжудот ўтиради. Улардан бири аниқ аёл, иккитаси эса эркак эди. Белларидан пастини беркитган қизгиш матони айтмаганда, улар қип яланғоч эдилар. Оролдаги мен кўрган бошқа ёввойи одамлардан фарқли ўлароқ, уларнинг териси хира қизғиши тусда эди. Юзлари семиз, ияклари йўқ, пешоналари олдинга бўртиб чиқсан, соchlари сийрак, дағал. Умрим бино бўлиб бунақа ҳайвонсифат мавжудотларни учратмагандим.

Улар ўзаро гаплашишар, аниқроғи, улардан бири куйиниб қолган иккитасига ниманидир тушунтирас, учовлон сухбатга шу қадар берилиб кетишгандики, ҳатто қадам товушимни

эшитишмасди ҳам. Уларнинг бош ва елкалари бир маромда тебранарди. Гапираётган мавжудотнинг оғзидан сўзлар дўриллаб, узуқ-юлуқ чиқар, аниқ эшитаётганимга қарамай, ҳеч балони тушуниб бўлмасди. Назаримда, у шунчаки бемаъни сафсата сатаётгандек эди. Пича ўтиб овози чўзиқ тус олди ва у қўлларини силкитиб, ўрнидан туриб кетди.

Қолган икковлон ҳам ўрнидан қўзғалишиди ва қўлларини силкитиб, гавдаларини овоз оҳангига мос тебратганча унга жўр бўлишди. Уларнинг оёқлари ҳаддан ташқари калта, товонлари гайриоддий тарзда ингичка эди. Учовлон энди оёқларини тапиллатиб, қўлларини силкитганча оҳиста айланишарди; уларнинг бир маромдаги тез айтишувида ўзига хос мусиқий жарангдорлик бўлиб, "алула"ми-ей, "балула"ми-ей деган сўзлар тез-тез такрорланарди. Уларнинг кўзлари ғалати чақнар, бадбуруш юзлари қувончдан порларди. Лабсиз даҳналаридан эса сўлак оқиб тушмоқда эди.

Уларнинг беўхшов қилиқларини жим туриб кузатарканман, шу пайтгача менга тинчлик бермаётган ҳис-туйғуларим боисини анлагандек бўлдим: ўз сирли расм-русумлари билан машғул бу уч мавжудотнинг фақат суратигина одамни эслатар, бироқ сийратида ҳайвонга хос қандайдир уйқашлик зоҳир эди. Улар қиёфалари одамга ўхшагани, белидан пастини бир парча латта билан яширганлари, қўпол инсоний гавда тузилишларидан қатъи назар, юз ифодалари, хатти-ҳаракатлари, хуллас, бутун туриштурмушларида қандайдир хазм қилиб бўлмас, хусусан, ҷўчқага хос, кўзга яққол ташланувчи ҳайвоний муҳр мужассам эди.

Қаршимдаги манзарага анграйиб тикиларканман, миямни ҳар хил даҳшатли саволлар банд этарди. Учовлон эса энди бири олиб, бири қўйиб осмонга сапчир, чинқирав, ҳурилларди. Шу дам улардан бири сирпаниб кетди, бироқ йиқилмай, тўрт оёқлаб туриб қолди ва дарров ўзини ўнглади. Шу йилт этмиш ҳайвоний туйғунинг ўзиёқ уларнинг бор асл моҳиятини акс эттиради.

Имкон қадар товуш чиқармасликка уриниб, оҳиста ортимга бурилдим, шоҳ қисирласа ёки барг шитирлагудек бўлса ҳам сезиб қолишлари турган гап эди. Юрак ҳовучлаб ўзимни чакалакзорга урдим. Кўнглим жойига тушиб, бамайлихотир юра бошлагунимча талай вақт ўтди.

Шу дамда ягона дарду фикрим анави тавиялардан тезроқ узоқлашиш эди, олга интиларканман, дараҳтлар оралаб кетган кўз илғамас сўқмоққа қандай чиқиб қолганимни ҳам сезмабман. Торгина ялангликни кесиб ўтарканман, дараҳтлар орасида, чамаси, ўттиз одимча нарида мен билан тенгма-тенг қадам ташлаб келаётган беўхшов оёқларни илғаб, эсхонам чиқиб кетди. Унинг белидан юқориси қалин чирмовуқ ва барглар ортида кўринмасди. У мени кўриб қолмасин, деб дарров тўхтадим. Тўхтшим ҳамон беўхшов оёқлар ҳам таққа тўхтади. Шу қадар

ўтакам ёрилдики, оёгимни қўлимга олиб қочиб беришимга сал қолди.

Қалашиб ётган шох-шаббалар орасидан аста қараб, жилғадан сув ичган маҳлуқнинг боши ва гавдасини дарров танидим. У ҳам менга тикилиб турар, ғира-шира қоронғиликда кўзларидан яшил ўт чақнаётгандек туюларди, бошини шартта бурган эди, ўт ўчди-қолди. У бир дақиқа қимир этмай турди-да, сўнг товуш чиқармай чопиб, яшил бутазорга кириб кетди. Кўз очиб юмгунча шох-шаббалар ортида ғойиб бўлди. У кўзга кўринмасди, бироқ сезгим унинг кетмаганини, шу ўртада яшириниб, мени кузатаётганини айтиб турарди.

Ажабо, одамми у ёки ҳайвон? Мендан нима истайди? Мен бечора бутунлай қуролсизман, ҳатто қўлимда калтак ҳам йўқ. Қочиш эса бефойда... Тўхта, нима бўлганда ҳам у менга ҳужум қилишга ботинмади-ку. Тишларимни маҳкам бир-бирига ботириб, унинг устига юрдим. Қўрқувдан этим увишаётган эса-да, билдиримасликка тиришардим. Оппоқ гуллаган йўғон новдалар орасидан ўтиб, унинг шундоққина рўпарада, йигирма қадамча нарида менга елкаси оша ҳадиксираб қараб турганини кўрдим. Кўзларига тик боқиб, яна бир қадам қўйдим.

— Кимсан? — деб сўрадим аста.

У ҳам мендан кўзини олиб қочмасликка уринарди.

— Керак эмас, — деди у туйқус, сўнг бурилди-да, бир сакраб ўзини буталар панасиға олди. Тўхтаб, яна менга тикилди. Дараҳтлар кўланкасида унинг кўзлари йилтилларди.

Ўпкам оғзимга келиб тиқилди, энди хатарга тик боқиб боришдан ўзга чорам қолмаган эди, начора, унинг устига шарт-шурт бостириб боравердим. У бурилиб, яна ўзини панага олди. Чамаси, кўзлари яна йилтиллагандек туюлди.

Кун кеч бўлиб қолгани, ўрмонда юриш хавфли экани энди хаёлимга келди. Қуёш ҳозиргина ботган, тез тушадиган тропик оқшом осмонни машриқ томондан аллақачон ишғол этиб, тун элчиси — дастлабки парвона бошим узра товушсиз қанот қоқарди. Бирор хавф-хатар юз бермасидан дарҳол ўрмонни тарқ этмоғим лозим эди.

Ўзи-ку, ўша кони азоб ҳужрага қайтиб боришни ўйлаш ҳам, азоб, бироқ кечаси бу ёқларда қолиш ҳам бўлмайди, тунда ҳар бало юз бериши мумкин. Яна бир бор анави бедаво яширинган кўкимтирик оқшом пардасига қарадим ва ортимга бурилиб, пастга, жилғага қараб юрдим. Адашмасам, келган томонимга қараб кетаётган эдим.

Юз берган воқеалардан бошим қотиб, тез-тез қадам ташлаб кетиб борарканман, яккам-дуккам дараҳтлар ўсган яланглиқдан чиқиб қолдим. Қуёш ботиши арафасидаги мусаффо тиниқлик аллақачон ғира-шира қоронғиликка жой бўшатган, оқшом борган сари қуюқлашар, бирин-сирин юлдузлар чарақлаб чиқмоқда эди;

кундузи яшил рангда товланувчи оралиқлар, даражат ўсмаган очиқ жойлар ҳозир қорайиб, сирли кўринарди.

Мен олға интилардим. Атрофни зулумот қоплаган. Ойдин шуъласида даражат учлари тиккайиб кўринади, ердаги бор нарса эса айқаш-уйқаш, фарқлаб бўлмас ҳолда бир-бираига қоришган. Бора-бора даражатлар сийраклашиб, бутазор бошланди. Кейин у оқиш қум ила қопланмиш кимсасиз яланглик билан алмашди, сўнг эса яна чакалакзор кўндаланг бўлди.

Мени ўнг томонимдан келаётган тинимсиз шитир-шитир ташвишга соларди. Олдинига, шундай туюлаётгандир, деб ўйлаб тўхтадим — даражатларнинг тунги шабадада оҳиста тебранишидан бошқа ҳеч нарса эшитилмади. Бироқ қадам ташладим дегунча яна кимнингдир оёқ товуши жўр бўлди.

Мен чакалакзорни четлаб, очиқ жойлардан юришга тиришдим, аҳён-аҳёнда шартта бурилиб, мени ўғринча таъқиб этаётган шарпани — агар у чиндан ҳам бор бўлса — фош этишга, уни гафлатда қолдиришга уринардим. Жами уринишларим беҳуда кетаётган эса-да, кимдир изма-из келяпти, деган ўй барibir ич-этимни тимдаларди. Мен қадамимни тезлатдим ва ҳаш-пащ дегунча унчалик баланд бўлмаган тепаликка етдим, ундан ошиб ўтгач, тўхтаб, ортимга ўгирилдим ва келган томонимга синчиклаб тикилдим. Қорамтири уфқда ҳозиргина мен ошиб ўтган тепалик яққол кўриниб турарди.

Ҳеч қанча ўтмай тепалик устида хира кўланка акс этди, акс этди-ю, кўздан йўқолди. Танаси қизғиш мухолифим изма-из келаётганига заррача шубҳам қолмади. Устига устак, йўлдан ҳам адашганга ўхшардим.

Нима қиласимни билмай, бошим қотган кўйи олдинга шошилдим. Шарпа ҳамон мени ўғринча таъқиб этарди. У худди мени даф қилишга журъат этолмас ёки қулай фурсат пойларди. Мен имкон қадар ўрмон четидан юришга уринардим. Юриб-юриб таққа тўхтайман-да, теваракка аста қулоқ тутаман. Кўп ўтмай ўзимни таъқиб этаётган рақибим мендан зерикди, ким билсин, балки бундай рақибининг ўзи бўлмагандир, мен меровсираб шундай ўйлагандирман, деб ишонтира бошладим. Ниҳоят, денгизнинг шовуллаши эшитилди. Қадамим нақадар тезлашганини билсангиз эди, мен деярли чопиб борардим, туйқус орқамда кимдир қаттиқ қоқилгандек бўлди.

Шартта ўгирилиб, ортимда қорайиб турган даражатларга тикилдим. Бир қора кўланка иккинчиси билан қўшилгандек туюлди. Қўрқувдан титраганча жиссим қулоқка айланиб тингладим, бироқ чаккамдаги қон томиримнинг дук-дук тепишидан бошқа нарса эшитилмади. Асабим издан чиқсан, шу боис хаёл олиб қочяпти, дея ўзимни овутиб, денгиз шовуллаётган томонга қараб ошиқдим.

Озгина юриб-юрмасимдан ўрмон сийраклашди ва мен бўтана сув ювиб турган пастқам яйдоқ бурунга чиқдим. Тун сокин ва

мусаффо, дengизнинг осуда сиртида осмондаги чаман юлдузлар шуъласи акс этиб жимишлайди. Сал нарида, яккам-дуккем тош ва қоялар чиқиб турган ерда сув унча ялтирамайди. Ғарб томонда туркум юлдузлар якка-якка оқшом юлдузларининг сарғиш жилоси билан қоришиб акс этади. Соҳил мен турган ердан шарқ томонга чўзилган, ғарбдан уни бурун тўсиб турибди. Демак, дея тусмолладим мен, Моронинг уйи яна ҳам ғарброқда бўлиши керак.

Орқамда шох қисирлаб синди ва шитирлаган товуш эшитилди. Бурилиб, қорайиб кўринаётган дараҳтзорга синчков термулдим. Тавба, ё кўзим ҳеч балони илғамасди, ёки қўрқянга қўш кўринади, деганлариdek, ҳамма нарса менга таҳдид солаётганга ўхшаб туюларди. Ҳар бир кўланка қоронгига қандайдир гайриоддий мавжудот шамойилида кўринар, худди ҳозир у менга ташланиб қоладигандек эди. Шу асно бир зум қотиб турдим, сўнг дараҳтлардан кўз узмай, бурунни кесиб ўтиши мақсадида ғарб томонга йўналдим. Жойимдан қўзғалишимни биламан, кўланкалардан бирига жон кириб, кетимдан эргашди.

Юрагим қаттиқ дукиллаб ура кетди. Бахтимга, кўп ўтмай ғарб томонда кенг кўрфаз кўринди ва мен яна жойимда таққа қотдим. Сассиз кўланка ҳам менга ўн қадамча етмай тўхтади. Олисда, кўрфаз этагида жимитдек ёруғ нуқта мильтиллаб кўзга ташланар, кулранг қўмлоқ соҳил эса хира юлдузлар нурида унчалик билинмасди. Мильтилаётган нур билан орамиз чамаси икки миљча келарди. Соҳилга етиш учун авани даҳшатли кўланкаларга тўла ўрмонни кесиб ўтиб, бута ва чакалакзорлар ўсиб ётган тепаликдан пастга тушишим лозим эди.

Мени таъқиб этаётган шарпа энди аниқ кўринарди. У ҳайвон эмас, чунки икки оёғида тик турарди. Унга гапирмоқ учун оғиз жуфтлашимни биламан, титроқдан бўғзимга бир нарса келиб тиқилди. Ўзимни зўрлаб бўлса ҳам бир амаллаб қичқирдим:

— Ким у?

Бироқ ҳеч қандай жавоб янграмади. Мен олға бир қадам ташладим. У ўрнидан жилмади, бироқ тараддуллангандек бўлди. Айни шу дамда мен тошга қоқилиб кетдим.

Бу калламда ажойиб бир фикр туғдирди. Қора кўланкадан кўзимни узмай, энгашиб, ердан каттагина харсанг тош кўтардим. У буни кўриб, худди ит каби дарҳол ўзини четга олди ва қоронгига кўздан ғойиб бўлди. Мактабда ўқиб юрган пайтимиз баҳайбат итларга қарши ишлатган ҳийламиз эсимга тушиб, тошни дастрўмолимга ўрадим-да, кафтимга айлантириб ўраб олдим. Мендан анча нарида нимадир шитирлади, афтидан, рақибим чекинаётган эди. Кутилмаганда қатъиятим сўниб, аъзойи баданим бўшашди-қолди. Рақибим жуфтакни ростлаётган, мен эсам,

қўлимда тош, дағ-дағ титрар, танам тердан шалаббо бўлиб кетганди.

Токи ўзимга келиб, ўрмон билан чакалакзорни кесиб ўтиб, буруннинг нариги томонига тушгунимча анча вақт ўтди. Мен юрмасдим, балки жон ҳовучлаб югурадим, энди чакалакзордан ўтиб, қўмлоқ соҳилга чиқдим, деганимда ортимдан яна кимнингдир шатир-шутур қилиб чопиб келаётгани эшилса бўладими.

Қўрқувдан тамомила гангид, соҳил бўйлаб ура қочдим. Ортимдан яланг оёқларнинг тапир-тупури эшитилли. Мен жонҳолатда дод солиб, яна ҳам илдамроқ чопа кетдим. Нафасим бўғзимга тиқилиб қочиб борарканман, чўчитиб юбордим, шекилли, қўёнга тўртта келувчи аллақандай қорамтири махлуқлар сакраганча ўзларини чакалакзорга уришди. Токи кўзим тирик экан, бу даҳшатли таъқибни унугомасам керак. Мен сув ёқалаб жонҳолатда қочиб борар, ортимдан етиб қолган рақибимнинг оёқлари сувга тушиб шалопларди. Милтиллоқ ёғду намунча узоқда-я, намунча узоқда?! Атроф қоп-коронги, жимжит. Фақат сувнинг шалоплаши — менга етиб олишига сал қолган оёқларнинг сувни шалоплатиши эшитилади, холос. Ўпкам оғзимга келиб тиқилган, охирги пайтлар анча ҳолсизланиб қолганимдан нафасим қисилиб, базур нафас олардим, биқиним худди пичоқ санчгандек санчарди. Сездимки, тош деворга етиб улгурмасимдан орқамдаги махлуқ менга етиб олади. Шунда нафасим тиқилиб турганига ҳам қарамай, уни яқинроқ келтириб даст бурилдим-да, кучим борича қулочкашлаб туширдим. Тош дастрўмолдан худди палахмондан узилгандек отилиб кетди.

Унга қараб бурилган вақтим тўрт оёқлаб қувиб келаётган махлуқ шошилиб икки оёқда туриб қолди ва тош нақ унинг чап чаккасига тарсиллаб тегди. Ҳайвонсифат одам бир қалқиб тушди ва мени қўллари билан итариб, гандираклаганча қумга ағнади, юзи тўпла-тўғри сувга бориб тушди. Шу бўйи қимир этмай қолди.

Қорамтири мавжудотга яқин бориб қарашга юрагим дов бермасди. У оҳиста шовуллаётган сув бўйида, сокин юлдузлар шуъласи остида қолди, мен эса уни анча наридан ёнлаб ўтиб, милтиллаб кўринаётган ёғду сари кетдим. Пуманинг аянчли ўқиригини эшитиб, ниҳоят, енгил тортдим, мени мўъжизавор оролда дайдишга мажбур этган айнан шу овоз эди. Ўлгудек ҳолдан тойган эсам-да, сўнгти кучимни йигиб, милтиллаб турган ёруғлик томон чопдим. Қоронғида кимдир мени ҳадеб чақираётганга ўхшарди.

## ОДАМЗОД ФАРЁДИ

Үйга яқинлашарканман, чироқ ёғдуси мен турган хонанинг очиқ эшигидан тараляётганини кўрдим; яқингинадан, қоронгилик бағридан Монтгомерининг овози келди:

— Пренди!

Мен югуришда давом этдим. Монтгомери тағин чақирди. Унга жавобан зўрга "Ҳа", дея овоз беролдим, холос, гандираклай-гандираклай аранг унинг олдига этиб келдим.

— Қаерларда юрибсиз? — деди у, юзимга ёруғ тузукроқ тушсин учун қўли билан мени эшикдан тушаётган чироқ нури сари итариб. — Биз икковлон ишга шу қадар берилиб кетибмизки, сизни бутунлай ёдимиздан чиқарибмиз. Эслаб, яrim соатдан бери қидириб юрибмиз.

У мени хонага етаклаб кириб, оромкурсига ўтқизди. Аńча вақт чироқ нурида кўзимни очолмай ўтиридим.

— Бизга бир оғиз индамай, оролни айлангани чиқиб кетибсиз-да, — деди у. — Шунақаям бўладими, роса хавотир олдим-ку. Ие... бу нимаси?..

Қолган-қутган кучим ҳам мени тарқ этиб, бошим кўксимга шилқ этиб тушди. У шоша-пиша менга бренди ичирди.

— Худо ҳаққи, эшикни беркитинг! — дея илтижо қилдим мен.

— Бу дейман, хушсурат мезбонларимиздан бирортасини учратиб қолганга ўхшайсиз-ку? — деди Монтгомери.

Сўнг илдам бориб эшикни беркитди-да, яна мен томон ўтирилди. Аввалига ҳеч нарса сўрамади, фақат менга сув билан тағин озгина бренди ичирди, мажбуrlаб овқат едириди. Мен тамомила карахт эдим. Бир пайт у тилга кириб, аввал мени огоҳлантириб қўйишини унуганини маълум қилди, сўнг уйдан қачон чиқиб кетганим ва нималарни кўрганимни сўраб-сuriштира бошлади. Мен унинг саволларига ўзимни зўрлаб, узуқ-юлук жавоб қайтарардим.

— Ахир бу нима деган нарса? — дедим мен ниҳоят титраб-қақшаб.

— Ваҳима қилишга арзимайди, — деб жавоб берди Монтгомери. — Менимча, сизга бугунга шунинг ўзи ҳам етади.

Шу чоқ яна пуманинг юракни ўртовчи ўкириғи эшитилди. Монтгомери гудраниб сўқинди.

— Худо урсин, агар бу ер расволикда анави мушукбозор Гауэр стритдан фарқ қилса!

— Монтгомери, — дедим мен, — орқамдан қувлаган нима ўзи? Ҳайвонми ёки одам?

— Агар сиз ҳозироқ ётиб ухламасангиз, эрталабгача бутунлай ақлдан озасиз, — деди у.

Ўрнимдан туриб, унга юзма-юз келдим.

— Анави изимдан қувлаган маҳлуқ нима? — дея саволимни тақорладим.

У кўзимга тик қараб, лабини бурди. Пича бурун чақнаб турган нигоҳи бирдан хира тортди.

— Гапларингизга қараганда, у арвоҳ бўлса керак.

Унинг бу гапидан бир ғазабим қўзиди, лекин қандай қўзиган бўлса, шундай тез сўнди ва мен ўзимни яна оромкурсига ташлаб, бошимни кафтларим орасига олдим-да, маҳкам сиқдим. Пума тагин ўкиришини бошлади.

Монтгомери орқамдан яқин келиб, қўлини елкамга қўйди.

— Менга қаранг, Прендиқ, — деди, — сизнинг бу расво оролга келиб қолишингизга мен айбор эмасман. Кейин, оғайни, бу ер жуда сиз ўйлаганчалик даҳшатнинг уяси эмас. Фақат асабингиз анча толиқкан. Ўйқу дори берсан, ичасизми? Бу... ҳали-бери тугамайди, яна уч-тўрт соат давом этади. Ётиб, ухланг! Маслаҳатим шу, акс ҳолда ўзингизга ўзингиз жабр қилган бўласиз. Кейин бир нарса бўлса, айбга буюрмайсиз.

Мен лом-мим демадим. Энгашиб, юзимни кафтларим билан беркитиб олдим. У чиқиб кетди ва бир оздаи сўнг кичкинагина шишида қандайдир қорамтири суюқлик кўтариб кирди. Шишини менга узатди. Мен доридан озроқ ичдим, кейин у тўр беланчакка чиқиб ётишимга кўмаклашди.

Ўйқудан кўз очганимда кун аллақачон ёйилиб кетган эди. Анча вақт қимирилмай шифтга термулиб ётдим. Шифтга ташланган тўсинлар кема ёғочидан экани кўриниб турарди. Ўгирилиб, стол устида нонуштам тайёр турганини кўрдим. Қорним очганини ҳис этиб, секин беланчакдан тушмоқчи бўлгандим, оғирлигим босиб гурсиллаб ағанадим. Баҳтимга, полга тиззалаб, қўлларим билан тушдим ва бир амаллаб оёққа туриб олдим.

Сўнг нонуштага ўтирдим. Бошим зилдай оғир, кечак юз берган воқеалар миямда гувиллаб чарх уради. Ойнасиз деразадан роҳатбахш тонгги шабада урар, овқатга қўшилиб, танга бир олам ҳузур бахш этарди. Бир вақт орқамда ичкари ҳовлига қараган эшик шарақлаб очилди ва Монтгомерининг юзи кўринди.

— Қалай, тузуммисиз энди? — деди у. — Иш ниҳоятда кўп, бош қашлагани ҳам вақт йўқ.

Шундай деб у яна эшикни ёпди, бироқ қулфлашни ёдидан чиқарди.

Шу чоқ кўз олдимга беихтиёр унинг кечаги қиёфаси келди ва юз берган воқеалар хаёлимда қайта тақорлангандек бўлди. Ўша даҳшатлар кўз олдимдан ўтиб турган эдики, яна қулоғимга бақириқ эшитилди. Бироқ бу пуманинг овози эмасди.

Оғзимга олиб бораётган луқмам ҳавода қотиб, атрофга аста

қулоқ тутдим. Жимжитлик, фақат тонгти шабада оҳиста шивирлайди, холос. Менга шундай туюлди-ёв, деган фикрга келдим.

Анча вақт шу алфозда жим ўтиридим, сўнг яна овқатланишга тутиндим, бироқ қулогим динг эди. Сал вақт ўтиб-ўтмай, яна паст, жонсиз ингроқ эшитилди. Мен ўтирган жойимда қотдим. Бу товуш мени шу дамгача девор ортидан эшитилган барча аянчли ўкириклардан ҳам ортиқроқ ҳайратга солди. Хато қилаётган бўлишим сира мумкин эмасди, элас-элас қулоққа чалинаётган паст, титроқ товуш нималигини аниқ сезиб турардим: бу ора-сира узук-юлуқ фарёдлар билан бўлинниб турган ингроқ эди! Ба у аниқ ҳайвонники эмас. Овоз соҳиби — ит чидамас азобларга тириклийин маҳкум этилган одам боласи, инсон!

Бунга ишончим комил эди, иргиб ўрнимдан турдим-да, уч ҳатлашда бориб, ҳовлига қараган ичкари эшикни ланг очиб юбордим.

— Прендиқ, тўхтанг! — дея йўлимни тўёди туйқус пайдо бўлган Монтгомери.

Чўчиб кетган итлар ириллаб, вовуллашди. Рўпарада турган жом тўла қорамтири, тўқ қизил қон эди. Димогимга карбол ишқорининг ўзига хос чучмал ҳиди гуп этиб урилди. Очиқ эшикдан гира-шира қоронғиликда дастгоҳга маҳкам чандиб боғланган ҳаммаёғи қон, бошдан оёқ тилиб ташланган ва бинтланган аллақандай жонзор кўзга ташланарди. Ҳаш-паш дегунча кекса Моронинг оқ сочли, баҳайбат калласи ҳамма нарсани тўёди.

У кела солиб қон юқи қўли билан елкамдан чангллади ва ёш боладек бир силтаб кўтариб, ичкарига итқитди. Полга чалқанчасига гупиллаб тушдим. Эшик қарс этиб ёпилиб, Моронинг дарғазаб юзи кўздан йўқолди. Сўнг эшик қулфининг шарақлаши ва Монтгомерининг уни юпаттани эшитилди.

— Ҳаёт-мамотимни тиккан ишимни барбод этай деди-я, — деб айтди Моро.

— У буни тушунармиди, — деди Монтгомери ва кетидан яна нималардир деб минғирлади, бироқ бу менга эшитилмади.

— Вақтим бормиди менинг бунга ҳозир? — дея тўнғиллади Моро.

Қолган гап-сўзларни уқмадим. Базур ўнгланиб, оёққа турдим. Аъзойи баданим қалтирас, миям алмойи-алжойи шубҳалардан ғовлаб кетган эди. Одамни вивисекция қилиш?! Кўз кўриб, қулоқ эшиитмаган даҳшат-ку, бу! Ушбу фикр хаёлимда чақмоқдай чақнади. Шу баробар туманли маҳобат ҳукмрон миямга беихтиёр ўзимни ҳам бир кунмас бир кун ана шундай аянчли қисмат кутмоқда, деган ўй урилди.

## Х I Б О Б

### ОДАМ ИЗИДАН ОВ

Ташқари эшик очиқлигини ўйлашим ҳамон миямга бирдан қочсам, балки қутулиб қоларман, деган аҳмоқона фикр келди. Моронинг одам устида вивисекция тажрибаси ўтказаётганига энди заррача шубҳам қолмаган эди. Бу ерга қадам қўйиб, Моро деган номни эшитибманки, оролликларнинг ғайриоддий тарзда ҳайвонсифатлиги унинг қабиҳ тажрибалари билан боғлиқ бўлиши керак, деган ўй миямдан кетмасди; энди бунинг ҳаммасини ўз кўзим билан кўриб, ишонч ҳосил қилдим. Унинг қон алмаштириш борасидаги илмий иши беихтиёр хаёлимга келди. Шубҳасиз, мен бу ерда кўрган мавжудотлар қабиҳона тажрибалар қурбони эди.

Анави абллаҳлар мени бир бало қилиб бу ерда олиб қолишиб, аввал бошда ишонч билдириб, лаққиллатишади, сўнгра бошимга дўзаҳ азобини солиб, ўласи қилиб қиймалаб, энг разил пасткашликка дучор этишади — оролдаги тайнин-тутуриғи йўқ ҳайвонсифат одамлар подасига қўйиб юборишади. Қўлга илинарли бирор қурол илинжида хонанинг у ёқ-бу ёғига кўз югуртиридим. Ҳеч бало йўқ. Туйқус, билмадим, қаердан куч кирди, оромкурсини шартта тўнтардим-да, четидан маҳкам босиб, бир оёғини суғуриб олдим. Шундай бўлдики, унга қўшилиб михи ҳам суғурилиб чиқди, у ингичка таёқчани анча ваҳимали қўрсатарди. Шу дам ташқаридан эшикка яқинлашашётган қадам товушлари эшитилди, кутиб ўтирамай, эшикни шартта бориб очдим — остоноада Монтгомери турарди. Шубҳасиз, у эшикни қулфлагани келган эди.

Қўлимдаги михли таёқни ҳаволатиб, унинг башарасини мўлжаллаб солдим, аммо у чап беришга улгурди. Бир дақиқа шошиб қолдим, сўнгра бурилиб, тош девор бурчагига қараб чопдим.

— Қанақа одамсиз-а, ўзи, Прендиқ? — деди у ҳайратомуз.  
— Жинни-пинни бўлгандимисиз?

Агар бир дақиқа кечикканимда, у эшикни устимдан қулфлаган ва тўрга тушган қуёндек тақдирга тан беришдан бошқа иложим қолмаган бўларди, дея ўйлардим мен ҳамон. У бирпасда кетимда пайдо бўлди ва яна:

— Прендиқ! — деб чақирди.

У орқамдан чопар, тинимсиз нималардир деб бақираарди.

Бу сафар мен довдираб, кечаги эмас, унга тескари — шимоли шарқ томонга қараб қочиб бораардим. Қирғоқ бўйлаб ҳаллослаб чопиб борараканман, бир вақт елкам оша ортимга ўгирилиб қарасам, Монтгомерига анави хизматкори ҳам қўшилиб қолибди. Жон-жаҳдим билан тепалик сари ўрладим, сўнг шарқ томонга бурилиб, иккала ёғи чакалакзор тошлоқ дарага чиқдим. Шу алфоз бир миляга яқин йўл босдим, кўксим харсиллаб қисилар,

қулогимга юрагимнинг дуккабад уриши аниқ эшилди. Ортимда Монтгомери ва хизматкорининг қадам томони тарзи, эшитилмаётганига тўла ишонч ҳосил қилгач, тамоми ҳолсилиниб, шартта орқага, назаримда, қирғоқ томонга бурилдим ва эми бор-э, деб қамишлар соясига ташладим.

У ерда қимиirlашга ҳам, кейин қандай иш тутишни ўйнишга ҳам юрагим бетламай, узоқ ётдим. Теграмда кимсасиз булдиқ офтобшувоқда мудрар, фақат чивинларнинг тинисиз гингиллашигина эшитиларди. Ён томонимдан кишини алдаб, кўзини илинтирувчи шилдираган товуш келди, бу оҳиста қирғозка урилаётган тўлқин овози эди.

Бир соатлар чамаси ўтгач, узоқда, шимол томонда Монтгомерининг овози қулоққа чалинди, у мени чақиравди. Даржол сергакланиб, режа туза бошладим. Ўйлаб кўрсам, оролда иккни нафар вивисекциячию улар ясаган ҳайвонсифат одамлардан бошқа ҳеч ким яшамас экан. Демак, зарурат туғилса, ҳайвонсифат одамлардан айримларини менга қарши қайрашдан ҳам тойишмайди улар. Бунинг устига, Моро билан Монтгомерида қурол — тўппончалари бор; менда эса учидан мих чиқиб турган калтакдан бўлак ҳеч бало йўқ.

Чанқаганим ва қорним очгани ёдимга тушгунга қадар жойимдан жилмай ётдим. Бироқ сўнг аҳволим бутунлай танг эканига амин бўлдим. Ейишга бирор нарса топилиши мумкинлиги сира ақлга сифмасди. Еса бўладиган мева ёки томир қидириб топиш учун ўсимликлар илмини яхши билиш керак. Оролдаги қуёнларга тузоқ қўяй десам, анжом йўқ. Ўйлаганим сари тушкунлик енгиб, миям говлаб бораради. Охири умидсизлик мени буткул исканжага олиб, кўз олдимда ўрмонда учратган ҳайвонсифат одамлар жонланди. Шуни хаёлимдан ўтказарканман, ўзимча сўнгги умид учқунини топишга уринардим. Уларнинг ҳар бирини алоҳида-алоҳида кўз олдимга келтириб, қайси бирининг менга ёрдами тегиши мумкинлигини аниқлашга тиришардим.

Бирдан янги хатардан огоҳ этиб, тозининг ҳуригани эшитилди. Узоқ ўйлаб ўтирмай (чунки ушлаб олишлари ҳеч гап эмасди), михли таёқни кўтарганча яшириниб ётган еримдан чиқиб, сув шилдираётган томонга қараб юрдим. Ҳали-ҳали унотолмайман: чакалак шохлари, тиканаклар таталаб, игнадек санчилар, уст-бошим йиртилиб кетган, баданимдан қон тирқиравди. Шу аҳволда ҳаллослаб, шимол томон чўзилиб кетган кичкинагина кўрфаз лабидан чиқдим. Кўрфазни тиккасига кесиб ўтиб, ўйлаб-нетиб ўтирмай сувга қадам қўйдим. Саёз дарё суви мени бирпасда тиззамгача кўмди. Ниҳоят, амаллаб нариги, гарбий қирғоққа ўтиб олгач, юрагим дуккабад ўзимни қуюқ қирқулоқлар ичига урдим ва нима бўлса энди пешонамдан кўрдим, деб кута бошладим. Итнинг яқинлашаётгани (у ёлғиз эди), чакалакзор яқинида ҳургани эшитилди. Бошқа ҳеч қандай

овоз эштилмади ва мен хайрият, қутулдим, деб енгил тин олдим.

Дақиқалар бирин-кетин ўтиб борар, яхшики, тинчликни ҳеч ким бузмасди. Бир соатлик осойишталиқдан сўнг секин-аста ўзимга кела бошладим.

Энди мени қўрқув ҳам, умидсизлик ҳам қийнамасди. Мен бу иккала туйғунинг ҳам сарҳадларидан ўтиб бўлгандим. Яшашнинг мен учун заррача маъноси қолмаган, энди нима истасам, шуни қиласверишим мумкинде туюларди. Кўнглим шу чоқда Моро билан юзма-юз келишни тусаб қолганди. Ўзим кечиб ўтган дарёга қараб, агар иложисиз қолсан, барча азоблардан қутулишнинг ягона осон йўли — шу дарёга гарқ бўлиб ўлиш, бунга ҳеч ким монелик қилолмайди, деб ўйлардим. Бирдан шундай қилгим ҳам келди, бироқ охиригача кутиш, юз беражак ҳамма воқеаларни ўз кўзим билан кўриш истаги, қолаверса, қонимдаги қизиқувчанлик устунлик қилиб, аҳдимдан қайтдим. Мен чакалакзорда таталантан, толиқан аъзоларимни силағанча атрофга аланглардим. Шу чоқ кўм-кўк буталар орқасидан бир қоп-қора нусха бошини чиқарди ва менга кўзларини лўқ қилганча туриб қолди.

Бу ўша, баркасни қирғоқда кутиб олган маймунсифат маҳлуқ эди. У палма танасини эгтанча дарахтда осилиб турарди. Мен таёқни ўқталганча ундан кўзимни узмай ўрнимдан турдим. У жаги жагига тегмай ғудурлай кетди:

— Сиз, сиз, сиз... — Унинг гапларидан менинг бор уққаним шу бўлди.

У сакраб пастга тушди, қирқулоқ шохларини қўли билан икки томонга четлаб, менга қизиқсиниб тикилди.

Анави ҳайвонсифат одамлардан фарқли ўлароқ, негадир унга нисбатан менда ижирғаниш ҳисси пайдо бўлмади.

— Сиз ҳўй, қайиқда келган одамсиз, — деди у.

Шубҳасиз, у одам эди: худди Монтгомерининг хизматкори каби гапирияти-ку, ахир!

— Ҳа, — дедим, — мен ўша, қайиқда келган одамман. Ҳўй, катта кема ташлаб кетди-ку.

— Ў-ӯ! — деди у ҳайратланиб, сўнг йилтиллаб турган ўйноқи кўзлари билан аввал қўлларимга, кейин таёқчага, оёғимга, титилиб кетган кийимларимга, тикан илиб, тирнатан ярачақаларимга бир-бир қараб чиқди. Чамаси, у нимадандир қаттиқ ҳайратда эди. У яна қўлларимга қайта тикилди. Сўнг ўзининг қўлини олдинга чўзди-да, шошилмай бармоқларини санай бошлади:

— Бир, икки, уч, тўрт, бешта-а?

Мен бошда ҳеч нарса тушунмадим. Бу ҳайвонсифат одамларнинг аксариятининг қўллари майибу мажруҳ эканини, айримларида ҳатто учтадан бармоқ этишмаслигини мен кейин англадим. Унинг бу ишини салом ўрнида билиб, алик олиб қўя

қолдим. У бениҳоя мамнуният билан иржайди. Сўнг унинг ўйноқи кўзлари яна атрофга аланглади. Туйқус дик энг бурилди-да, кўздан гойиб бўлди. У турган жойдаги қирққудоқ шохлари шитирлаб, аста бир-бирига бирикди.

Мен унинг кетидан юриб, чакалакзордан чиқдим. Ажабо, у менга орқа ўғирганча рўпарамдаги дарахтнинг барглари орасидан чиқиб турган ток таңасига ўхшаш шохга ингичка қўллари билан осилиб, тебранмоқда эди.

— Ҳой! — деб чақирдим мен.

У ерга енгил сакраб тушиб, менга рўпара бўлди.

— Менга қара, егулик ҳеч нарса йўқми? — деб сўрадим ундан.

— Егулик? — деди у. — Есак, одамга ўхшаб ейишимиз керак. — Шундай деб у ҳозиргина ўзи осилиб турган шохга қараб қўйди. — Фақат ертўламизда...

— Каерда ертўлангиз?

— Ў-ў!

— Мен ахир билмайман, бу ерга биринчи келишим-ку.

У шартта ўғирлди-да, илдам қадам ташлаб юриб кетди. Ажабо, унинг ҳаракатларида ҳайратомуз чақонлик зоҳир эди.

— Бу ёқقا! — деб чақирди у.

Қизиқсиниб унинг кетидан йўналдим. У ва у каби маҳлуқларнинг жойи қаер бўларди, бирор қаровсиз ертўладир-да, албатта, бунга ақлим етиб турарди. Ким билсин, балки улар менга яхши оқибат кўрсатишар, тезда тил топишиб ҳам кетармиз. Ўзимча тахмин қилаётган инсоний ҳислатлардан улар нақадар ироқ экани ҳозир хаёлимнинг кўчасига ҳам келмас эди.

Маймунсифат ҳамроҳим ёнимда пилдираб кетмоқда, қўлларици ерга теккудек осилтириб олган, жағи олдинга туртиб чиққан... ўтган-кетган ишлар унинг ёдидамикан, деб аста суриштиридим.

— Қачондан бери бу оролдасан?

— Қачондан бери? — деда такрорлади у ва учта бармоғини айри қилиб кўрсатди. Хатти-ҳаракатлари унинг тамомила овсарлигидан далолат берарди. Бу билан у нима демоқчи эканини аниқлашга уриндим, бироқ ҳаракатларим зое кетди. Чамаси, бу ўша заҳотиёқ унинг жонига теккан эди. Уч-тўртта саволларимдан сўнг у мендан нари кетди ва қандайдир мевага кўзи тушиб, дарахтга тирмашди. Кафтини тўлдириб пўстлоги тикан ёнғоқдан узиб тушди ва ҷақиб, ея бошлади. Мен эсам қандай бўлса ҳам егулик топилганидан ўзимда йўқ шод эдим. Яна бир-иккита нарсани сўрагандим, у оғзига келган гапни сўзлаб, алжирај бошлади. Айрим гапларини амаллаб тушунса бўларди, бироқ аксарият гаплари тўтиқушнинг вайсашини эсга соларди.

Мен бунга шу қадар берилиб кетибманки, қаёқса йўналаётганимизга ҳам эътибор бермабман. Бир пайт танаси қорайиб, кўмирга айланган дарахтлар орасига кирдик, сўнг оқ-сарғимтириб қобиқли ялангликка чиқдик. Ердан буралиб-буралиб

қуюқ тутун ўрмалар, бурун ва кўзга кириб ачиштиради. Ўнг қўлда, яланғоч қоя ортида кўм-кўк денгиз кўзга ташланади. Илонизи сўқмоқ бирдан пастлаб, иккита баланд бетартиб шағал уюми ташкил этган жарлик бошланди. Биз пастга Эндиқ.

Бўз-сариқ йилгироқ юзада акс этиб, кўзни ҳамаштираётган офтоб кўздан йўқолгач, жарлик ниҳоятда қоронғи туюлди. Жар деворлари борган сари баландлашар, бир-бирига туташиб бораради. Кўз олдимда яшил ва қизғиш доғлар ўйноқлай кетди. Йўлбошловчим бирдан тўхтади ва:

— Уйим, — деди. Қарасам, қандайдир чуқур унгурнинг оғзида турибман, уни қоронғуда сезмаган эканман.

Қулогимга ғалати овозлар эшитилгандек бўлди, яхшироқ кўринсин учун чап қўлим билан кўзларимни ишқалай бошладим. Фордан ниҳоятда бадбўй ҳид анқирди. Одатда, маймунларнинг яхши тозаланмаган қафасидан шундай ҳид келади. Нарироқда, бир жуфт баланд қоя ортида ям-яшил нурафшон тепалик кўзга ташланар, қуёшнинг ингичка нурлари лахтак-лахтак бўлиб, икки томондан унгур ичига ҳам ёғилмоқда эди.

## XII Б О Б

### ҚОНУН ЖАРЧИЛАРИ

Қўлимга совуқ бир нима тегди. Чўчиб тушдим, қарасам, шундоқ ёнимда териси шилиб олинган болага ўхшаш хира қизғиш тусдаги алламбало маҳлуқ турибди. У худди ленивец\* каби мулоим, беозор, бироқ одамни жиркантирап даражада бадбашара, манглайи ниҳоятда паст, ҳаракатлари суст жонзот эди. Кўзим сал қоронгиликка ўргангач, атрофимдаги нарсаларни аниқроқ фарқлай бошладим. Ёнбошимдаги ленивецни эслатувчи жонзот ҳануз жойидан жилмас, менга тикилганча турарди. Ҳамроҳим эса қаёқладир гойиб бўлганди.

Бу ер икки томони вулқондан ҳосил бўлган баланд деворлар билан ўралган торгина дара эди. Қотиб қолган лава оқимлари ҳар қадамда учтар, ҳар иккала девор ҳам сувўтларнинг қалин тўшаги билан қопланган, қуюқ ўсан палма ва қирққулоқлар ҳар жой-ҳар жойда кўз илғамас хилватгоҳларни пайдо қилганди. Ўртадан энтига уч қадамча келувчи илонизи йўлак ўтган, қаерга қараманг, чирик мева-чева ва бошқа қолдиқлар ғарам бўлиб, йўлни тўсиб ётар, ўзидан чидаб бўлмайдиган даражада бадбўй ҳид таратарди.

Ленивецга ўхшаш пакана қизғиш жонзот маймунсиғат ҳамроҳим яқинроқдаги инларнинг биридан чиқиб, мени имо

\*Ленивец — Жанубий Амриқода яшовчи сут эмизувчилар гуруҳига мансуб ҳайвон; ерда юришга яхши мослашмаган, асосан дарахтларда ўрмалаб, барглар билан овқатланади. (Мұхар.)

билин ичкарига таклиф қылгунга қадар күзини узмай, қимар этмай тураверди. Энди ичкарига юраман, дегандим, гарониб гүшанинг яна бир бурчиди баҳайбат, ўта бесўнақай маҳлуқ пайдо бўлди ва менга анграйганча қандайдир тушунарсиз авзойда тош қотди. Бир дам иккиланиб қолдим, келган томонимга қараб қочиб қолайми, деб ҳам ўйладим, сўнг, бор-э, нима бўлса бўлди, ярим йўлдан қайтмайман, дедим-да, михли таёғимни қўлимда маҳкам тутганча ҳамроҳим ортидан тор, сассиқ уяга бош сукдим.

У ярим доира шаклида кавланган кавакдан иборат эди. Унинг ичкари томонини ташкил этган қоя девори остида кокос ёнғоғи ва турли мева-чева тўп-тўп бўлиб турарди. Тош ва ёғочдан ясалган идиш-товоқлар ерда ётибди, фақат биргина идиш қўпол, энланга столдан жой олган. Ўчоқда ўт ёнмасди. Уянинг тим қоронги бурчагига улкан бир қора шарпа ястаниб ўтиради. Киршишим билан у ўзича нимадир деб ғўлдирагандек бўлди. Маймунсиғат ҳамроҳим шундоққина остононада, хира ёргу тушшиб турган ерда турарди, унга рўпара бурчакка ўтиб ўтиришим ҳамон менга кокос ёнғоғидан чақиб узатди. Ёнғоқни олдиму хонанинг диққинафаслигини ҳам унутиб, емоққа тутиндим. Пакана қизғиши жонзорт уяга киравериша турар, аллақандай қорамтири, кўзлари йилтироқ маҳлуқ унинг елкаси оша мени томоша қиласди.

— Ҳой, — деди тўғримда ўтирган сирли шарпа.

— У одам! У одам! — дея бидирлай кетди мени бошлаб келган ҳамроҳим. — Одам, одам, менга ўхшаган тирик одам.

— Ўчир унингни, — дея гудурлари қоронгуликдаги шарпа.

Мен зўрга ўзимни идора қилиб, ёнғоқни ейишда давом этдим. Бугун эътиборимни жамлаб, қоронғилик бағрига тикилардим, бироқ ҳеч балони фарқлаб бўлмасди.

— У одам, — дея такрорлари қоронғиликдаги овоз. — У биз билан яшагани келдими?

Овоз кишини ҳайратга солар даражада бўғиқ, чийиллаш аралаш эшитилар, бироқ унинг инглизча талаффузида заррача нуқсон йўқ эди.

Маймунсиғат одам худди нимадир қилишим керакдек менга маъноли қаради.

Унинг муддаосини тушундим.

— У сизлар билан бирга яшагани келди, — дедим мен.

— У одам. У Қонунни билиши керак.

Энди сал бўлса-да, зулумот қўйнидаги қоп-қора буқчайган гавданинг кўз илгар-илғамас қиёфасини фарқлай бошладим. Киравериша яна иккита куйдирган калла пайдо бўлиб, уя баттар қоронғиласди. Таёқни яна ҳам маҳкамроқ ушладим. Қоронгулик қўйнидаги шарпа овозини баралла қўйиб:

— Сўзларни такрорла, — деди.

Мен тушунмадим.

— Тўрт оёқлаб юрилмасин — бу Қонун, — деди у қироат билан.

Мен тамомила гангиг қолдим.

— Сўзларни тақорорла, — деди маймунсифат одам, ўзи ҳам ўша жумлани қайтариб. Кираверишдаги нусхалар ҳам, худди пўписа қилаётгандек, унга қўшилишди.

Мен уларнинг ахмоқона жумласини тақорорлашим кераклигини тушундим. Бироқ бундан беш баттар бемаънгарчилик олдинда экан. Қоронғилик қўйнидаги овоз аллақандай тушунарсиз ибодатни қироат билан зикр этишга тушиб, қолгандар, шу жумладан камина ҳам, унинг айтганларини жўр овозда тақорорлай бошладик. Фақат тақорорлабгина қолмай, маҳлуқлар баравар танааларини у ёқдан бу ёққа ташлаб, тебранишар, қўлларини тиззаларига уриб, шаппиллатишарди, мен ҳам улар нима қилишса, шуни тақорорлардим. Хаёлимда худди мен ўлганман-у, нариги дунёда юргандек эдим. Зулумот қўйнида қора-қўра шарпалар тўпланган, ора-сира ёруғда ё у, ё бу аъзолари кўриниб қолар, бараварига бир маромда тебраниб, зикр тушишарди:

— Тўрт оёқлаб юрилмасин — бу Қонун. Ахир, биз одаммиз-ку?

— Сув тилда чаппиллатиб ичилмасин — бу Қонун. Ахир, биз одаммиз-ку?

— Гўшт ва балиқ хомлайнин ейилмасин — бу Қонун. Ахир, биз одаммиз-ку?

— Даражат пўстлоғи тирноқ билан шилинмасин — бу Қонун. Ахир, биз одаммиз-ку?

— Бошқа одамлар кетидан ов қилинмасин — бу Қонун. Ахир, биз одаммиз-ку?

Хуллас, шу асно таъкиқ кетидан таъкиқ айтилаверди, секин-аста шундай таъкиқларгача бориб етдики, улар нафақат бемаъни ва беибо, балки ақлга сиғмас даражада ахмоқона ҳам эди. Биз жўр овозда тинимсиз зикр тушар, ҳайратомуз Қонунни тақорорлаганимиз сари жазавамиз ортиб, яна ҳам илдамроқ чайқалардик. Четдан қараганда менга ҳам аллақачон бу ҳайвонсифат одамларнинг нуқси урганга ўхшар, бироқ ичимда истеҳзо ва нафрат туйгулари аёвсиз кураш олиб борарди. Узундан-узун таъкиқ рўйхати тугаб, қироат оҳанги янгича тус олди:

- Уқубат Уйи унивидир.
- Яратгувчи Қўл унивидир.
- Янчгувчи Қўл унивидир.
- Шифокор Қўл унивидир.

Ва ҳоказо ва ҳоказо, хуллас, яна бир узундан-узун рўйхат, аллақайси номаълум "У" ҳақда қип-қизил сафсата. Бунинг барини туш деб ўлаш ҳам мумкин эди, бироқ тушида одам қироат қилолмайди-ку.

— Чақмоқ унивидир, — деди зикр тушардик биз.

— Тубсиз шўр денгиз унивидир.

Шу чоқ миямда даҳшатли бир шубҳа милт этди: Моро бу бечораларни ҳайвонга айлантириб, уларнинг шўрлик миясига ўзига сажда қилишни қўйган. Қироатни бас қилмоқчи бўлардим, бироқ мени қуршаган оппоқ тишлару ўткир тирноқларни кўриб, бунга журъат этолмасдим.

— Самодаги юлдузлар унивидир.

Ниҳоят, зикр тушишни бас қилдик. Маймунсифат одамнинг юзи тердан йилтилларди. Кўзим қоронгиликка ўрганиб, бурчакда ўтирган, ҳозиргина хириллоқ овозда зикр тушган шарпани аниқроқ кўрдим. Бўй-басти худди одамнидек, бироқ аъзойи бадани скайтеръер зотли итнинг жунини эслатувчи ўсиқ тим кулранг тук билан қопланган. Ажабо, қандай жонзот бўлди бу? Қолганлар-чи? Ўзингизни бир ана шунаقا, ақл бовар қилмас майиб-мажруҳ ва восvosлар қуршовида тасаввур этиб кўринг-а, шундагина менинг айни ҳолдаги аҳволимни тушунишингиз мумкин.

— Унинг қўли беш панжалик, беш панжалик, менидек беш панжалик, — деди бидирларди маймунсифат одам.

Мен қўлларимни чўздим. Бурчакдаги кулранг шарпа олдинга энгашди.

— Тўрт оёқлаб юрилмасин — бу Қонун. Ахир, биз одаммиз-ку? — деди у тагин.

У ғалати майиб панжаларини чўзиб, бармоқларимни қаттиқ сиқди. Панжалари худди кийикнинг туёгини эслатар, ундан бармоқ йўнилганга ўҳшарди. Мен қўрқув ва оғриқдан дод деб юбораётдим. У яна ҳам энгашиб, бармоқларимга синчиклаб тикилди, шунда калласи кираверишдан тушаётган ёруғга тўғри келдию унинг бутун турқи-таровати кўз ўнгимда намоён бўлди. Кўриб, этим жунжикиб кетди: ё тавба, у одам бўлиб одамга, ҳайвон бўлиб ҳайвонга ўхшамас, кўз ва оғиз учун мўлжалланган учта ёйсимон қорамтири ғовакдан иборат сержун, паҳмоқ пўстакни эслатарди унинг афти.

— Бунинг чангали кичкина экан, яхши, — деди бесўнақай паҳмоқ маҳлуқ.

У қўлимни қўйиб юборди, мен эсам жонҳолатда таёққа ёпишдим.

— Томир ва ўт-ўланлар билан озиқланиш керак — Унинг иродаси шу, — деди маймунсифат одам.

— Мен Қонун жарчисиман, — деди паҳмоқ маҳлуқ. — Барча янги келганлар бу ерда мендан Қонунни ўрганишади. Мен қоронгида ўтириб, барчани Қонунга даъват этаман.

— Ҳа, шунаقا, — деди тасдиқлади кираверишда турган маҳлуқлардан бири.

— Кимда ким Қонунни бузса, уни даҳшатли жазо кутади. Унга шафқат йўқ.

— Шафқат йўқ, — дея такрорлашди ҳайвонсифат одамлар бир-бирларига пинхона олазарак қараб.

— Йўқ-йўқ, — дея тасдиқлади маймунсифат одам ҳам. — Асло шафқат йўқ. Эсингда тут! Бир гал мен айб қилдим, ёмон иш тутдим. Минғирлаб, минғирлаб, охири гапирмай қўйдим. Ҳеч ким мени тушунмай қолди. Мени жазолашди, мана, қўлимда тамға. Ё қудратингдан, ўзинг паноҳингда асрар.

— Шафқат йўқ, — деди бурчакдаги баҳайбат паҳмоқ маҳлуқ.

— Шафқат йўқ, — дея бир-бирларига шубҳали олайиб, жўр бўлишди ҳайвонсифат одамлар.

— Ҳар кимда бир камчилик бўлади, — деди Қонун жарчиси.

— Сенинг камчилигинг ҳали бизга номаълум, лекин секин-аста билиб оламиз. Айримлар тинчгина юрганларнинг пайига тушадилар, сезизирмай пойлайдилар, қулай фурсат топиб ташланадилар, тишлаб жонини оладилар, шундай тишлайдиларки, нақ қонини сўрадилар... Бу ёмон.

— Одам овланмасин — бу Қонун. Ахир, биз одаммиз-ку? Гўшт ва балиқ хомлайн ейилмасин — бу Қонун. Ахир, биз одаммиз-ку?

— Шафқат йўқ, — деди кираверишда турган олачипор маҳлуқ.

— Ҳар кимда бир камчилик бўлади, — дея такрорлади Қонун жарчиси. — Айримлар қўли ва тишлари билан ўсимлик томирларини кавлайди, исканади... Бу ёмон.

— Шафқат йўқ, — дейишиди кираверишда турганлар.

— Айримлар дараҳт танасини тирнайди, айримлар гўр очиб, жасад қидиради ёки сузишиб, тепишиб, тимдалашиб уришади, айримлар ҳеч бир сабабсиз тишлайди, узади, айримлар шалтоққа юмаламासа, ётгандек бўлмайди.

— Шафқат йўқ, — деди маймунсифат одам яна оёғини қашларкан.

— Шафқат йўқ, — дея такрорлади пакана қизғиш маҳлуқ.

— Жазо шафқатсиз ва муқаррардир. Шунинг учун ҳам Қонунни ўрган. Сўзларни такрорла. — Шундай деб у яна Қонун сўзларини зикр этишга тушди, барчамиз биргаликда уйнинг айттганларини қироат билан такрорлаб, яна у ёқдан бу ёқса чайқала бошладик. Уянинг диққинаfasлиги ва ҳадеб бир хил калимани такрорлаш кўнглимни беҳузур қилар, бироқ нимадир юз бериб, қутуларман, деган умидда тўхтамай уларга жўр бўлардим.

— Тўрт оёқлаб юрилмасин — бу Қонун. Ахир, биз одаммиз-ку?

Биз шу қадар шовқин солардикки, ташқаридан кимдир, адашмасам, мен ўрмонда учратган чўчқасифат одамлардан бири пакана қизғиш маҳлуқнинг елкаси оша бош суқиб, жонҳолатда алламбало деб қичқирмаса, ташқаридаги тўс-тўполонни сезмас ҳам эдик. Уяга кираверишда турган маҳлуқлар ўша заҳоти гойиб бўлишди, уларнинг кетидан маймунсифат одам, унга эргашиб

қоронғи бурчкада ўтирган пахмоқ махлук ҳам ташқарига отилди. Уни энди аниқ қўрдим — баҳайбат; бесўнақай, ялтироқ юнгли мавжудот экан. Уяда бир ўзим ёлғиз қолдим.

Ўрнимдан туриб, оstonага етар-етмасимдан тозининг овози эшилтиди.

Кўз очиб юмгунча ташқарига отилиб чиқдим, қўлимда таёқ, аъзойи баданим дағ-дағ титрарди. Рўпарамда бесўнақай бошлари елкаларига чуқур ботган ҳайвонсифат одамлар менга беўхшов орқаларини ўтирганча турардилар. Улар нимадандир ташвишда, бир-бирларига асабий имо-ишоралар қилишарди. Яна бир қанча ҳайвонсифат нусхалар уяларидан бошларини чиқарип, нима гап ўзи, дегандек ҳайрон боқишарди. Барчанинг нигоҳи қадалган томонга қараб, ғорга кираверишда, йўлак бошидаги дараҳтлар панасида келаётган Моронинг қорамтири сумбатию ғазабдан бўзарган юзини илғадим. У ҳуриб, олдинга сапчиётган тозини занжиридан маҳкам ушлаб олган, ортидан қўлида тўлпонча тутган Монтгомери соядек эргашиб келарди.

Бир зум қўрқувдан донг қотиб қолдим.

Орқамга ўтирилгандим, товоқдай кулранг юзли, қисиқ кўзлари йилтировчи улкан махлук йўлимни тўғсанча мен томон яқинлашиб келаётганини кўрдим. Атрофга алангладим, ўнг томонда, мендан, чамаси, ўн қадамча нарида — ғорнинг қоя девори оралиғида ёриқ сезилди, у ердан ингичка қінғир нур тушиб турарди.

— Тўхта! — дея қичқирди Моро, менинг ўша томонга қўзғалганими кўриб. — Ушланглар уни!

Дастлаб махлуклардан бири, кетидан қолганлари ҳам мен томон ўтирилишди. Бахтимга, уларнинг ҳайвоний онглари сустидрок этарди.

Бесўнақай алвости Моро нима деяпти экан, дея ўтирилиши билан олға ташландим ва тўппа-тўғри елкам билан бориб унга урилдим. Махлук мункиб кетди. Мени ушламоқчи бўлиб узалганди, бироқ қўли етмади. Пакана қизғиши махлук ҳам келиб менга ташланди, қўлимдаги михли таёқ билан совуқ башарасига ўхшатиб туширдим-да, олға сакрадим ва ҳаш-паш дегунча девордаги юқорига олиб чиқувчи ёриққа тирмашдим. У, афтидан, ғорда мўри вазифасини ўтарди. Орқамдан "Ушла!", "Қўйворма!", деган бақириқ-чақириқлар эшитилар, кулранг юзли пахмоқ махлук менга деярли етиб олган, бесўнақай гавдаси билан ёриққа тиқиларди.

— Ушла, ушла! — дея ҳайҳайлашарди қолганлар.

Мен амаллаб тирмашиб ёриқ оралиғидан ўтдим ва ҳайвонсифат одамлар қароргоҳидан гарб томондаги яшил-сарғимтири текисликдан чиқдим.

Яккам-дуккам дараҳтлар учровчи оқиши қия тепаликдан энганча чопиб, қамишлар қуюқ ўстган сайҳонликка етдим. Қамишзорни кесиб ўтиб, қалин қорамтири бутазорга кирдим. Оёқ

ости бутун чилпиллаган сув эди. Фордаги ёриқ жонимга оро кирди: тор ва қия бўлгани боис, таъқиб этувчиларни анча ушлаб қолди. Фақат қамишзорга шўнғиганимдагина уларнинг энг биринчиси тепаликда кўзга ташланди. Бутазорда анча тентирадим. Атрофни қий-чув, тўс-тўполон тўлдириб бораарди. Тепалик томондан мени қувиб келаётганларнинг бақириқ-чақириқлари, қамишларнинг шитирлаши, унда-мунда шохларнинг қисирлагани эштиларди. Таъқиб этувчиларнинг айримлари худди ёввойи ҳайвондек ўкиришарди. Чап томонда този акиллади. Ўша тарафдан Моро ва Монтгомерининг ҳам бақириб-чақирган овози эштилди. Мен шу заҳотиёқ ўнгта бурилдим. Худди Монтгомери жонингдан умидинг бўлса, тезроқ қочиб қол, дея бақираётгандек туюларди.

Дабдурустдан оёғим остидаги ер юмшади ва пилчиллаб, балчиққа айланди, наилож, киришга мажбур бўлдим, тиззамгача лой кечиб, зўрга қалин қамишзор оралигидан ўтган илонизи сўқмоққа чиқиб олдим. Қувлаб келаётганларнинг қий-чуви энди чап томондан эштилди. Бир жойга етганимда палакат босиб, оёғим остидан учта қизгиш, катталиги мушукдек келувчи ғалати жонзот иргиб, ура қочса бўладими. Сўқмоқ борган сари юқорига ўрларди, юриб-юриб, яна сарғимтири қобиқли текисликдан чиқдим, кетидан тағин қамишзор бошланди.

Таъқиб этувчилардан қочиб борарканман, сўқмоқ бирдан икки томони тик қия жарликка бурилди. Жонҳолатда чопиб келаётган эканман, оёғим остида пайдо бўлган бўшлиқни пайқамай, қулочимни бошим билан жарга қуласам бўладими.

Тўппа-тўғри тиконли буталар устига тушибман, уст-бошим йиртилиб, азойи баданим шилиниб, базур ўрнимдан туриб олдим. Қулоқ жонвор ҳам яхшигина йиртилиби, юз-кўзим қон. Йиқилган ерим тошлоқ, чўкалдириклар ўсган экан. Пастда оқиш тутунни эслатувчи сийрак туман ўрмалар, у жар ўртасидан илонизи бўлиб оқиб ўтган жилғадан бугга ўхшаб кўтарилмоқда эди. Тавба, куппа-кундуз куни, офтоб чарақлаган пайтда туман нима қиласди? Бироқ ажабланишга ҳам вақт йўқ эди. Мен оқим бўйлаб ўнгта бурилдим, мақсадим дengизга чиқиб, гарқ бўлиб ўлиш эди. Шунда илғадимки, таёғим қўлимда йўқ, йиқилган еримда қолиб кетибди.

Тезда жарлик торайди, йўл йўқолгач, эҳтиётсизлик қилиб, жилғани кечмоқчи бўлибман. Ўша заҳоти иргиб ўзимни четга отдим — жилға суви оёқни жизгинак қилас даражада қайноқ эди. Назар солиб илғадимки, сув юзаси юпқа олтингугуртсифат парда билан қопланган. Озгина юрмасимдан жарлик бурилиб, кўкиш уфқ кўзга ташланди. Қуёш нурлари дengиз сатҳида акс этиб, товланарди. Ана, сенга керак бўлса ўлим!

Ниҳоятда асабим таранг, ўпкам оғзимга тиқилиб қолган, ҳарсиллаб нафас олардим. Бир томондан анави таъқиб этувчиларни узоқда қолдириб кетганимдан ўзимда йўқ шод эдим.

Энди ўзини сувга гарқ этадиган номард йўқ! Томирларимда қайноқ қон гупиради шу онда.

Келган томонимга ўгирилиб, аста қулоқ тутдим. Чивинларининг гингиллашию унда-бунда қўниб-учиб юрган майда ҳашоратларнинг чириллашидан бўлак товуш йўқ, сукунат.

Бироқ, мана, ҳадемай итнинг овози қулоққа чалинди, ниҳоятда узоқда эди у, сўнг фўнғир-ғўнғир гап-сўзлар эшитилди, қамчи тарсиллади. Овозлар бир кучайиб, бир пасаярди. Шовқин оқимга тескари томонга йўналди ва секин-аста олислаб, тинди. Маълум вақттacha таъқиб этувчиларадан қутулдим.

Бироқ энди ҳайвонсифат одамлардан қандай ёруғлик чиқиши мумкинлиги менга беш панжадек аён эди.

### XIII Б О Б

## М У З О К А Р А

Яна йўлимда давом этиб, денгиз томон кетдим. Жилғанинг саёз, қайноқ сув ёйилиб оқаётган қумлоқ ерида тўп-тўп қисқичбақа ва катта-кичик қирқоёқлар танда қуришганди, оёқ товушларимни эшлитиб, улар ҳар томонга тирқираб қочиши. Ниҳоят, денгизга этиб келдим ва фақат шундагина қутулганингма ишонч ҳосил қилдим. Бурилиб, қўлларимни белимга тираганча ортда қолган яшил чакалакзорларга тикилдим, бағридан буғ кўтарилаётган жар унинг ўргасида худди узун қора чандиққа ўхшаб кўринарди. Мен шу қадар саросимада эдимки, рости, буни ўз бошида синамаган одам тасаввур этолмайди — шу тобда ҳатто ўлим ҳам парвомга келмай қолганди.

Мундоқ ўйлаб кўрсам, ҳали имконият бор экан. Моро ва Монтгомери аваби ҳайвонсифат одамлар тўдаси билан мени орол ичкарисидан қидираётганида, уларни қирғоқ бўйлаб ёнлаб ўтиб, тош деворга этиб олсам-чи? Ҳа, шундай қиласман, уларни ёнлаб ўтаман-да, девордан тош кўчираман, зеро, девор мустаҳкам қурилмаган, бундай қилиш жуда осон; тош билан уриб кичкина эшик қулфини бузаман, ичкарига кириб пичоқми, тўппончами, ишқилиб, қўлимга нимаики илинса оламан, уларнинг қайтишига ҳужумга тайёр турман. Осон жон берадиган ахмок йўқ, ётиб қолгунча, отиб қол, деганлар!

Ҳаёлан шуларни чамалаб, гарб томонга бурилдим-да, қирғоқ бўйлаб юриб кетдим. Ботиб бораётган қуёш нури кўзимни камаштириди. Тинч океанинг сокин тўлқинлари шовиллаб, қирғоқни яларди.

Қирғоқ жанубга қараб кетгач, ботаётган қуёш ўнг тарафимга ўтиб қолди. Бир вақт рўпарамдан, мендан анча олисадаги буталар орасидан аввал битта, сўнг алланечта қора чиқиб келди. Булар тозини занжиридан тутган Моро, Монтгомери ва икки нафар ҳайвонсифат одам эди. Уларни кўра солиб таққа тўхтадим.

Улар ҳам, ўз наебатида, мени кўриб, қўлларини шоў қилганча яқинлаша бошлаши. Уларга тикилганча жойимда туравердим. Ҳайвонсифат одамлар улардан ажралиб, чакалакзор томондан мени тўсисб чиқиши мақсадида қадамларини тезлатишди. Монтгомери тўғри менга қараб чопди. Моро ити билан унча шошилмас, оҳиста қадам ташлаб юриб келарди.

Таққа қотган жойимдан қўзғалиб, денгизга юзландим ва тикка сувга кириб кетавердим. Қирғоқ ниҳоятда саёз экан, ўттиз қадамлар юрганимдан кейингина сув зўрга белимни кўмди. Сувдаги балиқларнинг мендан ҳар томонга тирқирашиб қочишаётгани аниқ кўзимга ташланарди.

— Ҳой, биродар, бу нима қилганингиз? — деда қичқирди Монтгомери.

Белимгача сувда, тўхтаб, уларга ўгирилдим.

Монтгомери ҳансираганча сув бўйида турар, кўп юргани боис юзига қон тепчиб, узун майин соchlари тўзгиб кетган, пастки лаби осилиб тушганидан кемшик тишлари кўриниб қолтанди. Шу орада Моро ҳам етиб келди, юз ифодаси жиддий, ранги бўздек оқ, қўлидаги ити менга қараб тинмай ҳурарди. Иккаласининг ҳам қўлида йўғон қамчи. Улардан нарироқда икки ҳайвонсифат маҳлуқ ҳам менга кўзларини лўқ қилганча туришибди.

— Буми? — дедим мен. — Буни чўкиб ўлиш, дейдилар.

Монтгомери билан Моро кўз уриштириб олишди.

— Нега энди? — деб сўради Моро.

— Қўлингизда ит азобига учрагандан бу минг карра афзал.

— Айтувдим-ку сизга, — деди Монтгомери, Моро унга жавобан нимадир деб пичирлади.

— Нега мени азоблайди, деб ўйлаяпсиз? — деб сўради Моро.

— Кўриниб туриби, — деб жавоб бердим мен. — Барчасига ўз кўзим билан гувоҳ бўлдим. Анавилар... Ҳўв, ана!

— Тсс! — деди Моро, қўлини кўтариб, жим дегандек ишора қиларкан.

— Истамайман, — дедим мен. — Улар одам эди. Энди-чи? Аммо мен уларнинг аҳволига тушмоқчи эмасман.

Уларнинг елкаси оша қирғоққа қарадим. Юқорироқда Монтгомерининг Млинг исмли анави хизматкори ҳамда баркасада кўрганим — ҳаммаёғи оқ мато билан чирмалган бедаво турарди. Улардан сал нарида, даражатлар соясида кичкина маймунсифат ҳамроҳим кўзга ташланар, унинг орқасида яна аллақандай нотаниш сўхталар тўпланишганди.

— Булар ким энди? — дедим мен уларга ишора қилиб, ҳамма эшиксин учун овозимни баландлатарканман. — Улар одам эди, худди сизга ўхшаган одам, бироқ сиз уларга ҳайвонларга хос қусурларни жойладингиз, қулга айлантиридингиз, шунда ҳам барибир улардан ҳадигингиз бор. Ҳой, эшигинлар! — деда бақирдим мен ҳайвонсифат одамларга, Морога қўлимни шоп

қилиб. — Гапимга қулоқ солинглар! Наҳотки манавиларнинг сизлардан ҳадиксирашини, қўрқишини билмасангиз? Нега улардан қўрқасиз? Ахир, сизлар кўпчиликсиз-ку...

— Прендиқ! — деда қичқирди Монтгомери. — Худо ҳаққи, овозингизни ўчиринг!

— Прендиқ! — деда унга қўшилиб ўшқирди Моро.

Овозим эштийласин учун иккови баравар шовқин солаётган эди. Уларнинг ортида бошларини қуий солинтирганча, менга ўқрайиб, майиб қўллари ерга осилган, елка суюклари туртиб чиққан, букри ҳайвонсифат одамлар туришарди. Шу тобда улар худди ўзларининг инсоний ўтмишларидан ниманидир эслаб, мени тушунишга ҳаракат қилишаётгандек кўринишиди кўзимга.

Мен уларнинг гапига парво қилмай бақиравердим, нима деганим ҳозир яхши эсимда йўқ; чамаси, Моро билан Монтгомерини ўлдириш кераклиги, улардан қўрқишининг мутлақо ҳожати йўқлиги ҳақида уқтиридим, бунинг охир-оқибатда ўзим учун ҳам хавфли эканига эътибор бермай, ҳайвонсифат одамларнинг миясига қуявердим. Гапларимни яхшироқ эштиш мақсадида жулдур қора кийимдати кўккўз ҳайвонсифат одам аста даражтлар панасидан чиқди, мен уни оролга келган куним кечиқурун кўргандим. Бошқа маҳлуқлар ҳам унга эргашиши.

Ниҳоят, пича нафас ростлаш мақсадида бақиришдан тўхтадим.

— Бирпас гапимга қулоқ солинг, — деди Моро қатъий оҳангда, — сўнг майли, нима десангиз, деяверинг.

— Хўш? — дедим мен.

У йўталиб, бир зум ўйлаб олди ва сўнг менга қараб бақира кетди:

— Лотинча гапираман, Прендиқ, мактаб ўқувчиси даражасида бўлса ҳам айтишга ҳаракат қиласман. Тушунишга урининг. *Hi non sunt nomines, sunt animalia quae nos nubemus...*\* қисқаси, вивисекция қилганмиз. Шунчаки, одамга айлантириш жараёни. Бу ёққа чиқинг, ҳаммасини тушунтириб бераман.

Мен кулдим.

— Алдагани бола яхши, — дедим. — Улар ўзаро гаплашишади, уй-жой қуришади, овқат пишириб ейишади-ку. Улар асли одам бўлишган. Қирғоқча чиқиб бўпман!

— Айтиб қўйяй, сиз турган ердан нарёғи чуқур... акула ҳам кўп.

— Айни муддао-да, ўзи шу керак менга, — деб жавоб бердим мен. — Унча қийналиб ўтирумайман. Хўп бўлмаса.

— Ҳой, шошмасангиз-чи.

У чўнтағидан қуёшда ялтираб кетган нимадир чиқариб, оёғи остига ташлади.

— Бу ўқланган тўппонча, — деди у. — Монтгомери ҳам

\*Улар одам эмас, ҳайвон, биз уларни...

ташлайди. Биз сиз истаган масофага бориб турамиз. Қирғоққа чиқинг-да, түппончаларни олинг.

— Лаққиллатманг, сизларда яна бор.

— Ақл билан иш тутиңг, Прендиқ. Аввало, бу оролга сизни мен чақирмаганман. Қолаверса, сизга зиён-захмат етказиш ниятимиз бўлганида, кеча тундаёқ ухлатиб қўйиб, нима истасак, қилаверардик. Ниҳоят, бугунги восеослардан қутулдингиз ҳисоб, энди танангиизга бир ўйлаб кўринг. Наҳот Монтгомери сиз ўйлаган одамга ўшаса? Фақат сизнинг фойдангиизни деб ортингиздан кувяпмиз. Бу оролга ишониб бўлмайди, унда хатарли мавжудотлар кўп. Кейин, ўзингиз чўкаман, деб турган бўлсангиз, сизни отиб нима қиласмиш?

— Унда нега ғорда одамларингиз менга ҳамла қилишди?

— Сизни тутиб, хавф-хатардан сақлаб қолмоқчи эдик. Қочганингиздан сўнг, сизни омон-эсон сақлаш мақсадида атайлаб уларни изингиздан адаштиридик.

Ўйланиб қолдим. Унинг бу гапларида жон бордек эди. Бироқ шу пайт яна бир нима эсимга тушди.

— Ўз кўзим билан кўрмаган бўлсам экан, — дедим, — тош девор ичида, ҳовлида...

— У пума эди.

— Менга қаранг, Прендиқ, — деди Монтгомери. — Одам эмас, гирт тўнка экансиз. Бу ёққа чиқинг ахир, анави түппончаларни олинг, кейин бафуржга гаплашайлик. Шунчалик ҳам бўладими одам.

Гапнинг очиги, мен Морога умуман ишонмасдим, ҳатто ундан қўрқардим. Монтгомери, ҳар тугул, менга яқин ва ишонарлироқ эди.

— Майли, нари кетинглар унда, — дедим мен ва бироз ўйланиб тургач, қўшимча қилдим: — Фақат қўлларингни ҳам кўтариб оласизлар.

— Бунинг иложи йўқ, — деди Монтгомери, боши билан орқадагиларга маъноли ишора қилиб. — Обрўмиз бир тийин бўлади.

— Майли, дараҳтларнинг олдига бориб туринглар унда, — дедим мен.

— Бунақа бемазагарчиликни биринчи кўришим... — дея тўнгиллади Монтгомери.

Улар икковлон ўгирилишди-да, чўзиқ қўланка ташлаб турган олтитами, еттита баҳайбат, кучли, бироқ бу дунёнинг бандаларига сира ўхшамайдиган бедаво махлуқлар томон йўналишди. Монтгомери қамчисини қарсиллатган эди, шўрликлар шу заҳоти оёқларини қўлларига олиб, дараҳтлар панасиға уриб кетишиди. Монтгомери билан Моро мендан қониқтиарли масофага узоқлашгач, аста қирғоққа чиқдим-да, түппончаларни олиб, текшириб кўрдим. Шунчаки бир ҳийла бўлмасин тагин, деб ердаги юмйлоқ

лава парчасига қарата ўқ уздим, унинг тўзғиб, қирғоққа ҳора куқундек сочиlgанини мириқиб кузатдим.

Лекин барибир кўнглим таскин топмасди.

— Майли, бахташ таваккал, — дедим-да, икки қўлимда биттадан тўппончани тайёр тутганча, улар томон юрдим.

— Маъна бу бошқа гап, — деди Моро анча хотиржам. — Афсус, сизнинг бемаза васвасангиз туфайли бугун жуда кўп қимматли вақтимни йўқотдим.

Унинг гап оҳангидага андак нафрат ҳам бор эдики, бу менга жуда қаттиқ ботди. Моро билан Монтгомери индамай олдимга тушиб, тўғрига қараб юришди.

Ҳайвонсиғат одамлар тўдаси дараҳтлар панасида ҳайратланиб кузатиб қолишиди. Улар қархисидан имкон қадар хотиржам ўтишга ҳаракат қилдим. Биттаси ортимдан йўналган эди, Монтгомерининг қамчиси тарсиллаб тушди-ю, у тирақайлаб қочиб қолди. Қолганлари қимир этишмас, бизга тикилганча жойларида қотиб туришарди. Ким билсин, балки улар чиндан ҳам аввал ҳайвон бўлишгандир. Бироқ ҳайвон зотининг фикр юритишга уринишини умрим бино бўлиб энди кўриб турардим.

#### XIV Б О Б

### ДОКТОР МОРОНИНГ ТУШУНТИРГАНИ

— Энди, Прендиқ, сизга ҳаммасини бир бошдан тушунтириб берай, — деди доктор Моро, озоқ тамадди қилиб, чанқоғимизни қондирганимиздан сўнг. — Шуни айтишим керакки, сиз мен шу пайтгача мулоқотда бўлган меҳмонлар ичиди энг шарттакиси экансиз. Айтиб қўйяй, бу охирги ён беришим. Мабодо, яна бирор марта ўзимни-ўзим ўлдираман, деб қўрқитиши ниyat қилсангиз, ўлай агар, оқибати қандай тугашидан қатъи назар, аралашмайман.

У ҳужрамдаги оромкурсида эпчил, қон юқисиз бармоқлари орасида сигара тутганча ўтиради. Осма чироқнинг хира нурлари унинг оқ сочли бошини ёритар, нигоҳи кичкина дарча ортида милтиллаётган юлдузларга қадалган эди. Мен, иккала қўлимда ҳам биттадан тўппонча, столнинг нариги томонида ўтирад, Мородан иложи борича узоқроқ бўлишга уринардим. Монтгомери негадир кўринмасди. Ўзи торгина хонада, икковининг қуршовида ўтиришга кўзим ҳам учётгани йўқ эди шу тобда.

— Шундай қилиб, бояги таърифингиз билан айтганда, вивисекция қилинаётган жонзор одам эмас, пума эканлигини тан олдингиз? — деб сўради Моро.

У сал олдин мени ҳовлидаги даҳшатли саҳнани кириб кўриб чиқишига мажбур этган эди.

— Ҳа, у пума, — дедим мен. — Кўрдим, тирик, бироқ шўринг қурғур шунчалик ҳам тилкаланиб, майиб қилинадими.

Эй худо, бундай манзарага қайта гувоҳ бўлишдан ўзинг аспа.  
Бундай қабиҳликни...

— Қўйинг, куйинманг, — деди Моро. — Болалик қилганингиз етар, сал ўзингизни қўлга олинг. Монтгомери ҳам бошда худди сизга ўхшарди. Хуллас, пума эканини тан оласиз, шундайми? Энди жим ўтириб, менинг физиологик назариямга қулоқ солинг.

Шу асно у гапга тушиб, амалга ошираётган ишининг бутун моҳиятини эринмасдан оқизмай-томизмай тушунтириб чиқди. Унинг далиллари содда, равон, ишонарли эди. Онда-сонда аччиқ киноя ҳам сезилиб турарди гап оҳангиди. Мен эсам борган сари қилган ишимдан уялиб, пушаймон чекиб борардим.

Хуллас, мен бу ерда кўрган мавжудотларнинг ҳеч бири аввал одам бўлмаган, барчаси бекиёс вивисекция тажрибаси шарофати билан ҳайвондан одамга айлантирилган экан.

— Юқори малякали вивисекциячи тирик мавжудотлар билан не мўъжизалар яратиши мумкинлигини унугибсиз, — деди Моро.

— Шахсан менга келсак, бу ерадиги ишларим нега олдинроқ қилинмаганига ҳайрон бўламан. Тўғри, майдачуида, арзимаган уринишлар, ампутация, тил кесиш, турли аъзоларни олиб ташлаш каби тажрибалар бўлган, албатта. Ўйлайманки, филайлик жарроҳлик йўли билан юзага келтирилиши ва аксинча, буткул йўқотилиши мумкинлиги яхши маълум сизга. Айрим аъзоларнинг олиб ташланиши вужудда пигментнинг ўзгариши, ёғ ҳужайраларининг юзага келиш жараёни турлича кечиши каби иккинчи хил ўзгаришларга сабаб бўлади. Шубҳасиз, буларнинг ҳаммасини эшитгансиз, биласиз.

— Албатта, биламан, — дедим мен. — Бироқ анави бедаволарнингиз...

— Гапнинг бердисини айтгунча жим туринг, — деди у қўйишораси билан мени тўхтатиб. — Мен энди бошладим. Бу шунчаки хомаки тажрибалар, холос. Жарроҳликнинг имкониятлари чексиз. Унинг асосий мақсади фақат кесиш, алмаштириш эмас, бутлаш, яратиш ҳам. Сиз бурун жароҳатланганда амалга ошириладиган операция ҳақида эшитган бўлишингиз керак. Пешонадан бир парча эт кесилиб, бурунга қўйилади-да, тикилади ва шу ҳолатда яра битади. Бу айрим олинган тана миқёсида унинг қисмларини бир жойдан бошқа жойга кўчириш демак. Бир тирик жонзотнинг аъзосини бошқа тирик жонзотга кўчириб ўрнатиш ҳам мумкин бўлган ҳодиса, мана, масалан, тишин олинг. Одатда, эт билан сук яра тез битиши учун кўчириб ўтказилади. Жарроҳ янги кесилган жойга тирик мавжудотнинг этини ёки ҳали совумаган танадан олинган керакли сук парчасини жойлади-да, тикади. Сиз Хантернинг буқа бўйнига хўроз пихини тикканини эшитгандирсиз. Ё бўлмаса жазонирилик зуавларнинг каркишоҳ-каламушларини эсланг — бу бедаволар ҳам ана шундай, яъни каркишоҳ думидан тасма кесиб, каламуш тумшуғига пайвандлаш йўли билан ясалади.

— Ясалади! — дея хитоб қилдим мен. — Демоқчисизки...

— Хўдди шундай. Сиз бу ерда кўрган мавжудотлар фақат тилкаланиб, янгича шамойилга солинган жонзотлар, холос. Менинг бутун умрим шунга, жонзотларниң шакл-шамойилини ўзгартириши ўрганишга бағишиланган. Неча йилдирки, машаққат билан, игна билан қудуқ қазиб ўрганаман бу муаммони. Ҳа, нима бало, намунча қўрқиб кетдингиз, ҳеч қанақа янги гап айтаётганим йўқ-ку. Бу амалий анатомиянинг нақд юзасида узоқ йиллардан бўён мана ман деб ётиби, фақат унга дадил қўл уришга ҳеч кимнинг юраги дов бермайди. Менга фақат ҳайвоннинг ташқи қиёфасини ўзгартиришина маълум эмас. Организм физиологиясини, унинг кимёвий таркибини ҳам маълум миқдорда ўзгартириш мумкин. Жумладан, узоққа бориб нима қиласиз, вакцинация қилиш ёки бошқа қатор жонли, жонсиз нарсалар билан қилинадиган пайвандлаш ишлари бунга яққол мисол бўла олади, буларнинг барини яхши биласиз, сизга айтиб ўтиришимнинг ҳожати йўқ. Қон қуиши ҳам худди шунинг ўзгинаси, дарвоҷе, мен фаолиятимни шуни ўрганишдан бошлиғанман. Буларнинг ҳаммаси бир-бираiga жуда яқин. Улардан анча йироқ ҳамда мураккаброқ саналмиш операциялар ўрта аср жарроҳлари томонидан ўтказилган, улар пашмалоқ одам, майибу мажруҳ гадо, кулги қўзғайдиган бадбуруш масҳараబозлар ясаганлар; улар санъатининг анча-мунча қолдиқлари ҳозир ҳам масҳараబоз ва акробатларни тайёрлашда асқотади. Виктор Гюго "Кулаётган одам" асарида буларни хўб тасвирлаган... Ўлайманки, энди мени яхшироқ тушунаётгандирсиз. Ҳайвон танасининг бир жойини бошқа жойига кўчириш мумкинлигини ёки бир ҳайвон этини иккинчи ҳайвонга кўчириш имконияти борлигини, организмнинг кимёвий реакциясини, ўсиш ва ривожланиш характеристини, тана аъзолари харакатини ўзгартириш, ҳатто ички тузилишининг туб моҳиятини ҳам ўзгартириб юбориш эҳтимоли мавжудлигини тушуна бошлагандирсиз?

Шунга қарамай, токи бу иш билан мен шуғуллантунимга қадар, ҳозирги толиби илмлардан ҳеч қайсиниси бу фавқулодда илм соҳасига тартибли ва тугал қўл урмади. Қилинган бўлса, жарроҳлик илмининг сўнгги ютуқлари сифатида унча-мунча шу қабилдаги тасодифий ишлар қилинди, холос. Ўша ишлар ҳам, агар эсингизга тушаётган бўлса, аслида ўз ҳолича, мутлақо тасодифан жоҳил шахслар ёнки жиноятчилар томонидан, от ва ит ўргатувчилар, хуллас, ўз шахсий манфаатини кўзлаган турли тоифадаги фирт саводсиз, истеъоди бир пул одамлар томонидан амалга оширилди. Антисептик жарроҳлик билан қуролланган ҳолда, тирик организм қонуниятларини яхши билган олим сифатида бу муаммо устида биринчи бўлиб мен иш бошладим, десам бўлаверади.

Бироқ бу бундай ишлар илгари ҳеч қилинмаган, деганим эмас, номаълум уринишлар бўлган, албатта. Масалан, сиам

этизакларини олайлик... Ёки инквизиция даври зиндоңларидағи ишларни... Шубқасиз, уларнинг асосий мақсади даҳшатли қийноқ усулларини ўйлаб топиш эди, бироқ инквизициячилар ичида маълум илмий мақсадни кўзлаганлар ҳам топилган бўлиши мумкин.

— Бироқ, — дей унинг гапини бўлдим мен, — маҳлуқларингизнинг тили бор-ку!

У буни тасдиқлади ва вивисекциянинг имконияти фақат тана ўзгартириш билан чегараланмаслигини исботлай кетди. Масалан, чўчқа учун нима зарур бўлса, барини ўзгартириш мумкин. Ақлий фаолият организмга нисбатан кам ўрганилган. Айни кунда ниҳоятда ривожланган гипноз илми ҳали кўп эски инстинктларни янгича таъсир билан алмаштириш, мияга қаттиқ ўрнашган ёки мерос бўлиб авлоддан-авлодга ўтиб келаётган фикр-тушунчаларни келажакда пайвандлаш ёки кўчириб ўзгартириш имкониятларини ваъда қилмоқда. Биз ақлий тарбия деб атаган ҳодисаларнинг аксарияти аслида инстинктнинг сунъий ўзгартирилиши, бузилиши, холос; жанговарлик туйғуси ўзни мардона қурбон этиш деб, тийилган жинсий майл эса тақводорлик туйғуси дей сингдирила-веради. Одам билан маймун үртасидаги асосий фарқ асосан бўғизда, яъни маймуннинг фикр ифодаловчи фарқли товуш тутунчакларини ҳосил қила олмаслигига, деб изоҳлади Моро. Мен унинг бу фикрига қўшилмадим, бироқ у, худди эътиrozимни бир пулга олмагандек, гапимга қаршилик билдириб ўтирмади. Йўқ, худди шундай, дей фикрини такрор тасдиқлади-да, яна гапида давом этди.

Мен ундан тажриба учун нега айнан одам қиёфасини танлаганини сўрадим. Унинг бу танловида инсон қавмига нисбатан қандайдир хусумат яшириндек туюларди. Не ажабки, бу ҳис ҳозир ҳам мени тарк этгани йўқ.

Мутлақо тасодифан шундай бўлган, деб тушунтириди у.

— Ўзи-ку, худди шундай муваффақият билан секин қўйни ламага, ламани эса қўйга айлантираверсан ҳам бўларди. Биласизми, инсон қиёфасида ҳайвонникидан қандайдир фарқли, ниҳоятда кучли эстетик туйғу уйғотувчи нимадир бордек туюлди. Бироқ мен фақат одам яратиш билангина чегараланганим йўқ. Бир неча марта... — У бир дақиқа жим қолди. — Эҳ, бу ҳаёт! Сувдек оқди-кетди-я, умрим! Қаранг, сизни қутқараман, деб ўзи қимматли бир кунимни йўқотдим, яна бир соатдан бери лақиллаб, ҳисоб бериб ўтирганимни-чи?

— Лекин барибир мен сизни тушунолмаяпман, — дедим. — Тирик жонзотларни азобластганингизни нима билан оқлайсиз? Менимча, вивисекцияни фақат шу ҳолдагина оқлаш мумкинки, агар у...

— Ҳа, албатта, — дей илиб кетди Моро. — Бироқ, кўриб турибсизки, менинг маслагатим ўзгача. Умуман, биз иккимиз бошқа-бошқа қутбларданмиз. Сиз материалистсиз.

— Бўлмаган гап, мен мутлақо материалист эмасман, — дедим мен қизишиб.

— Менинг нуқтаи назаримдан шундай, ҳа, фақат менинг нуқтаи назаримдан. Зеро, биз битта масалада — азоб-уқубатлар масаласида келиша олмадик. Шуни билингки, токи сиз дод-фарёдларни эшишиб ёхуд азобланётганларни кўриб, қийналаркансиз, азоб-уқубатлар таъсирига бериларкансиз ва бу гуноҳ ҳақидаги дунёқарашибингизни белгилар экан, ҳайвондан заррача фарқингиз йўқ, фақат унга нисбатан хиёл тиниқроқ фикрлайсиз, холос. Бу азоб...

Унинг қувлиқ билан гапни айлантираверишидан сабрим тугаб, энсам қотган каби елка қисдим.

— Э, нақадар арзимас нарса у! Илм-фан билан машғул тафаккур унинг қанчалик арзимаслигини чуқур тушуниб етмоғи зарур! Эҳтимол, кичкинагина сайёрамиздан бошқа ерда — исталган юлдузга чиқиб-чиқмай, ортга қарасангиз, мутлақо кўринмай кетувчи шу юмалоқ коинот заррасидан нарида сиз билан биз азобу уқубат деб атаган тушунчанинг номи ҳам йўқдир. Балки биз эндигина тимирскилаб очаётган қонунлардан бошқа нарсанинг топилиши гумондир... Ҳатто биз яшаб турган заминда, тирик жонзотлар орасида ҳам азоб-уқубат дегани нима ўзи?

У шундай деб чўнтағидан пакки чиқарди, унинг ингичка тифли пичноқласини очди-да, оёғи менга яхшироқ кўринисин учун оромкурсида яқинимга сурилди. Сўнг шошилмай сийпалаб сонидан бир ерини танлади-да, пичноқ тифини фирч этиб санчиб олди.

— Шубҳа йўқки, буни биринчи марта кўришингиз эмас. Игна санчганчалик ҳам оғриқ сезилгани йўқ. Бу нимани кўрсатади? Оғриқни ҳис этиш сезгиси мускул учун шарт эмас, шу боис ҳам унда бу сезги йўқ; лекин терининг айрим жойлари оғриқни оз-моз сезиши мумкин, демак, соннинг ҳам у ер-бу ери уни сезиши керак. Умуман, оғриқ — бу худди шифокорлар каби бизни ташқи таъсиридан огоҳлантириб, эҳтиёткор бўлишга ўргатувчи ички маслаҳаттўйимиз. Барча тирик ҳужайралар, шу жумладан, асаб томирлари ҳам мутлақо оғриқ сезмайди, ҳаттоқи ҳиссий асаб толалари ҳам шундай. Кўз асаб ҳужайраларида ҳам чинакам оғриқ сезгиси бўлмайди. Кўз асаб ҳужайралари жароҳатланса, худди қулоққа зарар етганда шангиллагани каби, кўз олдида чақин чақнагандек бўлади. Ўсимликлар оғриқ сезишмайди, майда жониворлар — юлдузбалиқлар, қисқичбақа сингари жониворлар ҳам оғриқ сезишмаса керак. Одамларга келсак, улар қанчалик ақлан камол топсалар, шунча ўз жонларининг тинчини кўзлаб юрадиган бўладилар ва хавфдан огоҳлантирувчи омил — оғриққа камроқ муҳтоҷлик сезадилар. Мен тараққиёт жараённида эртами-кечми рад этилиши мумкин бўлмаган бирор нокерак нарса ҳақида эшигтан эмасман. Сиз-чи?

Мана кўрасиз, азоб туйғуси ҳам кераксиз бўлиб қолади бир куни.

Қолаверса, Прендик, мен барча бамаъни одамлар қатори художўйман. Балки тангрининг иродаси сиздан кўра кўпроқ менга аёндири, чунки мен бутун умрим мобайнида унинг илму амалларини қўлимдан келганча ўргандим, сиз, адашмасам, у вақт яланғоч шаталоқ отиб юрадингиз. Яна қайтариб айтаман: роҳат ва уқубатнинг жаннатга ҳам, дўзахга ҳам алоқаси йўқ. Роҳат ва уқубат! О! Тақводор кимсаларнинг ибодат чоғидаги жазаваси улар учун Мұхаммад пайғамбар айтган жанинатий роҳат-фароғатнинг ўзи эмасми? Фақат роҳат ва уқубат билангина кун кечираётган тумонат эркагу аёлда наҳот ҳайвонлик муҳри — ўзлари бино бўлган аждодларидан мерос муҳр сақланиб қолмаган, Прендик?! Токи сўнгти нафасимиз чиқиб, қаро ерга кирмас эканмиз, роҳат ва уқубат бизни ҳеч қачон тарк этмайди.

Кўрдингизми, мен илмий ишни ўзимча эмас, у ўзи бошлаган йўл бўйлаб давом эттиридим. Илмий иш таомили шу ўзи. Дейлик, мен бир муаммога дуч келиб, унга жавоб топиш йўлларини ахтардим, энди топдим, деганимда, у тағин бир янги муаммо туғдирди. Шундаймикан ёки бундай?.. Олим одам учун бу саволлар қанчалик муҳим эканини тасаввур этломайсиз, уни шу тобда қандай ақлий эҳтирос қамраб олишини билсангиз эди! Бу фикрий түғённинг гаройиб, таърифлаб бўлмас кайфини туйишни хаёлга ҳам сифдира олмайсиз. Қаршингдаги мутлақ ҳайвон ҳам, одам ҳам эмас, жумбоқ. Ачиниш ҳисси... у ҳақда эшитсан, қачонлардир унугтган нарсамни эслагандай бўламан. Мақсадим, бирдан бир мақсадим тирик организмнинг пластиклигини ипидан-игнасиғача мукаммал ўрганиш эди.

— Бироқ бу ўтакетган разиллик-ку, ахир! — дедим мен.

— Бу ишнинг маънавий томони мени заррacha қизиқтирган эмас. Табиатни ўрганган сари одам ҳам унинг ўзи каби бешафқат бўлиб бораракан. Мен фақат ишладим, кўзлаган мақсадимдан бошқа нарсани ўйламадим, қўлимдан чиққани форга кетаверди... Мен, Монтгомери ва олти нафар полинезиялик қўноқ бу ерга келиб тушганимизга, мана, ҳадемай, ўн бир йил тўлади. Ям-яшил сокин орол, бизни қуршаб турган бепоён океан худди кечагидек кўз ўнгимда. Оролни табиат баайни мен учун яратгандек эди.

Юкларни тушуриб, бошпана қуришга киришдик. Қўноқлар жарлик яқинида ўзларига капа тикилашди. Мен ўзим билан олиб келган ҳайвонлар устида иш бошладим. Дастлаб унча-мунча кутилмаган муваффақиятсизликларга ҳам дуч келдим. Ишни қўйдан бошлагандим, бироқ иккинчи куниёқ тиф сал нотўри кетиб қолиб, жони узилди. Иккинчи қўйга қўл урдим, кўп азоб чекди, жонивор, ахийри яралари битсин учун тек қўйдим. Ишни тугатганимда, у менга худди одамнинг ўзи бўлиб кўринган эди, бироқ пича вақт ўтгач, қараб-қараб ундан хафсалам пир бўла

бошлади, йўл қўйган хатоларим кўзимга аниқ кўринди, мени ниҳоятда ваҳм босди: бу жониворнинг онги оддий қўйникидан сира фарқ қилмасди. Тикилганим сари у кўзимга беўхшов кўринаверди ва бор-э, деб ундан воз кечдим-қўйдим. Қўй қавмида умуман юрак деган нарса бўлмас экан, билгани фақат қўрқув ва фарёд, салгина қўйинчилик билан юзма-юз келишди дегунча зир титрашади, хуллас, одам ясаш учун мутлақо тўғри келишмас экан улар.

Сўнг гориллага ўтдим, ниҳоятда эҳтиёткорлик билан ишлаб, кўп мاشаққатлар чекиб, биринчи одамни ясадим. Ҳафталаб, тунни тун, кунни кун демай ишладим, лекин барибир мақсадимга эришдим. Одам-ку, амаллаб ясашга ясалди, энди миясини қайта ишлашни айгинг; қанча нарсани қўшиш, ўзгартириш керак бўлди. У олдимда тайёр, ўраб-чирмалган, боғлиқ ҳолда қимир этмай ётаркан, ҳабаш ирқига бундан ортиқ мос келадиган нусха топилмаса керак, деб кўнглимдан ўтказардим. Яшаб кетишига ишонч ҳосил қилиб, сал-пал кўнглим тинчлангач, уни ёлғиз қолдириб, мана шу, биз суҳбат қураётган ҳужрага кирдим. Кирсам, Монтгомери ўтирибди, қарасам, иш чатоқ, худди сизнинг кўйингизга тушиб қолган. У ҳам худди сиз каби одамга айлантирилаётган маҳлуқнинг оҳ-воҳини эшлиб турган-да. Бошда унга кўп нарсани тушунириб ўтирамадим. Қўноқлар ҳам воқеадан хабар топиб, унча-мунча нарсага ақллари етиб қолган эди. Мени кўришса, эс-хоналари чиқиб, зир титрайдиган бўлиб қолишди. Монтгомерини эпини қилиб ўзим томонга оғдириб олдим. Иккаламизнинг ҳам дарду ҳасратимиз қўноқларни қочириб юбормасликда бўлиб қолди. Охири учтаси барибир жуфтакни ростлади, эвини қилиб бўлмади ва биз яхтадан ажрадик. Мен ихлос билан ясаган одамимни ўқита бошладим — бу тахминан уч-тўрт ойга яқин чўзилди. Унга оз-моз инглизчани ўргатдим, санашни машқ қилдирдим, ҳатто алифбони ёд олдиришга ҳам уриниб кўрдим. Мен ҳаётимда ундан бешбаттар уқувсиз гумроҳларни ҳам кўрганман, бироқ у ўргангунча жуда қўйналди. Ахир мияси байни топ-тоза дафтар вараги эди-да, ҳатто ўзининг келиб чиқишини ҳам билмасди, боёкиш. Яралари битиб, тузалиб, фақат айрим носоғлиқ алломатларию сал-пал оёқ оқсанши қолганда, оз-моз гапирадиган бўлганидан сўнг, уни қўноқлар олдига бошлаб келдим ва бу кимса энди сизлар билан яшайди, деб айтдим.

Даставвал уни қўриб қўноқларнинг кайфи учиб кетди. Бу мени бироз ранжитди, чунки ўз ижодим маҳсули ҳақида яхши фикрда эдим. Бироқ, у тушмагур шунаقا ёқимтой, алломат чиқиб қолдики, ҳаш-паш дегунча қўноқларни ўзига бутунлай ийдирди-олди, ҳатто унинг тарбияси билан ҳам ўзлари шуғуллана бошлашди. Унинг зеҳни ўткир, ҳар балони тез қабул қилиб, тез ўрганар, ўхшатиб тақлид қиласарди. У ўзига шунақсанги боп капа қуриб олдики, қўноқларнидан ўлса, ўлиги ортиқ эди. Қўноқлар ичидагитта сал тақводорроғи бор эди, ўша унга

ўқишиňи ўргатди, тўғрироғи, сал-пал ҳарф танитди; миясига оддий ахлоқ-одоб тушунчаларини сингдиришга уриниб кўрди, буни қарангки, унда маймунлик сифатлари намоён бўлмади.

Бир неча кун ишдан қўлим бўшаб, инглиз физиологларининг кўзи мошдек очилсин учун Англияга бу ҳақда ёзib юборайми ҳам дедим. Бахта қарши, бир куни унинг дарахт шохидаги ўтириб, жигига тегаётган иккита қўноқни гудиллаб сўкаётгани устидан чиқдим. Мен уни уришиб бердим, бундай қилиш ярамаслигини яхшилаб тушунтиридим, уялтиридим ва ижодим маҳсулини Англияга олиб боришдан аввал янада яхшироқ натижага эришишим керак, деган холосага келиб, хонамга қайтдим. Яхши натижаларга эришмадим эмас, эришдим; бироқ ишими мен истагандек астойдил юришиб кетмади, минг уринмайин, улардаги ҳайвоний қусур йўқолмади, кундан-кунга намоён бўлаверди, кундан-кунга... Аммо барибир мақсадимга эришишим бор. Нақадар қишин бўлмасин, барибир... Анави пума...

Бор гап шу. Қўноқлар битта қолмай ўлиб кетишиди. Бири баркасадан ағанаб, чўкиб ўлди, биттаси товонидаги ярага бўлмагур ўсимлик заҳри тушиб, жон берди. Яхтада қочган учтаси ҳам чўкиб кетган бўлиши керак. Қолган биттасини эса... ўлдиришиди. Начора, уларсиз ҳам кундалиқ юмушларимизни басарлашга мажбур бўлдик. Монтгомери дастлаб ўзини худди сиз каби тутди, кейин...

— Охирги қўноқ нима бўлиб ўлди? — дея чўрт кесиб сўрадим мен.

— Гап шундаки, бир қанча одамсифат мавжудотларни тажриба қилиб кўргач, яна битта маҳлуқни яратдим... — Моро шундай деб чайналди.

— Хўш, кейин-чи? — деб сўрадим мен.

— Уни ўлдиришиди.

— Тушунмадим, — дедим мен. — Айтмоқчисизки...

— Ўша ўлдириди қўноқни, энди тушунгандирсиз? Мавжудотларнинг ҳам бир нечасини тутиб, бошига етди. Уни ушлаймиз деб икки кун овора бўлдик. Тасодифан занжиридан бўшаб кетди, қочади, деб ким ҳам ўйлабди уни. Ўзи ишни энди бошлигандим, ҳали тўла битгани йўқ эди. Шунчаки, тажриба қилаётувдик... Ўзиям даҳшат эди-да: панжалари йўқ, калласи бир бало, ерда илонга ўхшаб судраларди. Кучи танасига сифмайди, қимирлагани сари оғриқдан тўлғониб биланглайди, ерда худди денгиз чўчқаси каби сузаётгандек ҳаракат қиласди. Йўлида нимаики учраса, уйини куйдириб, анча пайт ўрмонда яширин кун кечирди, изига тушганимиздан сўнг оролнинг шимол томонига қараб қочди. Уни қўлга тушириш учун иккига бўлинишимизга тўғри келди. Монтгомери мен билан бораман деб туриб олди. Қўноқда милтиғи бор эди, қарангки, унинг жасадини топганимизда милтиқ "S" ҳарфи шаклида букланиб, тамомила ғажиб ташланганди...

Иблисни Монтгомери отиб ўлдириди. Шундан бери фақат одам ёки майда-чуйда мавжудотларни тажриба қиласман.

У жимиб қолди. Мен унинг юзидан кўзимни узмасдим.

— Англиядаги тўққиз йилни ҳам қўшганда, йигирма йилдирки, шу ишни қиласман, бироқ яратган ҳар бир нарсамдан мени қониқтирмайдиган нимадир топилади ва яна янги тажрибаларга уннайман. Баъзан сал мақсадимга етгандек бўламан, баъзан узоқлашаман, ишқилиб, кўзлаган чўққимни ҳали забт этолганимча йўқ. Ҳайвонни одам қиёфасига ҳеч қийналмай кирита оламан, уни чайир ва чаққон ёки кучли ва баҳайбат қилиш ҳам қўлимдан келади; бироқ қўл ва тирноқларни ясаш масаласида мендан ожис одам йўқ: бу шу қадар нозик ишкни, асти қўяверасиз, ҳарчанд уринмайин, уларни сира ўхшатолмайман. Бироқ энг мураккаб иш — уларнинг миясини ўзгартириш. Яратилмиш мавжудотларнинг онг даражаси баъзан ўта паст ёки узуқ-юлуқ чиқиб қолади. Энг ёмони — буларнинг барчаси замирида алланечук англаб ва аниқлаб бўлмас ҳис-туйғулар ётгани. Кутилмаганда улардан инсоният учун зарарли интилиш, туйғу ва хоҳиш-ирода худди вулқондек отилиб чиқади ва мавжудотларнинг бутун борлигини ҳадик, адоват ва нафрат билан тўлдириб тоширади. Сизга бу маҳлуқларим кўзингиз тушганда ғалати ва жирканч кўринади, мен эса уларни яратган пайтимда росмана одамдек қабул қиласман. Фақат кейинчалик, уларни анча вақт кузатганимдан сўнгтина ҳафсалам совийди. Бирин-сирин хатти-ҳаракатларида ҳайвоний аломатлар қалқиб юзага чиқаверади, кўзга аниқ ташланаверади... Аммо барибир мен ғалаба қозонишим керак. Ҳар сафар тирик жонзотни ўт ловиллаб турган уқубат ўчогига ташлаганимда, ўзимга-ўзим, мана, энди ундан барча ҳайвоний сифатлар ёниб кул бўлди, лоқал шу гал ундан ўзим кўзлаган маҳлуқни бино қиласман, дейман, лекин қани энди?! Бир томондан, мундоқ ўйлаб қараганда, ўн йил муддат ҳеч нарса эмас. Инсон инсон бўлгунича минг йиллар кетган...

Шундай деб у маъюс ўй суриб қолди.

— Бироқ мен мақсадим сари яқинлашяпман... Анави пума...

Пича жимликдан сўнг у давом этди:

— Ҳайвон барибир ҳайвонлигини қилас экан. Сал назардан қочирдим дегунимча, эски қилиқларини эслаб, ҳайвоний сифатларини намоён эта бошлашади...

Яна орага узоқ жимлик чўқди.

— Маҳлуқларингиз бари анави горда яшайдими? — деб сўрадим мен.

— Ҳа. Уларда ҳайвоний хислатлар кўринди дегунча ўз ҳолларига ташлайман, ўзлари тез топиб олишади у ёқни. Бу ўйдан, айниқса, мендан ўлгудек қўрқишиади. Горда одамларга таассуб қилиб яшашиди. Монтгомери улар билан иноқ,

борди-келди қилиб туради. Битта-иккитасини бизга ёрдамлашиб, унча-мунча оғиримизни енгил қилишга ҳам одатлантирган. Менга айтишга уялади-ю, лекин сезаман: раҳми келади уларга. Албатта, менинг қаршилик жойим йўқ, бу унинг шахсий иши. Мен эсам уларни кўрганда фақат ўз ишимдан норизолик туйғусини туяман. Улар худди тақводор қўноқ ўргатиб кетганидек, онгли ҳаётга таассуб қилиб яшашади, шўрликлар. Улар ўзларича қонун деб номлайдиган бир нималар ҳам бор. "Ҳамма нарсага қодир яратгувчи"лари, яъни каминага атаб мадҳия ҳам ўқийдилар. Ўзлари ўзларига уя ковлашади, мева-чесва теришади, ўт-ҳашак йиғишади, ҳатто қалбларида нима борлигига қадар аён, уларнинг ҳайвондан бир туки ўзга эмас, ҳайвоний туйғулар — нафрат ва ҳирс уларга доимо ҳамроҳ, жўш уриб, ўзини намоён этиб туради. Хуллас, ўта ғаройиб бу маҳлуклар! Барча тирик жонзотлар каби, улар ҳам жуда мураккаб. Уларда қисман мағрурлик, қисман беҳуда жинсий майл, қисман ноўрин синчковлик мужассамлашган ғалати бир интилиш сезилади. Буни кўриб, менинг фақат кулгим қистайди... Лекин пумадан умидим катта, унинг боши ва миёси устида қаттиқ ишлайпман...

Шундай деб у узоқ вақт жим қолди. Биз иккимиз ҳам ўз ўй-хаёлларимизга ғарқ әдик.

— Хўш, — деди у ниҳоят, — нималарни ўйлаб кетдингиз? Ҳали ҳам мендан қўрқасизми?

Мен унга кўз ташладим, қаршимда рангпар, опілоқ сочли, қарашлари хотиржам мўйсафид ўтиради. Шу хотиржамлиги, қадди-бастининг улуғворлиги унга ҳусн бағишилаган, минг нафар хушбичим қария орасидан ҳам унинг яққол ажра либ туриши аниқ эди. Ичимда нимадир зил кетгандек бўлди, сағолига жавоб қайтариш ўрнига икки қўлимдаги тўлпончани унга тутдим.

— Сизда тураверсинг, — деди у эсногини босиб.

Ўрнидан қўзғалиб, менга бироз тикилиб турди-да, кулди.

— Икки кундан бери роса кунингизни кўрдингиз, — деди.

— Мана, келишиб ҳам олдик. Энди ётиб, дам олсангиз ҳам бўлар. Хўп, майли, тунингиз хайрли бўлсин!

У яна пича ўйланиб турди-да, сўнг ичкари эшикни очиб, чиқиб кетди. Мен дарров бориб ташқи эшикни қулфладим.

Сўнг яна жойимга келиб чўқдим, руҳим ланж, ҳам ақдан, ҳам жисмонан чарчаган ҳолда, ҳеч нарсани. ўйлагим келмай анча ўтиредим. Қорамтири дарча худди кўзга айланиб, мени кузатаётганга ўхшарди. Ниҳоят, ўзимни мажбурлаб, чироқни ўчирдим ва тўр беланчакка чиқиб ётдим. Сал ўтмай кўзим илинди.

## ҲАЙВОНСИФАТ ОДАМЛАР ТАЪРИФИДА

Үйқудан эрта тонгда уйғондим. Уйғонишим ҳамон Моро билан бўйлган кечаги суҳбат лоп этиб ёдимга келди. Беланчакдан тушиб, эшикнинг қулф- қулфмаслигини текшириб кўрдим. Сўнг деразага қопланган панжарани назардан ўтказдим. Бу маҳлуқлар одамга ўхшашгани билан ҳайвондан фарқлари йўқ, одам тусидаги қўрқинчли тасқаралар, холос, улардан не кутиш мумкинилиги менга ҳозирча қоронғи. Бу эса оддий қўрқувдан ҳам ваҳималироқ. Эшик тақиллаб, Млингнинг бўғиқ, манқа овози эшитилди. Тўпточончалардан бирини шу заҳоти чўнтағимга солиб, ўқ узишга ҳозирландим-да, эшикни очдим.

Млинг сабзавотдан тайёрланган одатдаги нонуштадан ташқари унча яхши пиширилмаган қуён гўшти кўтариб кирди ва менга салом берди. Орқасидан Монтгомери кириб келди. Кўзлари олма териб, ўша заҳоти қўлим чўнтағимдалигини илғади ва у зўрма-зўраки илжайди.

Ўша куни пумага дам берилди, ярлари битиб, тузалиши керак экан; бўш бўлишига қарамай, Моро одатига кўра кунни ёлғиз ўтказди, бизга қўшилмади. Мен эсам, фурсатдан фойдаланиб, Монтгомеридан ҳайвонсифат одамлар, уларнинг ҳаётини тўғрисида билмаган нарсаларимни сўраб-суриштирдим. Айниқса, бир нарсани — бу алвастиларнинг Моро ва Монтгомерига дахл этиб, сўнг бир-бирлари билан ғажишишларига нима монелик қилаётганини жуда-жуда билгим келарди.

Монтгомерининг гапига қараганда, Моро икковини омон сақлаб турган бирдан-бир нарса маҳлуқлар ақлий даражасининг чекланганилиги эди. Уларнинг онги бошқа ҳайвонларницидан анча юқори эканига қарамай, ҳайвоний туйгулари тез-тез уйғониб туришидан қатъи назар, улар онгига Моро сингдирган, ақлий фаолиятларини жиловлаб турувчи маълум қўйма ғоялар ҳам йўқ эмас эди. Улар чиндан ҳам гипнозланган, айрим нарсалар мутлақо мумкин эмас, айрим нарсалар эса таъқиқланади, деб ўргатилганди, бу таъқиқу чеклашлар мияларининг қатига шу қадар ўрнашгандики, уларга итоат этмаслик ёки қарши бош кўтариш ҳалокат ҳисобланарди. Шунга қарамай, айрим ҳолларда азалий туйгулар Моро сингдирган шартларга зид келиб қолар, бироқ бу доим ҳам аҳамият касб этавермасди. Қонун деб номланувчи қатор таъқиқлар (уларни қироат билан зикр тушишлари гувоҳи бўйланман) улар миясига мустаҳкам ўрнашган, бироқ қайсар ҳайвоний табиатлари билан доимо курашда эди. Улар тинимсиз развишда такрорлаб юрувчи бу Қонун ва, фикримча, Моро уларнинг қон таъмини билишларига имкони борича монелик қиларди. Моро ҳам, Монтгомери ҳам маҳлуқлар

томонидан бу таъмнинг туйилиши не балоларга сабаб бўлишини яхши тушунарди.

Монтгомерининг айтишича, ҳайвонсифат одамларда, айниқса, мушуклар қавмига мансубларида қоронги тушиши билан Қонундан қўрқиши ҳисси чекиниб, ҳайвоний хислатлар кучаяркан. Қош қорайиши билан уларнинг важоҳатлари ўзгариб, ўлжа кетидан қувиш истаги жўш урар, кундузи ҳеч журъат этолмайдиган ишларга шайланишаркан. Айнан шу сабаб оролга келган куним кечқурун мени қоплонсифат одам қувлаган экан. Бироқ оролга келган дастлабки кунларимда улар Қонунни хуфиёна, фақат тунда бузишарди, кундуз ёруғида эса жамики қонун-қоидаларга тўла итоат ва ҳурмат-эҳтиром ҳукм сурарди.

Энди орол ва унинг ҳайвонсифат аҳолиси хусусида айrim умумий маълумотларни айтиб ўтay. Қирғоғи эгри-буғри, пастқам бу оролнинг майдони нари борса етти ёки саккиз квадрат мил\* келарди. Ўзи вулқон туфайли вужудга келган, уч томондан ҳам маржон қоялар билан ўралган. Оролнинг шимол томонидаги доимий тутаб турадиган ер ёриқлари ҳамда қайнар булоқлар бир пайтлар оролни вужудга келтирган асов кучлардан нишона. Вақти-вақти билан сал-пал ер қимирлаши ҳам кузатилади, баъзи ёриқлар туриб-туриб буғ пуркаб қолади. Бундан бошқа деярли ҳеч нарса сезилмайди. Монтгомери берган маълумотларга кўра, оролда яшовчи асосий аҳоли Моронинг қўлидан чиқсан, чакалакзорларда яшовчи одамзот қавмига бегона майда жонзотларни ҳисобламаганда, олтмишдан ортиқ гаройиб тасқарадан иборат эди. Бундай мавжудотлар жами юз ийгираматача яратилган, бироқ аксарияти ўлиб кетган, айримларининг, Моро менга гапириб бергандагидек қўлсиз-оёқсиз, биланглаб, ўрмалаб юрадиганларининг эса баҳридан ўтилган. Улар кўпайишга яхшигина кўпайишаркан-у, бироқ насллари яшаб кетмас экан. Монтгомерининг айтишича, янги туғилганларнинг бирортасида ҳам инсонлик аломати бўлмаган. Моро улар билан ҳам шуғулланиб, айримларига инсон қиёфасини бахш этишга ҳаракат қилиб кўрибди. Аёллари эркакларга нисбатан озчиликни ташкил қилиб, сўқабошлиқ Қонунда қайд этилганига қарамай, аксарият эркаклар уларнинг кўнглини яширинча овлайверишаркан.

Мен ҳайвонсифат одамлар таърифини бекаму кўст келтиrol-майман — қўзим майда икир-чикирларни илгашга ожиз, афсуски, уларнинг суратларини ҳам сизга чизиб кўрсалотмайман. Улар афт-ангоридаги одамни ҳайратга соладиган нарса оёқларининг таналарига нисбатан калталиги эди; қаранг, ҳусн-тароват ҳақидаги инсон тасаввuri нисбий экан — бора-бора кўзим уларнинг ўша туришига ҳам кўнишиб қолдики, оқибатда, ўзимнинг узун оёқларим ўзимга эриш туюла бошлади. Яна бир жойи, уларнинг

\*Мазкур тавсиф Ноубл ороли тавсифига тўла тўғри келади. — Ч.Э.П.

юзлари олдинга бўртиб чиққан, беллари беўхшов букри, одамнига сира ўхшамасди. Ҳатто маймунсифат одамнинг бели ҳам одамни каби хипча, чиройли эмасди. Кўпчилигининг алкаси беўхшов туртиб чиққан, калта қўллари шалвираб, икки ёнига осилиб турарди. Ораларида юнглилар ҳам йўқ эмасди, бироқ ўта сержун, ўсиқ юнглилар кам эди, ҳар тугул, менга оролда яшаган даврим бундайлар дуч келмади.

Яна бир кўзга ялт этиб ташланувчи қусур уларнинг юз гузилишида зоҳир — деярли ҳаммаларининг даҳани олдинга туртиб чиққан, қулоқлари хунук, бурунлари дўрдайган, пачоқ, соchlари эса пахмоқ, дағал, кўзларининг тузи ҳам, ўрнашиши ҳам ўта ғалати эди. Уларнинг ҳеч қайсииниси жилмаёлмас, фақат маймунсифат одамгина базўр ишшаярди, холос. Бу умумий сифатларни ҳисобламаганда, уларнинг қиёфаларида сира ўхшашилик йўқ, ҳар бирида асл наслий сифатлари сақланиб қолган, гарчи улар одам қиёфасида эса-да, бу уларнинг аслида қоплон, ҳўқиз ё чўчқа эканликларини, бир ёки бир неча жонивордан бино бўлганликларини яширолмасди. Овозларида ҳам катта фарқ сезиларди. Қўллари сира қўлга ўхшамас, айримларини одамзот қўлини эслатгани билан, ҳар кимда панжа сони ҳар хил, тирноқлари дағал, бармоқлари ҳеч нарсани сезмасди.

Ҳайвонсифат одамлар ичida энг ваҳималиси қоплонсифат одам ҳамда сиртлон ва чўчқадан ясалгани эди. Баркасни соҳилга чиқарган уч нафар хўқизсифат одам баҳайбатлика улардан ҳам ўтарди. Улардан кейинда кумушсимон пахмоқ юнгли Қонун жарчиси, Млинг ҳамда қип-қизил масҳарабознинг ўзи — маймун билан эчки қоришуви натижасида юзага келган маҳлуқ турарди. Улардан ташқари яна уч нафар тўнгизсифат одам, битта чўчқасифат аёл, от ва каркидон чатишмаси ҳамда нимадан ясалгани менга номаълум бир қанча заифалар мавжуд эди. Яна анчагина бўрисифат одамлар, битта айиқ ва ҳўқиз қоришимаси ҳамда битта кўппаксифат одам ҳам бор. Маймунсифат одам тўғрисида аввал эшитгансиз; бундан ташқари, у ерда тағин бир ўлгудек жирканч, сассиқ, мен кўзим тушди дегунча ижирғанадиган урғочи тулки ва айиқдан бино бўлмиш кампир ҳам юради. Айтишларича, у ниҳоятда тақводор ва ўтакетган Қонун тарафдори эмиш. Улар ичida энг пачоғи беш-олти нафар ёш олачипор маҳлуқ ва ҳув, ўша ленивецга ўхшаш қизғиши тус миттивой эди.

Дастлаб бу маҳлуқларни кўриб, этим жунжикиб юрган бўлсам ҳам, ҳайвондан бир туклари ўзга эмаслигини билсан ҳам, барибир, аста-секин кўникдим, уларга худди Монтгомерига ўхшаб муомала қилишга одатландим. Монтгомери улар билан анчадан бўён мuloқотда бўлар, уларга тўлақонли одамлардек мулозамат кўрсатарди. Лондонда кечирилган ҳаёт унинг учун абадий ўтмишга айланган эди. У йилда бир мартағина Арикага —

Моронинг ҳайвонлар билан олди-сотди қилувчи таниши олдига бориб келарди. У ёқларда — испаниялик метис денгизчилар танда қурмиш жойларда инсон аталмиш хилқатнинг тузук намунаси учрармиди, дейсиз? Ҳатто кемадагилар ҳам унинг кўзига бу ердагилар менга қандай кўринса, шундай кўринибди — оёқлари беўхшов тарзда узун, юзлари япалоқ, пешоналари дўнг, ниҳоятда шубҳали, хатарнок ва бешафқат. Умуман, у одамларни жини сўймас эди. Каминага нисбатан озгина одамгарчилиги ҳам, ўзининг айтишича, мени қутқариб қолганида экан.

Назаримда, ўзга сийратдаги махлуқларнинг айримларига унинг хуфёна меҳри, қандайдир тушуниб бўлмас майли ҳам борга ўхшар, лекин у буни мендан яширишга уринарди.

Унинг малайи — ҳайвонсифат одамлар ичиди биринчи бўлиб кўрганим қора юзли Млинг барча махлуқлар қатори яшамас, тош девор ичиди, торгина бир каталакда турарди. Унинг ҳам ақл даражаси маймунсифат одамницидан сира фарқ қилмас, бироқ ҳайвонсифат одамлар ичиди уқувлироғи ҳам, одамга яқини ҳам шу эди. Шунгами, Монтгомери уни пишириш-кўйдиришига, бошқа енгил-елли уй-рўзғор юмушларини бажаришга ўргатганди. Млинг Моронинг даҳшатнок санъати ютуғи бўлиб, айик, ит ва хўкиз қоришмаси, хуллас, сидқидилдан яратилган мавжудот эди. У Монтгомерига жуда содик бўлиб, роса ҳурматини жойига қўярди; баъзи-баъзизда у буни пайқаб, Млингни эркалатса ёхуд ҳазиллашиб қайсиdir ном билан чақирса, у мамнун бўлиб, осмонга сакрарди; баъзи ҳолларда эса Монтгомери унга қаттиқ тегар, айниқса, маст пайти уни урар, тепки билан сийлар, тош ёки ёндирилган гугурт чўпини мўлжаллаб отарди. Бироқ Монтгомери сўйсин-сўймасин, бу дунёда унинг ёнида бўлишдек баҳт йўқ эди Млинга.

Ёдингизда бўлса, ҳайвонсифат одамларга нақадар кўниги борганим ҳақида юқорида айтгандим, қарангки, бошда ғайритабии туюлган нарсалар ҳам энди жўн, худди аслида шундай бўлиши керакдек кўриниб қолди. Балки чиндан мавжуд муҳит теварак-атрофда ҳам ўз аксини қолдирар. Монтгомери билан Моро шунаقا ўзига хос, аломат одамлар эдикি, улар даврасида инсон ҳақидаги азалий тасаввурларимнинг ўзаришсиз қолиши сира ақлга тўғри келмасди. Баркасдан юкларни туширишган қўпол ва баҳайбат хўкисифат одамлардан бирининг оғир қадам ташлаб, чакалакзор оралаб кетаётганини кўриб, оғзим очилади, жисмоний меҳнатдан эзилиб, ҳориб, уйига мункайиб қайтаётган шўрлик дечқондан унинг фарқи нима, дейман ўзимча. Афтида айёрлик акс этган ярим тулки, ярим айик аёлни учратганимда эса одамга хос ниманидир сезгандек бўламан, тавба, уни аввал қаерда, қайси шаҳарда кўрганман, деб ёқа ушлайман.

Албатта, ҳайвоний хислатлари вақти-вақти билан ярқ этиб

кўзга ташланиб ҳам қоларди. Уялардан бирига кираверишда чўнқайиб, ёввойи ҳайвонга ўхшаб ўтирган букир бир тасқарани ўзим кузатдим: у қўлларини олдинга чўзиб эснади, оғзи ланг очилиб, олмосдек ўткир, ваҳимали курак ҳамда бақувват, йилтироқ, қилични эслатувчи сўйлоқ тишлари кўринди. Ёки, дейлик, тор сўқмоқ бўйлаб юриб келаётганимда олдимдан оқ матога ўраб-чирмалган нозиккина аёл чиқиб қолади, қизиқиб, кўзига тик қарайман ва юрагим орқамга тортиб кетади, чунки кўз эмас, ғовакни эслатувчи бир балони кўраман; пастроқда эса исқирип либоси қатидан чиқиб турмиш эгри-буғри тирноқлари... Одам ҳайрон қоладиган яна бир жойи, бу антиқа мавжудотлар, аниқроғи, уларнинг аёл қавмига мансублари, келган кунимдан бошлаб, хунук, бедаво эканликларини сезибми, ҳатто одамлардан ҳам кўпроқ ўзларига оройиш берадиган, кийимларига қарайдиган бўлиб қолишиди.

## XVI БОБ

### ҲАЙВОНСИФАТ ОДАМЛАР ҚОН ТАЪМИНИ ТУЙДИЛАР

Ёзувчилик тажрибам бўлмагани учунми, калаванинг учини тез-тез йўқотиб, мавзудан четлашиб кетяпман. Ноңуштадан сўнг Монтгомери билан оролни айлангани, тутаб ётган ер ёриқлари, кечагина тушиб, оёғим куйган қайноқ булоқларни томоша қилгани чиқдик. Иккаламиз ҳам қуролланиб олдик — қўлимида биттадан ҳамчи, ўқланган тўппонча. Қалин чакалакзор оралаб юриб этдик, баногоҳ қуённинг жон аччиғида чийиллаган овози эшитилди. Тўқтаб, теварак-атрофга қулоқ тутдик, бироқ овоз бошқа такрорланмади. Биз йўлимида давом этдик ва пича ўтиб, бу ёдимииздан чиқди. Монтгомери диққатимни буталар орасида иргишилаб юрган бир неча пуштиранг, муштдеккина, орқа оёқлари узун мавжудотларга қаратди. Бу жониворлар Моро яратган ҳайвонсифат одамлар наслидан ясалган, дея уқтириди менга Монтгомери. Бошда уларни бир тирикчиликка яраб қолар, деган хаёлда ясаган экан, бироқ ҳайвонсифат одамлар туқсан болаларини ҳадеб еб қўяверишибди, хуллас, унинг бу умиди ҳам пучга чиқибди. Мен бунақа жониворни илгари — қоплонсифат одам қувган оқшом, сўнг эса Моро таъқибидан қочаётганимда кўргандим. Шу пайт туйқус улардан бири биздан қочаман деб шамол қўпорган даражат чуқурига тушиб кетди. Ҷуқурдан чиқиб улгурмасидан, биз уни тутиб олдик. Жонивор худди мушукка ўхшаб пихиллар, жонҳолатда орқа оёқлари билан депсинар, ҳатто тишлашга ҳам уринарди, бироқ унинг тишлари ўтмас, сал-пал чимчилагандек бўларди, холос. Бу жажжи жонивор мени жуда қизиқтириб қўйди, Монтгомерининг таъкидлашича,

улар ҳеч ер титишмас, кейин ниҳоятда покиза жонивор эканлар. Унинг бу гапини эшишиб, шаҳар атрофидаги боғларда қуён ўрнига шуларни кўпайтирса бўларкан, деб ўйладим.

Оҳиста қадам ташлаб кетиб борарканмиз, пўстлоғи узун-узун қилиб арчилган дараҳт рўпарасидан чиқиб қолдик. Монтгомери уни менга кўрсатиб:

— Дараҳтларнинг пўстлоғи шилинмасин — бу Қонун, — деди. — Аммо бунга ҳамма ҳам амал қиласкермайди!

Агар адашмасам, кейин сатир ва маймунсифат одамларга дуч келдик. Сатир Моронинг қадим ўтмиш ҳақидағи тасаввурлари маҳсулни эди. Унинг юз шакли худди эчкиникига монанд бўлиб, қўпол, беўхшов яҳудийлар башарасига ўхшашиб кетарди. Овози базур титраб чиқар, оёқлари худди рассомлар тасвирламиш шайтонникига ўхшарди. Енидан ўтаётганимизда у аллақандай қўзиқоринсифат мевани шиммоқда эди. Иккови ҳам эгилиб Монтгомерига салом беришиди:

— Иккинчи қамчидор оғамизга саломлар бўлсин!

— Қамчидор оғаларингиз энди учта, шу ёдларингда турсин!

— деди Монтгомери.

— Ие, ҳали у ясалган эмасми? — деди маймунсифат одам.

— Мен ҳам ясалганман, деб айтуди-ку?!

Сатирсифат маҳлуқ менга қизиқсениб тикилди.

— Учинчи қамчидор оға йиғлаб денгизга қочган, юзи оппоқ, ориқ.

— Айтиб қўяй, унинг қамчиси ингичка бўлгани билан узун, — деди Монтгомери.

— Кеча унинг ҳаммаёғи қон, йиғлаётганди, — деди сатир.

— Сизнинг ҳеч ерингиз қонамайди, сиз ҳеч қачон йиғламайсиз. Хўжайиннинг ҳеч ери қонамайди, у ҳеч қачон йиғламайди.

— Вой, сен, шумтака-ей! — дея хитоб қилди Монтгомери.

— Тилингни тий, яна ўзинг қон йиғлаб қолма.

— Унинг панжаси бешта, у менга ўхшаган беш панжали одам, — деди маймунсифат.

— Қани, кетдик, Прендиқ, — дея билагимдан тутиб, йўлга бошлади мени Монтгомери.

Сатир билан маймунсифат одам бир-бирига ғудиллаганча ортимиздан қараб қолишиди.

— У индамаяпти, — деди сатир. — Одам бўлса, гапиради.

— Кеча у мендан егани нарса сўраб юрганди, — деди маймунсифат. — Ўзи тополмалти.

Шу таҳлит яна алламбалолар деб ғудиллашди, сўнг сатир одамнинг кулгани эшитилди.

Қайтишда қуён ўлигига дуч келдик. Шўрлик жониворнинг қизғиши танаси тилка-пора бўлиб ётар, қовурғалари суюгигача ғажилган, гўштли жойлари ямланганди.

Буни кўриб, Монтгомери таққа тўхтади.

— Эй, худойим! — деб юборди у энгашиб, ерда сочилиб

ётган суюкларни яхшироқ кўриш учун қўлига оларкан. — Ё парвардигор, бу нимаси энди?

— Ҳайвонларингиздан қайси биридир эски одатини қўмсаб қолган кўринади, — дедим мен бироз сукутдан сўнг. — Қаранг, умуртқа ғажилган.

Монтгомери суюкларга тикилганча қотиб туарар, ранги бўзdek оқариб кетган, лаби қийшайиб, бурилиб қолганди.

— Иш чатоқ, — деди у, худди ўзига ўзи гапираётган каби пичирлаб.

— Бу мен учун янгилик эмас, — дедим. — Шунга ўхшаш ҳодисага келган кунимоқ гувоҳ бўлгандим.

— Нималар деяпсиз? Аниқроқ гапиринг, нимани кўрувдингиз?

— Боши узилган қуёnnи.

— Келган кунингиз-а?

— Ҳа, келган биринчи кунимоқ, кечки пайт, ташқарига чиққанимда, тош деворнинг ортидаги чакалакзорда. Боши сапчадек узиб олинган эди.

У чўзиб ҳуштак чалиб юборди.

— Бу ёғини сўрасангиз, қайси бир ҳайвонингизнинг иши эканига ҳам ақлим етиб турибди. Лекин бу шунчаки бир тахмин. Ўша жасадни учратишдан олдин иблисларингиздан бири яқинроқдаги жилғадан сув ичаётганини кўрган эдим.

— Тили билан чапиллатиб ичаётганими?

— Ҳа.

— Сув тил билан чапиллатиб ичилмасин — бу Қонун. Қаранг, Моро кўздан йироқлигига Қонунга улар қандай амал қилишаркан!

— Бу ўша, мени қувлаган иблис эди.

— Тушунарли, — деди Монтгомери, — йиртқичларнинг бўлгани шу ўзи. Ваҳшийликдан сўнг албатта сув ичишади. Қон таъми — мана, гап нимада. Қайсиниси эди? Кўрсангиз танийисизми?

Қуён жасади тепасида тураркан, у теварак-атрофга хавотирили алантлар, кўзлари чакалакзор бағридаги кўланка ва ғовлар, бизни қуршамиш хавф-хатарга тўла ўрмон бўйлаб олма-кесак терарди.

— Қон таъми, — деб такрорлади у тагин.

Сўнг ёнидан тўппончасини чиқариб, ўқланган-ўқланмаганини текшириб кўрди ва қайта чўнтағига солди. Осилган лаблари тез-тез уча бошлади.

— Танисам кераг-ов. Бошига тош билан уриб, сулайтириб қўйгандим. Яхшигина ғурра қолган бўлиши керак бошида.

— Қуённи ғажиган ўшами, йўқми, ҳали исботлаш керак, — деди Монтгомери. — Асли ўша бошоғриқларни олиб келмасам бўларкан, эҳ, аттанг.

Мен кетишга чоғландим, аммо у қимир этмас, дабдаласи чиққан қуён жасади устида боши қотиб, ўйланиб қолган эди.

Индамай нари кетдим, бироз юриб, қуён қолдиқлари кўринмайдиган ерга етгач:

— Кетдик! — деб чақирдим.

Фақат шундагина у хушига келиб, мен томон йўналди.

— Биласизми, — деди у паст овозда, — бу гумроҳларнинг барчасига ерда яшовчи тирик мавжудотларни еб бўлмайди, деб ўргатилганди. Алалхусус, улардан бирортаси қон таъмини тотган бўлса...

Анча жойгacha иккаламиз ҳам жим кетдик. Сўнг у, худди ўзига мурожаат қўлган каби:

— Ажабо, бу қандай юз берди экан? — деди.

Бироз жимлиқдан сўнг:

— Кечак тоза беъманни иш қилибман-да, — дея давом этди.

— Анави хизматкорим... Мен унга қуённи сўйиб, тозалаш ва пиширишни ўргатгандим. Шуниси қизиқки... У хумпар мириқиб бармоқларини ялаётганди. Йилгари сира бундай ҳолни кузатмагандим. Бунга дарҳол чек қўйишимиз керак. Бориб, Морога айтмасак бўлмайди.

Уйга қайтиб кетиб борарканмиз, унинг бутун фикру хаёли шу билан банд эди.

Янгилик Морога Монтгомерига нисбатан ҳам қаттиқроқ таъсир қилди, шуни айтишим керакки, улардаги қўрқув беихтиёр менга ҳам ўтди.

— Олдини олишимиз шарт, — деди Моро. — Шахсан мен буни қоплонсифат одам қилганига аминман. Лекин буни унинг бўйнига қўймоқ керак. Афсус, минг афсус, Монтгомери, гўшта бўлган нафсингизни оз бўлса-да тийиб, бунаقا бало-қазони бошлаб келмасангиз бўларди. Бошимизга энди бир фалокат ёғилмаса гўрга эди.

— Фирт эшак эканман, — деди Монтгомери. — Бироқ бўлар иш бўлди. Эсланг-а, ахир қуён сотиб олишни ўзингиз буюргандингиз-ку?

— Ҳамма ишни йиғиштириб, ҳозироқ шу билан жиддий шуғулланиш керак, — деди Моро. — Агар бирор кор-ҳол юз бергудек бўлса, Млинг ўзини-ўзи ҳимоя қила олармикан?

— Билмадим, бир нима дейишим қийин, — деди Монтгомери.

— Млингни яхши биламан-ку, аммо...

Ўша куниёқ Моро, Монтгомери, Млинг ва мен тўппа-тўғри оролнинг нариги томонидаги жарликка — унгурда жойлашган уяларга йўл олдик. Ҳаммамиз қуролланганмиз. Млингнинг қўлида ўзи ўтин ёриб юрадиган болта ва уч-тўрт бор юмалоқланган сим. Моронинг елкасида чўпонларнинг каттакон бургуси осиғлиқ.

— Сиз ҳозир ҳайвонсифат одамлар йиғинига гувоҳ бўласиз,

— деди менга Монтгомери. — Бу жуда қизиқ томоша.

Моро йўл бўйи миқ этмади, унинг жиддий оппоқ соқолли юзи маъюс эди.

Биз пари чиқиб турган қайноқ сувли жарликдан ўтдик,

чакалакзор оралиғидаги илонизи сўқмоқдан токи юзаси кўкиш-саргимтири кукунсимон парда билан (афтидан, у олтингугурт кукуни эди) қопланган кенг текисликка чиққунча юрдик. Ёввойи ўтлар ўсиб ётган соҳил ортида денгиз жимиилаб турарди. Каттагина пастқам жой — табиат яратган ўзига хос амфитеатр саҳнига етганда тўхтадик. Моро бурғусини чалди, унинг овози сукунат бағрини тилиб, олис-олисларга таралди. Азаматнинг ўпкаси хўп бутун экан, бурғу овози борган сари авжга минар, акс-садоси қулоқни йирттар даражага етиб қолганди.

— Уф! — деди Моро ниҳоят бурғуни тушириб.

Бирдан сарғиши қамишлар шитирлаб, куни кеча мен қочиб ўтган ботқоқлик бағридаги қалин ям-яшил чакалакзордан овозлар эшилди. Сўнг сап-сариқ текис сайдонликнинг уч-тўрт бурчидан бизга томон шошиб келаётган ҳайвонсифат одамларнинг бедаво сүмбатлари кўзга ташлинди. Қамиш ва дарахтлар панасидан бирин-сирин чиқиб, қуёшда жизиллаб ётган қум бўйлаб маймоқданиб келаётган бу бадбашара иблисларни кўриб, мени яна ваҳм босди. Моро билан Монтгомери эса заррача ҳаяжонланишгани ҳам йўқ, хуллас, истасам, истамасам — уларнинг ёнида қоқкан қозиқдек қотиб туришдан бошқа иложим қолмади. Биринчи бўлиб сатир одам етиб келди; тавба, аниқ соя ташлаб туришига ва түёғи теккан ердан чанг кўтарилаётганига қарамай, у бу дунё хилқатига сира ўхшамасди; унинг кетидан тўқайзордан яна бир алвости — от билан каркидон қоришмаси чиқиб келди, биз томон яқинлашаркан, ҳамон пичан чайнамоқда эди у; ортидан чўчқасифат хотин ҳамда икки нафар қашқирсифат аёл пайдо бўлди; сўнг эса қўzlари қип-қизил, юзи қабариқ тулки ва аниқ қоришмаси ҳамда қолган-қутган бедаволар ошиқиб етиб келишиди. Яқинлашар эканлар, улар Морога бўйлари баробар этилиб, таъзим бажо айлашар, бир-бирларига эътибор бермаган ҳолда Қонуннинг савт қисмидан парча ўқиб, зикр тушишарди: "Янчгувчи қўл унивидир. Шифо баҳш этгувчи қўл унивидир..." ва ҳоказо.

Бизгача, чамаси, ўттиз қадамча қолганда улар тўхташди ва ерга чўк тушиб, бошларидан тупроқ сепа бошлишди. Бир тасаввур қилинг-а! Биз, уч нафар кўкиш энгил-бошли шўрлик ҳамда бедаво турқи совуқ қарол мовий, мусаффо гардиш остида, офтоб жизгинак куйдираётган саргимтири текис майдонда, чўк тушганча қилиқ кўрсатаётган алвастилар қуршовида, айримлари, юзларида ва гавда тузилишларида акс этган айрим унсурларни ҳисоблагандан, туппа-тузук одамга ўхшовчи, айримлари майибу мажруҳ, яна бир қисми эса алоқ-чалоқ тушда кўрингувчи иблису алвости монанд маҳлуқлар даврасида турардик. Бир томонда бош-кети йўқ қамишзор, иккинчи томонда сайдонлик билан дара бағридаги уялар оралиғини қопламиш палмалар қуюқ ўсган ўрмон ва ниҳоят, учинчи томонда Тинч океанининг шимолга томон ястанган туманли уфқи кўзга ташланарди.

— Олтмиш икки, олтмиш уч, — дея санаб чиқди Моро. — Яна тўртта кам.

— Қоплонсифат одам кўринмайди, — дедим мен.

Моро шу заҳоти яна бурғуни чалди, унинг овозини эшитган ҳамон ҳайвонсифат одамлар ер бағирлаб эмаклаб, судрала бошладилар. Ниҳоят, қамишлар орасидан аста энгашганча, Моронинг кўзини шамғалат қилиб, жазава билан тупроқ тўзгитаётган подага яширинча қўшилиб олиш мақсадидаги қоплонсифат одам чиқиб келди. Ўша заҳоти кўзим унинг манглайидаги фуррани илғади. Охирида маймунсифат одам пайдо бўлди. Олдин келган жониворлар ер суруравериб, тоқатлари тоқ бўлган, жиги-бийронлари чиқиб, унга еб қўйгудек тикилардилар.

— Бас, жим бўлинглар! — деди Моро жаранглаган овозда, қатъий. Ҳайвонсифат одамлар дарров эмаклаш ва сифинишдан тўхтаб, кетларини ерга қўйдилар.

— Қонун жарчиси қани? — деб сўради Моро. Кулранг паҳмоқ маҳлуқ шу заҳоти боши ерга теккудай эгилиб, таъзим қилди.

— Қани, бошла, — деди Моро ва ўтирган оломон яна чўқкалаб, у ёндан бу ёнга чайқалганча, аввал ўнг, сўнг эса чап қўллари билан олтингугурт куқунини бошлари узра сочиб, зикр туша кетишиди.

Навбат: "Гўшт ва балиқ хомлайнин ейилмасин — бу Қонун", деган жумлага етганда, Моро оппоқ қоқсуяқ қўлини юқорига кўтариб:

— Бас, тўхтанглар! — дея қичқирди ва ҳамманинг бирдан овози ўчди.

Назаримда, улар нима юз беришини ҳис этар ва бундан аллақачон ваҳимага тушаётган эдилар. Мен эсам уларнинг ҳайратомуз ваҳимали юзларига тикилардим. Титраб-қақшаб, мўлтиллаб турган кўзларида яширин даҳшат қотиб қолганини кўриб, уларни қачондир одам деб ҳисоблаганимга ажабланардим.

— Худди шу таъқиққа хилоф иш содир бўлган, — деди Моро.

— Шафқат йўқ, — деди юз деган нарсадан мосуво кумушранг паҳмоқ маҳлуқ.

— Шафқат йўқ, — дея тақрорлашди тиз чўқмиш ҳайвонсифат одамлар.

— Қонунни бузган муртад ким? — дея қичқирди Моро қўлидаги қамчини ерга тарсиллатиб уриб ва уларнинг юзига тикилди.

Сиртлон ва чўчқа чатишмаси ҳамда қоплонсифат одам менга сал ўнғайсизланётганга ўхшаб кўринишиди. Моро чеккан азоб-уқубатларини эслаб, ваҳима оташида қовурилаётган маҳлуқларга тикилганча жим туриб қолди.

— Қонунни бузган ким, деяпман? — деб тақрорлади Моро, овози момақалдироқдай гулдираб кетди.

— Қонунни бузганинг касри тегмай қолмайди, — дея зикр тушарди Қонун жарчиси.

Моро қоплонсифат одамнинг кўзига шундай қаттиқ тикилдики, гўё шу қараши билан унинг ичини астар-аврасигача ағдариб, бор гапни билиб олмоқчидек туюлиб кетди.

— Қонунни бузган иблис... — деди Моро ундан кўзини узиб, биз томонга қарапкан. Унинг овозида қандайдир тантана зоҳирдек эди.

— ...уқубат уйига қайтажак, — дея бараварига илиб кетишди ҳайвонсифат одамлар. — Уқубат уйига қайтажак, о, қудратли оға!

— Қайтажак уқубат уйига, қайтажак, — дея бидирларди маймунсифат одам, худди бу фикр унга лаззат баҳш этаётгандек.

— Эшилдингми? — деди Моро айбдор томонга ўгириларкан.

— Дўйстлар... Ҳой!

У гапини тугатолмади — қоплонсифат одам, худди Моронинг нигоҳи сеҳридан қутулган каби, ўрнидан даст туриб, кўзларидан ёт чақнаганча йирик ваҳшиёна ўткир тишиларини йилтиратиб, ўз жаллодига ташланди. Бундай ҳамлага фақат бошга тушажак чексиз уқубат ваҳимасигина туртки бўлиши мумкин эди. Олтмиш нафардан ортиқ маҳлук гув этиб оёққа қалқди. Дарҳол тўппончамни чиқардим. Шу сония Моро ўзи яратмиш маҳлук билан тўқнашди. Қоплонсифат одамнинг зарбидан у қалқиб кетди. Бақириқ-чақириқ ва увлашлар оламни тутди. Атроф чанг-тўзонга тўлди. Ҳудди исён кўтарилди-ёв, деб ўйлардим мен шу тобда...

Қоплонсифат одамнинг газабнок юзи бир лаҳза лип этиб олдимдан ўтгандек бўлди — унинг кетидан Млинг таъқиб этарди. Шу пайт кўзим туйқус сариқ кўзлари газабдан ёниб турган сиртлон ва чўчқа қоришимасига тушди, важоҳатидан, у менга ташланмоқчидек эди. Унинг туртиб чиқсан елкаси оша менга сатир одам қараб турарди. Моронинг ўқ узгани эшитилди ва оломон узра чақмоқ чаққандек бўлди. Тўда ҳеч балога қарамай, олға ташланди ва мени ҳам домига тортиб, суринб кетди. Алҳол, мен ҳам айюҳаннос солғанча чопиб кетаётган тўда билан бирга қоплонсифат одам ортидан қувдим.

Эсимда қолтан бори — шу. Қоплонсифат одамнинг Морога ташланганини аниқ кўрдим, сўнгра ҳаммаёқ остин-устун бўлиб кетди, жоним ҳалқумимга тиқилиб чопиб кетганимни ҳам эслайман.

Млинг энг олдинда қувиб борар, қоплонсифат одам билан деярли бақамти келиб қолганди. Унинг ортидан тиллари бир ҳарич осилиб бўрисифат хотинлар йирик одимлар билан йўртиб боришарди. Улардан кейинда асабий ўқирганча оқ матога ўралган икки хўқизсифат одам лўқилларди. Ана улардан сўнг қолган ҳайвонсифат одамлар қуршовида Моро чопиб борар, кенг айвонли похол шляпасини шамол учириб кетган, қўлида тўппонча, ўсиқ оқ соchlари тўзгиб, ҳурпайган эди. Сиртлон ва чўчқа қоришимаси

менга елимдек ёпишганча, ёвуз нигоҳини узмай югуриб борарди. Қолган маҳлуклар бақириб-чақириганча ортимиздан тапир-тупур чопиб келишарди.

Қоплонсифат одам қаршисидан чиққан баланд ҳамиш пояларини жонҳолатда қайириб, ўзига йўл очар, ҳамиш сўталари ортидан бақамти таъқиб этиб келаётган Млингнинг юзига тарсиллаб уриларди. Биз ҳам ҳамишзорга етиб, улар ортидан йўл солдик. Ҳамишлар оралаб қувди-қувди яқин ярим милга чўзилди, сўнг қалин ўрмонзор бошланиб, юриш хийла қийинлашди. Оломон бўлиб босиб бораётганимизга қарамай, шоҳ-шаббалар юз-кўзимизни савалар, чирмовиқа ўхаш нарсалар ёқамиздан тортиб, почамизга ўралар, танамизни тиканлар санчиб, тимдалаб, уст-бошимизни юз пора қилмоқда эди.

— Бу ерлардан у иблис тўрт оёқлаб ўтган, — деди Моро нафаси бўғзига тиқилиб, у энди мендан олдинга ўтиб олган эди.

— Шафқат йўқ, — деди қув-қув талвасасидаги бўри ва айиқ қоришмаси нақ тумшуғим тагида тиржайиб.

Қува-қува қоялар орасидан чиқдик, олдинда қочқин кўринди, у тўрт оёқлаб чопиб борар, елкаси оша қайрилиб, бизга ирилларди. Ўнга жавобан тўда ичидан бўри наслининг шодон увлаши янгради. Қоплонсифат одамнинг кийими ҳали эгнида эди, олисдан унинг юзи худди одамнигина ўхшаб кўринар, фақат тўрт оёқлаб чопаётгани уни мушуксимонлар қавмидан эканини кўрсатар, елка куракларининг кўз илғар-илғамас чаққон ҳаракати ҳам таъқиб этилаётган мавжудотнинг ҳайвон эканидан далолат бериб туради. У сариқ гулли қандайдир тиконсимон бута устидан сакраб ўтди-да, кўздан ғойиб бўлди. Млинг ҳам деярли ўша бута олдига етганди.

Кўпчилигимизнинг нафасимиз тиқилиб, ҳаракатларимиз сустлашиб қолганди. Яланг жойдан ўтаётганимизда ортга ўгирилдим: энди биз тўп эмас, баайни ипга тизилган каби кетиб борардик. Сиртлон ва чўчқа чатишмаси ҳамон мендан кўзини узмай, ёнма-ён келар, онда-сонда мени майна қилаётгандек ишшайиб, ҳур-ҳурлаб қўярди.

Қоялар охирлагач, қоплонсифат одам келган куним мени қувлаган бурунга қараб кетаётганини тушуниб қолдию туйқус йўлни яна чакалакзорга бурди. Унинг муддаосини англатан Монтгомери йўлини тўсмоққа ошиқди ва чекинишга мажбур қилди.

Шу кўйи нафасим бўғзимга тиқилиб, қоя-тошларга қоқилиб-урилиб, тиканак-чўкиртакларга шилиниб, ҳамишу қирқулоқлар орасида уриниб-суриниб, Қонунни бузган қоплонсифат одамни тутиш ишига имдод кўрсатмоқда эдим, сиртлону чўчқа қоришмаси эса тишларини кўрсатиб, ваҳшиёна ишшайганча, ёнимдан бир қарич ҳам силжимай борарди. Бошим айланиб гандираклар, юрагим ҳовлиққанимдан қинига сиғмас, ўлардек чарчаганим,

буткул адойи тамом бўлганимга қарамай, шерикларимни кўздан қочирмасликка тиришардим. Акс ҳолда анави даҳшатли махлуқ билан ёлғиз қолишим турган гап эди. Ва мен куннинг қизифига ҳам, чарчаб, ит азобига тушганимга ҳам қарамай, олға чопардим.

Ниҳоят, қувди-қувди ҳовури бироз босилди. Биз у шўрликни оролнинг бир бурчига қисиб, олиб бориб қўйдик. Моро, қўлида қамчи, бизни ёй шаклида жисп сафга тизиб, олға бошлиди, олдинга интилар эканмиз, бир-биrimизга алланималар деб товуш берар, бирга-бирга ҳаракат қилардик, ўлжамиз эса борган сари ҳалқа орасида сиқилиб бормоқда эди. У сассиз, сезидирмай, ўзини ўша оқшом мен ундан қочиб, яширинган шох-шаббалар орасига олди.

— Эҳтиёт бўлинглар! — деб қичқиради Моро. — Эҳтиёт бўлинглар!

Сафимиз бу пайтда чакалакзорни қуршаб, қочқинни тўлиқ ҳалқа орасига олиб улгурганди.

Тўқайзор ичидан Монтгомерининг:

— Ташланиши мумкин, ҳүшёр бўлинглар! — деган овози эшитилди.

Мен бу пайт чакалакзордаги дўнгда туардим. Монтгомери билан Моро эса пастда соҳилни тит-лит қилишмоқда эди. Хуллас, узун-қисқа бўлиб, шошилмай бир-бирига чирмашиб кетган шох-шаббалар орасидан ўтиб борардик. Қочқин дамини ичига ютиб, биқиниб олганди.

— Уқубат уйига қайтади, қайтади уқубат уйига, қайтади!

— деган овози келарди маймун одамнинг йигирма қадамча наридан.

Буни эшитиб, раҳмим келганидан шўрлик қоплонсифат одамнинг ўзимга қилган зуғумини ҳам кечириб юборибман.

Ўнг томонда от ва каркидон қоришмасининг залворли туёғи остида шох-шабба ва новдаларнинг қисирлаб сингани эшитилди. Шу пайт кўзим тўсатдан бир-бирига чирмашиб кетган буталар орасида, қалин ўғсан ўт-ўланлар панасида турган биз қувиб келаётган қочқинга тушди. Жойимда таққа тўхтадим. У ғужанак бўлиб олган, елкаси оша бош буриб, яшил йилтироқ кўзларини менга тикканча қотиб қолганди.

Балки бу сизга ғалати, номутаносиб туюлар-у, лекин шу тобда рўпарамдаги мавжудотнинг ҳаққоний ҳайвоний тарзини, йилтираб турган кўзларию қўрқувдан буришган, одамникига унча ўхшамаган турқини кўриб туриб ҳам, барибир, унда одамга хос нимадир борлигини ҳис этардим. Яна бир муддат ва уни бошқа таъқиб этувчилар ҳам кўришади, қўлидан нима ҳам келарди — шўрлик қўлга тушади, яна тош девор ортидаги азобу уқубатларга гирифтор этилади... Мен шартта тўппончамни чиқардим-да, унинг даҳшат қотиб қолган кўзлари ўртасини нишонга олиб, тепкини босдим.

Шу лаҳзада сиртлону чўчқа қоришмаси ҳам уни илғади,

илгадиу жон-жаҳди билан чинқириб келиб, унга ташланди ва қонсиғраган тишларини унинг бўзига ботирди. Теварак-атроф, қалин чакалакзор остин-устин бўлиб, ҳаммаёқни қасир-қусур овозлар тутиб кетди, ҳайвонсифат одамлар чумолидай ёпирилиб келишарди. Кўз олдимда уларнинг бири қўйиб, бири пайдо бўларди.

— Ўлдирманг уни, Прендиқ! — дея қичқирди Моро. — Ўлдирман!

Уйғон қирққулоқлар орасидан энгашиб ўтиб келмоқда эди.

Етиб келиб, Моро қамчисининг сопи билан ура-ура сиртлону чўчқа қоришимасини ҳайдади, сўнг Монтгомери билан бирга ҳамон типирчилаетган ўлаксани тўсиб, унга сари талпинаётган асабий, қонга ташна ҳайвонсифат одамлар тўдасини (айниқса, Млинг улар орасида жонбозлик кўрсатарди) тарқатга бошлади. Кумушранг пахмоқ маҳлуқ нақ қўлтиғим орасидан ўтиб, ҳид олганича иссиқ мурдага яқинлашди. Қолганлар ҳам ҳайвоний қутқу билан мени итариб, ўлик томон талпинардилар.

— Аттанг, Прендиқ! — деди Моро. — У менга тириклиайн керак эди-я.

— Афсус, — дедим мен, аслида қилган ишимдан рози эсам-да.

— Бундай бўлади деб сира ўйламовдим.

Чарчоқ ва изтиробдан ҳолим қуриб, ўзимни оғир бетобдек ҳис қиласадим. Ортимга бурилдим-да, оломон орасидан туртина-суртина ўтиб, қиялиқдан тўғри бурун юқорисига қараб кетдим. Моро томоғи қырилгудек бўлиб берган кўрсатмага биноан, оқ матога чирмалган уч хўқизсифат сўлоқмон жонсиз танани сувга томон судраб кетишганини эшитдим.

Энди ёлғиз қолиши учун хатарли эмасди. Ҳайвонсифат одамлар мурдага худди инсонлардек оқибат кўрсатиб, хўқизсифат маҳлуқлар уни денгиз томон судрашаркан, пишқириб, гудиллаб, гала-гала бўлиб ортидан эргашиди. Мен эсам, зилдек оғир жасадни денгиз томон судраб кетаётган хўқизсифат одамларни кузатганча, бурун сари юқорилардим. Улар шом қоронғисида қорайиб кўринишарди. Шу тобда миямга худди денгиз тўлқинидек ёпирилиб, оролда содир бўлаётган воқеа-ҳодисаларнинг бари даҳшатли даражада бемаъни, беҳуда эмасми, деган фикр келди. Пастда, олис қоялар орасида Моро билан Монтгомерининг атрофида маймунсифат одам, сиртлону чўчқа қоришимаси ва яна бир неча ҳайвонсифат одамлар уймалашишарди. Уларни ҳали асабийлик тарк этмаган, барчаси бир бўлиб, узвос согланча муқаддас Қонунга нисбатан ўзларининг содиқлигини холисанилло намойиш этмоқчи бўлардилар. Бироқ мен ич-ичимдан қуёnlар ҳалокатида сиртлону чўчқа қоришимасининг ҳам ҳиссаси борлигини сезиб турардим. Мени яна бир ғалати ҳиссият чулғаб олгандики, тавба, шакл-шамсийлар нақадар хунук, беўхшов бўлишига қарамай, кўз ўн гимда инсон турмуш тарзи ўзининг борранг-баранглиги, тўйғулар олами ва тасодифлари билан акс этиб

туарди. Фақат ўлган жонзот росмана одам эмас, қоплонсифат одам эди. Бор фарқи — шугина, холос.

Шўрлик маҳлуқлар! Кўз ўнгимда Моро даҳшати ўзининг бор қирралари билан намоён бўлиб бораради. Илгари Моронинг қўлига тушиб чиқсан бу шўрпешона жоноворларда даҳшат ва уқубат қандай муҳр қолдириши мумкинлигини сира ўйламаган эканман. Тош девор ортида кечирган азоб-уқубатларинигина ҳисобга олиб, даҳшатга тушиб юравериман. Гап аслида бутунлай бошқа нарсала экан. Ҳайвонлик пайтлари уларнинг ҳис-туйғулари атроф-муҳитга уйғун мослашган бўлган ва тайинки, ҳар қандай жонзот ҳаётдан қанчалик баҳра олиб яшаса, улар ҳам шундай баҳраманд яшаганлар. Бироқ энди уларнинг оёқ-қўллари бөғлиқ, ғайришуурый инсоний шартларга бўйсунгандар, ўзлари асло тушунмайдиган Қонун деб атальмиш тарки маҳол қўркувга бандилар; инсон ҳаётига бундайин нобоп тақлид фақат азоб-уқубатлардан бошланди ва адоқсиз ички курашлардан, Морога нисбатан ниҳоясиз қўркувдан, ҳадикдан иборат бўлиб қолди. Буларнинг барчасидан кўзланган пировард мақсад нима? Айнан шу бемаънилик мени ғазаблантиради.

Мабодо, Моро бирор менга ҳам тушунарли мақсадни кўзлаганда, жилла қурса, унга хайриҳоҳлик билдирган бўлурдим. Мен ўзимни азоб-уқубатларга мутлақо қарши, ўта кўнглибўш одамлар тоифасидан деб ҳисобламайман. Башарти, унинг бу қилмишларига нафрат турткি бўлганида ҳам индамай кечирадим. Аммо у буларни хаёлига ҳам келтирмас, парвоини фалак, кўнглига нима келса, шуни бажарарди! Табиатан ҳар бало-баттарларга қизиқиши, мақсаду маслаксиз қабиҳ изланишлари уни шу йўлга бошлаган ва унинг қўлидан янги тур маҳлуқлар курашиш, адашиш ҳамда охири дўзах азобида ўлиб кетиш учун потирлаб чиқарилаверган. Бадбаҳтлик уларнинг пешоналарига ёзилтанди: қонларидағи наслий ҳайвоний қусурлари мудом қутқу солиб турар, фақат Қонунгина муқаррар қонли тўқнашувларга йўл қўймай келарди.

Ўша кунларда денг, ҳайвонсифат одамлардан қўрқиб юрган одам энди Мородан қўрқадиган бўлиб қолдим. Мазам қочиб, ниҳоясиз азобга гирифтор бўлдим, бу қўрқув, изасваса охир-оқибат миямда шундай чуқур асорат қолдирдики, ҳеч сўраманг. Оролдаги бемаъни жабр-зулмни кўриб, боқий дунёнинг одиллигига ҳам ишонмай қўйдим. Қандайдир бешафқат тегирмон жонзотларни қийиб-қиймалаб, маҳлуқларни ясар, иттифоқс, мен ҳам, Моро ҳам (илмга муккадан кетгани туфайли), Монтгомери ҳам (ичкилика ружу қўйгани боис), ҳис-туйғулариға содик, онг даражалари паст ҳайвонсифат одамлар ҳам -- ҳаммамиз бир гўр бўлиб, ана шу тегирмоннинг беаёв тишлари орасида тажилаётгандек эдик. Бироқ бундай руҳий ҳолатга мен дарров ту шғаним йўқ... Чамаси, бу ҳақда гап очиб, мизуздан илгарилаб кет, ётётганга ўхшайман.

## Ф А Л О К А Т

Орадан беш-олти ҳафта ўтди ва Моронинг гайриинсоний тажрибаларидан кўнглим бутунлай совиб, дилимда унга нисбатан нафратдан ўзга ҳеч нарса қолмади. Фикру зикрим қандай бўлмасин тезроқ одам зотини мазахловчи маҳлуқлар яратгувчисидан қутулиш, ўзимга ўхшаш кўнгилга хуш кимсалар билан чин инсоний муносабатларга қайтиш бўлиб қолган эди. Мендан йироқдаги ҳамтовоқ дўстларим кўзимга шу қадар тинч, роҳат-фароғатда кўринишардики айни дам, беихтиёр уларга ҳавасим келарди. Монтгомери билан қалинлигим ҳам узоқча чўзилмади. Одамлардан узоқ вақт йироқда бўлгани, ичкилика ниҳоятда мойиллиги, ҳайвонсифат одамларга нисбатан очиқдан-очиқ хайриҳоҳлиги ундан аллақачон кўнглимни совутган эди. Бир неча марта анавилар олдига у билан бирга боришдан бош тортдим, Монтгомери ўзи бориб-келиб юрди. Мен шундоқ ҳам ўзи ҳайвонсифат одамлар билан мулоқотдан ўзимни олиб қочардим. Асосий вақтимни ёрлақиб, бирор ҳалоскор кема кўриниб қолармикан, деган илинжда соҳилда ўтказардим. Кемадан-ку, тайинки, дарак йўқ эди. Умрим то бир кун бошимизга фалокат ёғилиб, оролдаги ҳаётни остин-устин қилиб юбормагунча, шу зайлда кечиб турди.

Бу воқеа оролга келганимдан етти-саккиз ҳафтача кейин содир бўлди. Балки, ундан ҳам кейинроқ юз бергандир — билмадим, вақт ҳисобини аниқ юритганим йўқ. Фожия ҳеч кутилмаганда, эрта тонгда, чамаси, соат олтиларда содир бўлди. Ўша куни каллаи саҳарлаб ҳовлига ўтин таший бошлаган ўнтача ҳайвонсифат одамнинг қий-чувидан эрта уйғондим.

Нонушта қилиб, ташқарига чиқдим, очиқ дарвоза олдига бориб, мусаффо тонг ҳавосидан тўйиб симиридим-да, тамаки тутатдим. Кўп ўтмай тош девор бурчидা Моро кўриниб, мен билан сўрашди. Ёнимдан ўтди-да, сўнг орқа томонимда тажрибахона эшигининг шарақлаб очилгани, унинг тап-туп қилиб ичкарига киргани эшитилди. Менда бу пайтга келиб оролдаги чексиз даҳшатларга аллақачон кўникма ҳосил бўлганди, шу боис Моро дўзах азобига гирифтор этаётган шўрлик пуманинг, навбатдаги дод-фарёдини этим жунжикмай, ёътиборсиз қабул қилдим. У азроилини шунаقا чинқириқ билан кутиб олдики, бундай жазавага фақат асаби қақшаган аёл зотигина қодирдек эди назаримда.

Сўнг эса нимадир бўлди. Ҳозирга қадар ўшанда ичкарида нима юз бергани менга қоронғу. Орқамда бақириқ-чақириқ ва ниманингдир гурсиллаб ағнагани эшитилди, ўғирилиб қарасам, мен томон даҳшатли бир нусха яқинлашиб келяпти, на одам ва на ҳайвонга ўхшайди, бамисоли ажина дейсиз, қоп-қора,

ҳаммаёғи қонталаш чандиқ, ярларидан қон томчилаяпти, киприксиз кўзлари йилтиллайди. Ўзимни ҳимоя қилиш учун қўлимни кўтартганимни биламан, кучли зарбадан олдинга муккамдан кетдим, қўлим қирс этиб синганини сездим. Бошдан-оёқ тангиги бояланган, ҳаммаёғидан қонга беланган бинтлар осилиб турган баҳайбат иблис эса устимдан бир сакраб ўтдию кўздан ғойиб бўлди. Мен ётган алфозда қирғоқ томон юмаладим, ўзимни ўнглаб, ўтиришга уриндим, бироқ синган қўлим тагимда қолса бўладими. Сўнг Моро кўринди, унинг ранги ўчиб кетган, бўлиқ кенг юзи пешонасидан сизиб оқаётган қонга ўйалиб, ғаърфлаб бўлмас даҳшат касб этганди. У, қўлида тўппонча, менга шунчаки кўз қирини ташлади-да, пуманинг ортидан чопди.

Соф қўлим билан уриниб, аранг ўтириб олдим. Рўпарамда қирғоқ бўйлаб катта-катта қадамлар билан сакраганча, аъзойи бадани ўраб-чирмалган иблис югуриб борар, унинг ортидан Моро қувиб кетмоқда эди. Махлуқ хиёл орқасига ўгирилиб, Морони қўриб қолди, ва кутилмаганда йўлни чакалакзорга бурди. Сакраб-сакраб, борган сари Мородан узоқлашмоқда эди у. Махлуқ бора солиб ўзини чакалакзорга урди, ушлаб олиш умидида қўлини олдинга чўзганча ортидан қувиб келаётган Моро иложисиз унга қарати ўқ узди, аммо ўки хато кетди — иблис ғойиб бўлди. У билан изма-из яшил бутазор ичиди Моро ҳам кўздан ўйқолди.

Уларни кузатарканман, қўл оғриғим шу қадар кучайдики, инграганча гандираклаб ўрнимдан туриб кетдим. Остонада Монтгомери пайдо бўлди, у кийиниб олган, қўлида тўппонча ушлаб турди.

— Э худо, яна нима бало, Прендик?! — деда қичқирди у, қўлим синиб, майиб бўлганини ҳам сезмай. — Анави иблис қоҷдими? Деворга қоқилган қозиқлардан ҳам сугурилиб чиқибдида! Уларни кўрдингизми? — Шу дам у қўлимни чангаллаб турганимни сезди ва: — Ие, нима қилди? — деб сўради.

— Эшик олдида тургандим, — дедим мен.

У яқин келиб, қўлимни ушлаб кўрди.

— Кўйлагингиз қон, — деди у, енгимни шимараркан. Тўппончасини чўнтағига солиб, қўлимни яна оғритиб пайпаслаб кўрди ва мени суяганча уйга етаклади.

— Қўлингиз синипти, — деди у ва: — Гапиринг, нима бўлди ўзи? — деда сўроқлади.

Бўлган воқеани узуқ-юлуқ, ора-сира инграб-синграб гапириб бердим, бу орада у тезгина қўлимни боғлаб, бўйним оша ўтказилган ипга осди-да, хиёл ўзини ортга ташлаб, менга тикилди.

— Жойида, — деди у ва қўшиб қўйди: — Энди нима қилдик-а?

У ўйланиб қолди. Сўнг чиқиб дарвозаларни беркитди, нимагадир ҳаяллаб кетди.

Менинг бутун дарду фикрим қўлимда эди. Бўлиб ўтган воқеа оролда юз бермиш даҳшатли ҳодисаларнинг навбатдаги биттасидек туюларди худди. Оромкурсига жойлашиб ўтиридим-да, юракдан чиқариб оролни лаънатлай бошладим. Қўлим аввал зирқираб, сўнг эса бора-бора қаттиқ ачишиб оғрий бошлади, шу лаҳза оstonада Монтгомери кўринди.

Унинг ранги қув ўчиб кетган, пастки лаби ҳар галгидан ҳам осилиб тушганди.

— Ер ютганми, нима бало, улардан ном-нишон йўқ, — деди у. — Балки Морога ёрдамим керакдир. — У маъносиз кўзларини менга тикиди. — Кучли экан, иблис. Деворга қоқилган темир қозиқлардан суғурилиб чиқиби-я.

У олдин дераза, сўнг эшик ёнига борди-да, тағин менга ўтирилди.

— Топмасам бўлмайди, — деди у. — Мана бу тўппончани олинг, аскотиб қолар.

У тўппончасини олиб, ёнимга, столга ташлади ва мени ғамга солиб чиқиб кетди. У кетгач, хонада узоқ ўтира олмадим. Тўппончани ушлаб, эшик томон йўналдим.

Атроф сукутга чўмган, ҳаёт нафаси сезилмасди. Қилт этган шабада йўқ, денгиз сатҳи ойнадек йилтирас, осмон мусаффо, соҳил бўм-бўш эди. Бу мудҳиш сукунат юрагимга баттар ваҳима солди.

Ҳұштакда куй ҳиргойи қилиб, чалғишига уриндим, аммо бундан ҳам бир наф чиқмади. Яна бўралаб сўқиндим, эрталабдан бери бу иккинчи сўқинишим эди. Сўнг тош девор бурчагига ўтиб, Моро билан Монтгомерини ютмиш кўм-кўк чакалакзорга тикилдим. Улар қачон келишади энди? Ишқилиб, соғмиканлар?

Қирғоқдан олисда митти кулранг ҳайвонсифат одам пайдо бўлди, чопқиллаб сувга тушди-да, шалоплатиб сув сачратда бошлади. Мен худди қўриқчи аскар каби эшиқдан бурчакка, бурчакдан эшикка томон тинимсиз бориб-кела бошладим. Бир вақт қулогимга олисдан Монтгомерининг овози чалингандек бўлди, "Мо-о-ро! Мо-о-ро-ю!", деб чақиради у. Қўлим энди уччалик қаттиқ оғримас, фақат иситмада ловуллаб ёнарди. Аъзойи баданимни безгак тутар, томогим қуриб, сув ичгим келарди. Қўланкам борган сари қисқариб бормоқда эди. Олисда кўринаётган кулранг махлуқдан токи ғойиб бўлгунча кўз узмадим. Наҳот, Моро билан Монтгомери энди буткул қайтишмаса? Уч нафар денгиз қуши тўлқин қирғоқча чиқариб ташлаган аллақандай матоҳни талашиб, чўқишаради.

Бир маҳал узоқда, тош девор ортида ўқ овози янгради. Узоқ жимликдан сўнг бу овоз яна такрорланди, яқингинадан кимнингдир қаттиқ бақиргани эшитилди ва яна мудҳиш сукунат

чулғади. Хаёлимга ҳар хил бўлмағур нарсалар кела бошлади. Яна шундоққина яқин жойда ўқ узилди.

Юрагим така-пука бўлиб, бўрчакка чопдим, у ерда юзига қон тепчиган, соchlари тўзғиган, шимининг тиззалари йиртиқ Монтгомери туради. Унинг мурданикини эслатувчи юзида даҳшат қотиб қолган эди. Ортидан оёқларини зўрга судраб босиб ҳайвонсифат одам — Млинг келар, даҳани теграсида қандайдир қўркінчли қора-қура доғлар кўзга ташланарди.

— У қайтдими? — деб сўроқлади Монтгомери.

— Мороми? — деб сўрадим. — Йўқ.

— Ё парвардигор! — дея худди ҳаво етишмаётгандек бўғилди Монтгомери. — Ичкарига кирайлик, — деди сўнг қўлимдан тутиб. — Улар бутунлай қутириб кетишибди. Бари ҳар ёқда тўзғиб юрибди. Нима гап экан-а? Ҳеч балога ақлим етмай қолди. Сал нафасимни ростлаб олай, ҳаммасини айтиб бераман. Ичгани ҳеч нарса борми?

У мендан олдинда оқсоқланиб ичкарига кирди ва ўзини оромкурсига ташлади. Млинг оstonага етмай ерга ётиб олди, у худди итга ўхшаб ҳиқилларди. Мен Монтгомерига озроқ ароқ ва сув келтирдим. У тўғридаги бўшлиққа тикилганча меровсираб ўтиради, бироқ секин-аста ўзига келди ва пичадан сўнг рўй берган воқеани сўзлашга тушди.

Уларнинг изидан анча тентирабди. Пайҳон бўлган, синган шоҳ-шаббалар, пумадан тушиб илиниб қолган оқ бинт парчалари, у ер-бу ерда баргу япроқларга томган қон томчилари изларидан боришига кўмак берибди. Бироқ мен қоплонсифат одамни сув ичаётганида кўрган жилгадан ўтиб, тошлоқ ерга етганда изни йўқотиби ва таваккалига, Моронинг исмини айтиб чақирганча гарб томонга кетаверибди. Млинг, пуманинг қочганидан бехабар, ўрмонда ўтин кесиб юрган экан, хўжасининг овозини эшишиб, олдига борипти. Улар икковлон Моронинг исмини айтиб чақирганча кетаверишибди. Йўлда икки нафар ҳайвонсифат одам пайдо бўлибди, писмайиб буталар орасидан изма-из кела-веришибди, уларнинг хатти-ҳаракатлари сирли, имо-ишоралари бежо эмиш, Монтгомери дарров гумонсирабди. Уларни чақирган экан, худди гуноҳ иш қилгандек, тирақайлаб қочиб қолишибди. Шундан сўнг у Морони чақиришни бас қилиб, бирпас нима қиласини билмай сандироқлагач, гордаги уяларни бир текшириб кўришга жазм этибди.

Фор бўм-бўш экан.

Дам сайин юраги ҳаприқаверибди ва у изига қайтибди. Йўлда мен дастлабки кун ўрмонда рақс тушаётганини кузатган икки чўчқасифат одамни учратибди, иккаласининг ҳам оғзи қон, асабий титрашармиш. Улар қирққулоқларни қасира-қусур синдириб чиқиб келишибди ва уни кўриб, ғазабу важоҳатда таққа тўхташибди. У хавотирга тушиб, қамчисини тарсиллатган экан, бирдан ташланиб қолишибди. Шу кунгача бирорта ҳам

ҳайвонсифат одам бундай қилишга журъат этолмаган экан. Монтгомери бирининг қоқ миясидан отиб улгурибди, Млинг эса иккинчисига ташланибди, улар юмалаб, олишиб кетибди. Млинг уни босиб, бўғзидан олган экан, Монтгомери фурсатдан фойдаланиб уни ҳам нариги дунёга жўнатибди. Млингни ортидан эргашишга мажбур қилиши осон кўчмаганимиш.

Шундан сўнг улар бу ёқса қайтишибди. Йўлда келаётисиб, Млинг бирдан ўзини бутазорга урибди ва у ердан пакана ёввойи мушуксифат одамни ушлаб, судраб чиқибди, унинг ҳам тумшуғи қон, оёғи эса ярадор, оқсармиш. У тавия ҳам озгина юргач, иш кўрсатибди: четта тисарилибди-да, важоҳат билан уларга ташланиб қолибди. Кўринишидан, Монтгомери уни осонгина ертишлатган.

— Нима бало бўляпти-я, ўзи? — деб сўрадим мен.  
У бошини сарак-сарак қилганча, яна стакангага қўл чўзди.

### XVIII Б О Б

## МОРО ТОПИЛДИ

Монтгомери учинчи қадаҳни ҳам бўшатгач, аралашишга мажбур бўлдим. Унинг аллақачон кайфи ошиб қолганди. Морога бир жиддий кор-ҳол бўлди, йўқса, шу пайтгача қаерда бўлмасин, етиб келарди, бундай қўлни қовуштириб ўтиравермайлик, излаш керак, дедим унга. Монтгомери бир оз тайсаллади-ю, лекин кўнди. Озгина тамадди қилиб олдик-да, учаламиз ҳам йўлга тушдик.

Бу, балки, ўша пайт асабим ниҳоятда таранглигидандир, бироқ ҳозир ҳам ўша илиқ тропик чошгоҳ паллада йўлга тушиб, тентираганларимиз кўз олдимдайн кетмайди. Млинг мункайганча олдинда борар, гаройиб, тим қора калласи шиддат билан у ён-бу ён бурилиб, йўлнинг ҳар икки томонини сергак кузатиб борарди. Унинг қўлида ҳеч нарса йўқ, болтачasi ҳам чўчқасифат одамлар билан тўқнашув чоғи йўқолган эди. Бордию иш яна олишувга тақалса, тиши бор, ҳар тугул, ундан фойдаланиш тажрибаси ҳам йўқ эмас. Монтгомери гандираклаганча унинг ортида борарди, икки қўли чўнтағида, боши қути солинган; ичишига монелик қилганимгами, кайф устида озгина мендан ранжиб қолганди. Менинг чап қўлим бўйнимга осиғли (яхшики, чап қўлим), ўнг қўлимда тўппончани маҳкам ушлаб олгандим.

Оролнинг қалин ёввойи ўсимталари оралаб, тор сўқмоқдан шимоли фарб томон юрдик. Млинг дабдурустдан тўхтаб, ҳушёр тортиди. Монтгомери унга урилиб кетай деб, тақалиб тўхтади. Қулоқ тутиб жим қолдик, пича ўтмай, дараҳтлар орасидан овозлар ва оёқ товушлари эшитилди. Улар биз томон яқинлашарди.

— У ўлди, — деди қандайдир паст, титроқ товуш.

- Ўлгани йўқ, ўлгани йўқ, — дея ғўнғиллади яна бири.
- Кўрдик-ку, кўрдик-ку, — деди бир неча овоз.
- Ҳой! — деб бирдан қичқириб қолди Монтгомери. — Ҳой, менга қараларинг!

— Оббо! — дедим мен ва дарҳол тўппончамни ҳозирладим. Орага жимлик чўқди, сўнг қалин кўм-кўк чакалакзорнинг ҳали у ери, ҳали бу ери шитирлаб, бирпасда атрофимизда беш-олтитача гаройиб башара пайдо бўлди, уларнинг юз ифодалари янгича тус олиб, ўзгариб қолишганди. Млинг бўғзидан ириллагандай товуш чиқарди. Улар орасидан маймунсифат одамни дарҳол ажратдим — уни олдинроқ овозидан таниган эдим; яна Монтгомери билан баркасада кўрганим — оқ матога ўраб-чирмалган иккита маҳлуқни ҳам осонгина илгадим. Уларнинг ёнида ҳамма ёғини дод босган олачишор иккита маҳлуқ турар, яна ўша букри, соchlари чаккасини ёппа қоплаган, қалин қошлиари ўсиқ, эшилиб кетган тарам-тарам соч ўрамлари сўйри пешонаси узра ликиллаб ўйнаётган кумушранг пахмоқ — Қонун жарчиси ҳам бор эди; баҳайбат, юз деган нарсадан мосуво бу маҳлуқ кўм-кўк тўқайзор ичидагалати қизил кўзларини бизга тикканча турарди.

Анча вақт ҳеч кимдан садо чиқмади. Ниҳоят, Монтгомери ҳиқиҷоқ аралаш овозда:

- Ким, уни ўлди деяётган? — деб сўради.
- Маймунсифат одам гуноҳкорларча кумушранг пахмоққа қаради.
- У ўлган, — деди пахмоқ маҳлуқ. — Манавилар кўришибди.
- Аслида, рўпарамиздагилардан қўрқишининг сира ҳожати йўқ эди. Уларнинг ўзлари биздан қўрқиб-писиб, юракларини ҳовучлаб туришарди.
- Қаерда у? — деб сўради Монтгомери.
- Анави ёқда, — деди кумушранг пахмоқ қўли билан кўрсатиб.
- Энди ҳам Қонун борми? — деб сўради маймунсифат одам.
- Энди ҳам у мумкин, бу мумкин эмас, деган гаплар борми?

— Унинг ўлгани ростми?

— Энди Қонун борми, йўқми? — дея такрор сўради оқ матога ўраб-чирмалган одам.

— Қонун борми, йўқми, сендан сўраяпман, иккинчи қамчидор оға? У ўлибди-ку, — деди кумушранг пахмоқ.

Ҳаммаларининг кўзи бирдек бизга қадалган эди.

— Прендик, — деди Монтгомери, сўниқ, нурсиз кўзларини менга тикиб. — Унинг ўлгани ростга ўхшайди.

Мен унинг орқасида турардим. Уларнинг авзойи ўзгараётганини дарров сездим. Монтгомерининг олдига лип этиб ўтлим-да, овозимни барадла қўйиб:

— Қонун фарзандлари, у ўлгани йўқ, — дея хитоб қилдим.

Млинг менга ўткир нигоҳини қадади.

— У ўз қиёфасини ўзгартирди, бошқа тусга кирди, — деда давом этдим мен. — Маълум вақтгача сиз энди уни кўрмайсиз. У... анави ёқда, — деб осмонга ишора қилдим. — Ўша ердан у сизларни кўриб туради. Фақат сиз уни кўрмайсиз, холос. У эса кўради. Қонундан қўрқингиз!

Шундай деб маҳлуқларнинг кўзларига тик боқдим. Улар иккиланиб қолишиди.

— У буюк, у шафқатли, — деди маймунсифат одам, қалин дов-дараҳтлар оша осмонга хавотирли тикилиб.

— Анави маҳлуқ-чи? — деб сўрадим мен.

— Анави ҳаммаёғи қон, чинқириб, дод солиб қочган маҳлуқ ҳам ўлди, — деди менга тикилиб турган кумушранг пахмоқ.

— Жуда соз бўпти, — деда гудранди Монтгомери.

— Иккинчи қамчидор оға... — деб оғиз очди тағин кумушранг пахмоқ.

— Хўш? — дедим мен.

— Уни ўлган, деди-ку.

Бахтимизга, Монтгомери нима учун Моронинг ўлимини рад этаётганимни тушунмас даражада кайф эмасди.

— Йўқ, у ўлган эмас, — деди у оҳиста. — Асло ўлгани йўқ. Мен қандай тирик бўлсам, у ҳам шундай тирик.

— Баъзилар, — дедим мен, — Қонунни бузишди, унга хилоф ишлар қилишди. Уларга шафқат йўқ. Уларнинг айримлари аллақачон ўлишди. Қани, кўрсатинг, қаерда унинг собиқ танаси? У бу танани тарқ этган, чунки ортиқ унга муҳтож эмас.

— Анави ерда, о, қўрқмай денгизга қочган оғам, — деди кумушранг пахмоқ.

Шундай қилиб, биз қалин қирқулоқлар, чирмовуқ-лианалар, қаққайиб турган дараҳтлар оралаб, шимоли ғарбга — олти алвости бошлаган томонга қараб йўл олдик. Қандайдир қичқириқ ва шохларнинг қирсиллагани эшитилди, ёнимиздан митти қизгиш жонивор чинқирганча чопиб ўтди. Зум ўтмай, унинг кетидан ҳамма ёғига қон сачраган, серюнг маҳлуқ пайдо бўлди, шу қадар шитоб билан чопиб келардик, ўзини тўхтатгунча бўлмай, олдимизга келиб қолди. Кумушранг пахмоқ бир сакраб ўзини четта олди; Млинг ирриллаб, серюнг маҳлуққа ташланди, бироқ ўзи ер тишлиб қолди. Монтгомери тўппончасини ишга солди, аммо ўқи хато кетиб, қўли билан бошини тўғсанчча қочишига чоғланди. Мен ҳам маҳлуққа қаратса ўқ уздим, аммо у тап тортмай, бостириб келаверди; шунда унинг тасқара башарасини мўлжаллаб, яна тўппонча тепкисини босдим. Уни худди оловли чақин ургандек бўлиб, юзининг дабдаласи чиқиб кетди; шунга ҳам қарамай, у мени четлаб ўтиб, Монтгомерига ташланди, уни ерга ағдарди-да, жон талвасасида ортидан судраб кетди.

Бир вақт қарасам, мену Млинг турибмиз, ерда жонсиз ҳаётон ҳамда одам юзтубан тушиб ётибди. Монтгомери зўрга ўзини

ўнглаб, қўзғалди ва ёнида қонга беланиб ётган ҳайвонсифат одамга донг қотиб тикилди. Бу унинг бор кайфини ҳам учирив юборди-ёв. Инқиллаб, аранг оёққа турди. Рўпарадаги дараҳтлар орасидан эҳтиёткорлик билан мўралаб кумушранг пахмоқ кўринди.

— Кўриб қўй! — дея ўлиб ётган маҳлуққа ишора қилдим.  
— Хўш, Қонун йўқ эканми? Қонунни бузишнинг оқибати шу бўлади.

У ер тишилаб ётган жасадга тикилди.

— У жон олгувчи ўт пуркайди, — дея бўғиқ товушда Қонун жумлаларидан бирини такрорлади.

Қолганлар ҳам тўпланиб, мурдага тикилганча туриб қолишиди. Ниҳоят, биз оролнинг гарбий бурчига ҳам етиб келдик. Сал юриб пуманинг тажиб ташланган, дабдала жасади устидан чиқдик, елка суюгини ўқ буткул ўпириб кетганди. Ундан йигирма қадамча наридан эса излаган нарсамизни топдик... Моро қамишзор орасидаги топталган ерда юзтубан тушганча ётарди. Унинг бир қўли билагидан узилган, кумушранг соchlарида қон қотиб қолганди. Боши пуманинг кишани билан мажаҳланган кўринарди. Атрофидаги пайҳон бўлган қамишларга ҳам қон сачраган. Тўппончасини топа олмадик. Монтгомери жасадни чалқанчасига ағдарди.

\* \* \*

Гоҳ-гоҳ тўхтаб, дам олганча, етти ҳайвонсифат одам кўмагида (у ниҳоятда бўлали одам эди) жасадни қароргоҳимизга элтдик. Тун пардаси қорайиб, қуюқлашмоқда эди. Йўлда икки марта ёнимиздан бақириб-чинқириб, қандайдир жониворлар шарпасиз чопиб ўтишиб, бир марта пакана ленивецга ўхаш мавжудот юз кўрсатди-ю, бирпаст тикилиб туриб, фойиб бўлди. Йўлда қайта ҳужум хавфи туғилмади. Дарвоза олдигача кузаттгач, ҳайвонсифат шерилларимиз қайтишиб, биз билан ичкарига фақат Млинг кирди. Дарвозани қулфлаб, Моронинг дабдаласи чиққан жасадини ҳовлидаги қуруқ шоҳ-шаббалар устига қўйдик.

Шундан сўнг тажрибаҳонага кирдик-да, ниманини тирик топган бўлсан, барини битта қолдирмай ўлдириб чиқдик.

## XIX Б О Б

### МОНТГОМЕРИНИНГ "БАЙРАМИ"

Ишларни тинчтиб, ювиниб, овқатлангач, Монтгомери билан ҳужрамга кирдик-да, илк бор айни дамдаги аҳволимиз ҳақида жиддий мулоҳаза юритишга уннадик. Вақт ҳам ярим кечага яқинлашиб қолганди. Унинг кайфи деярли тарқаб кетган бўлса-да, барибир, боши ғум, гап уқмасди. Тайинки, у Моронинг таъсирига жуда берилган шахс эди. Моро ўлиши мумкин, деган гап унинг ақлига ҳеч сифмасди. Юз берган фожиа унинг ўн йиллар

мобайнида, балки ундан ҳам ортиқ шу оролда яшаб, кўниккан бир йўсингдаги ҳаёт тарзига кутилмаганда берилган зарба эди. Унинг гаплари унча қовушмас, саволимга жавоб беришдан ўзини олиб қочар, умуман, юзаки гаплардан нарига ўтмасди.

— Бу bemaza дунё ўзи шунака, — деда фалсафа сўқирди у.

— Ҳаёт деганлари ҳам гирт беҳуда нарса. Шунча яшаб, мен нимани ҳам кўрдим? Ҳеч балони! Ҳайронман, қаҷон кўрарканман. Роппа-роса ўн олти йил энага ва ўқитувчиларнинг амру фармойишларига бўйсуниб, титраб яшадим, беш йил Лондонда тиббиёт илмининг тагига етаман, деб оч, юпун, "ит ётиш, мирза туриш" қабилида кун кечирдим, гуноҳ ишлар қилдим ва бир куни келиб йўлдан оздим, ахмоқлигим оқибатида шу лаънати оролга тушиб қолдим. Ўн йил-а, ўн йилдан бери шу ерда сарсонман-а! Ҳўш, нима учун, Прендик? Наҳот, биз болалар пуфлаб учирадиган совун кўпиги бўлсак?

Унинг bemaza сафсалари энсамни қотираради.

— Ҳозир фақат бу оролдан қандай қилиб кетишни ўйлашимиз керак, — дедим мен.

— Ҳўш, кетганда нима фойда? Мен бир бадарға қилинган одам бўлсанм. Қаерга ҳам бораман, кимга ҳам керакман? Сизнинг йўриғингиз бошқа, Прендик. Бечора Моро! Уни қандай қилиб бу ерларга ташлаб кетамиз, суягини маҳлуқлар ғажисинми? Бу турган гап, ахир... Қолаверса, анави шўрликлар-чи, уларни нима қиласмиш?

— Хўй, майли, — дедим мен. — Бу ҳақда эртага гаплашармиз. Балки қуруқ шоҳ-шаббалардан гулхан ёқиб, жасадини анави ёнидагиларга қўшиб, куйдирамиз... Нима, ҳайвонсифат одамларга жин тегармиди?

— Билмадим. Йиртқич ҳайвонлардан ясалганлари эртами, кечми — барибир, аслига қайтса керак. Улар, ахир, кўпчилик, ҳаммасини қириб юборолмаймиз-ку? Дарвоқе, кейин сизнинг инсонларварлигингиз ҳам бунга йўл қўймаса керак... Бироқ улар барибир ўзгаришади. Мени айтди, дерсиз, шундай бўлади.

Унинг валдираши јаҳлим чиқиб, жоним бўғзимга келиб қадалгунга қадар давом этди.

— Садқаи одам кетинг-э! — деда ўшқирди у, бир пайт гапини қайтарганимга жаҳли чиқиб. — Наҳот менинг аҳволим сизникидан юз чандон ночор эканини тушунмаяпсиз?

Шундай деда ўрнидан иргиб турди-да, бренди олиб келгани ўйналди.

— Мана бундан ичинг заҳрингизга, — деди у қайтиб келиб.

— Ичинг, тийрак ақлли, олий ирқа мансуб, худосиз фаришта.

— Керак эмас, ичмайман, — дедим мен ва ичиб, гап уқмас, лақма бўлиб бораётганига зарда қилиб, чироқнинг сарғимтири нури ёритиб турган башарасига тикилганча, тумтайиб ўтиравердим. Ҳали-ҳали эсимда, итдек чарчаган эдим ўша куни. У эзилиб эзмаланар, энди Млинг ва бошқа ҳайвонсифат одамларга

тарафкашлик қилишга тушганди. Қадримга етган бирдан-бир одам — шу Млинг, деб айтарди у. Шу тобда беҳос ниманидир эслади чоғи:

— Жин урсин мени! — деди у гандираклаб ўрнидан тураркан, бренди шишасини бўғзидан тутамлаб. Унинг ниятини ички бир сезгим билан пайқадим.

— Ҳайвонга ичкизиб бўлмайди, — дедим мен жойимдан ирғиб туриб, унга юзланарканман.

— Ҳайвон? — дея ўшқирди у. — Ўзингиз ҳайвонсиз! Бандаси ичган нарсани у ҳам ичади. Йўлдан қочинг, Прендиқ!

— Худо ҳаққи... — деб ёлворишга тушдим мен.

— Қоч!.. — дея ўшқирди у кутилмаганда тўппончасини чиқариб.

— Ҳўп, жуда соз, — дедим мен ва ўзимни четга олдим, унинг тўппонча лўқидонини тортаётганини кўриб, бир орқасидан ташланиб қолайми ҳам дедим, бироқ қўлим носоғлигини ўйлаб, фикримдан қайтдим. — Гирт ҳайвоннинг ўзи бўп қопсиз, боринг, қўшмозор бўлинг ўша ҳайвонларингиз билан.

У шарақлатиб эшикни очди-да, менга хиёл ўгирилганча оstonада тўхтади, уни бир томондан чироқнинг сарғиш ёғдуси, иккинчи томондан эса ойнинг хира шуъласи ёритарди; қалин қошлари остидаги кўз косалари дона-дона, йирик қора доғларга ўхшаб кўринарди.

— Сиз, Прендиқ, ўта мутакаббир, гирт ахмоқ одамсиз! Нуқул ваҳима қилганингиз қилган, яна алламбалоларни ўйлаб чиқарганингиз ортиқча! Ўзи ҳаммаси тамом, охири кўриниб турибди. Эртами-индин куним битиши аниқ. Бироқ бугун оқшом шундай ажабтовур байрам қиласки!

У бурилиб, ой ёруғига чиқди.

— Млинг, — дея чақирди у. — Қадрдоним Млинг!

Нимқоронги қирғоқда, олисда, ойнинг хира ёғдуси остида уч нафар шарпа кезарди, бири оқ матога ўраб-чирмалган маҳлуқ эди, қолган иккитасини эса таниб бўлмасди, худди иккита қора доғ маҳлуққа эргашиб кетаётганга ўхшарди. Улар тўхтаб, тош девор томонга аланглашди. Худди шу фурсат тош девор бурчагида Млингнинг лўқиллаб келаётган гавдаси ҳам кўринди.

— Ичинглар! — дея қичқиравди Монтгомери. — Ҳой, ҳайвон биродарлар, ичиб қолинглар! Ичиб, одам бўлинглар! Худо ҳаққи, дунёда ҳаммадан ақлли ўзим эканман. Моро буни билмади. Ниҳоят, сўнгти синов вақти ҳам етди. Ичинглар, деяпман, ичаверинглар, тортинманглар! — Шундай деб, у шишани боши узра айлантирганча гарб томон йўртиб кетди, ортидан уч нафар шарпани эргаштирганча Млинг ҳам ўша томонга чопди.

Мен эшик олдига келдим. Ойнинг хира ёруғида улар олислаб, ноаниқ шарпаларга айланниб улгуришганди. Бироқ шу лаҳза Монтгомери тўхтади ва Млингта брендини сувсиз, қуруқ ўзини

иичирди, пича ўтиб эса бешала шарпа ҳам қўшилиб, бир бутун, иоаниқ қора тўлга айланди.

— Қўшиқ айтинглар! — деган қичқириги эшитилди Монтгомерининг. — Қани, баравар: "Прендикни жин урсин!", деб бақиринглар. Жуда соз. Яна такрорланглар: "Прендикни жин урсин!"

Қора тўп яна беш алоҳида шарлага ажралди-да, ойнинг хира ёғдуси остида қирғоқ бўйлаб аста узоқлай бошлади. Уларнинг барчаси кўнглига сиққанча бор овозда айюҳаннос солишар, шаънимга ҳар турли бўлмагур сўзларни айтишар, хуллас, ўз билгиларича илгари татиб кўрмаган ичкиликларининг кайфу сафосини суришарди.

Сал ўтиб олисдан Монтгомерининг:

— Ўнгта марш! — деган буйруги янгради ва улар бақириб-чақириб, соҳилдаги қорайиб турган дараҳтлар қўйнига кириб кетиши. Секин-аста овозлар ҳам тинди.

Яна сокин тун сафоси ҳокимликни қўлга олди. Ой аллақачон гарбга оғмоқда эди. Вақт ярим тунга яқинлашган, шу боис у ҳозир роса тўлишиб, ўзидан ёрқин ёғду сочиб, чароён осмонда аста сузарди. Тош девор сояси қорайиб, оёғим остига тушиб турарди. Шарқ томонда дениз кулранг тусда товланиб, сирли йилтилларди. Дениз ва тош девор оралиғидаги вулқон зарралари ҳамда кристалл кукунидан тўшалган кулранг қумлоқ йилт-йилт этиб товланаарди. Ортимда эса қизғиши-сарғимтири нур таратиб, чироқ милтилларди.

Эшикни ёлиб қулфладим-да, ўзининг сўнгти қурбонлари — този итлар, лама ва бошқа бир неча шўрлик жониворлар билан ётган Моро олдига, ҳовлига чиқдим. Унинг бўлиқ юз қиёфаси ўзгармаган, ҳатто даҳшатли ўлимдан сўнг ҳам бамайлихотир кўриниар, ҳамиша жиддий қўzlари очиқ, кўкдаги оппоқ, руҳсиз ойга тикилганча ётарди. Мен оқава сувларга мўлжалланган мўри четига кетимни қўйиб, жасадлар узра омикта ўйнаётган ойнинг кумушсимон нури ҳамда ваҳимали кўланкаларга тикилганча, бу ёғига қандай иш тутиш маъқуллиги ҳақида ўй сурин қолдим.

Эрталаб унча-мунча озиқ-овқат жамғариб, қайиқка жойлайман-да, манави жасадларга ўт қўйиб, очиқ океанга чиқаман. Монтгомери ҳақида ўйлаш энди бефойда; у ҳайвонсифат одамлар билан руҳан бир, инсоний ҳаётга кўника олмайди. Шу асно бу ерда қанча хаёл сурин ўтиридим — билмайман. Бир соатдан кам ўтирган бўлсан кераг-ов. Диққатимни яна шу яқин ўртада пайдо бўлган Монтгомери бўлди. Бир тўда махлуқнинг шодон бақириқ-чақириқлари эшитилди, улар чуввос солиб ҳайқириб, чинқириб, увлаганча қирғоқ томон ўтиб боришарди, сув бўйига етиб тўхташди. Қий-чув бир авж олиб, сўнг босилгандек бўлди, қулогимга тарақа-турӯқ овозлар, ёғочларнинг қасир-қусур сингани эшитилди, бироқ бунга ўша пайт унча парво қилмабман. Пича ўтиб қовушмаган овозда қандайдир ашула бошлашди.

Яна миямда қандай қилиб бу ердан қочиш, қутулиш мумкин, деган ўй чарх урди. Ўтирган еримдан туриб, чироқни олдим-да, саройга, сув солинган бочкаларни текширгани юрдим. Сўнг сухарили бонкаларни бир кўрай-чи, деб, бирининг оғзини очдим. Шу лаҳза кўзимга қизғиш алламбало гавда кўрингандек бўлдию оптимга ўгирилдим.

Ховлида қоронгулик ичра ой нури кезиб юарди. Ўртада Моро ва унинг қийма-нимта қурбонлари ётқизилган қуруқ шоҳ-шаббалар уйилган. Улар, худди ҳаёт-мамот жангига киришгандек, айқаш-уйқаш ётишарди. Моронинг яралари байни тун каби қорайиб, очилиб қолган, ерга томган қон қум устида қорамтири доф касб этиб, қотиб қолганди. Сўнг — кўзимга кўриндими, билмай қолдим — рўпарамдаги деворга ўйноқлаб қизғиш нур тушгандек бўлди. Ўзимча, керосин чироқ липиллаган бўлса керак-да, деб қўя қолдим, сўнг яна саройдаги озиқ-овқатни текширишга тушдим. Бир қўли чўлоқ одам даражасида титкилаб, тимирскилаб, ўзимга керакли нарсаларни топдим-да, эртага қайиққа юклайман деб бир четга уйиб қўявердим. Мен имиллар, вақт эса шитоб билан югуради. Тонг ҳам мўралаб қолганди.

Соҳилдаги қўшиқбозлик шовқин билан алмашди, сўнг яна ашула бошланди ва кўп ўтмай тўсатдан тўс-тўполон, қий-чув қўзғолди. "Яна, яна!", деган қичқириқлар қулоққа чалинди. Кимdir жанжаллаштаётганга ўхшарди, туйқус қулоқни тешиб юборгудек чинқириқ эшитилди. Қий-чув тарзи ва оҳангига шу қадар ваҳимали тус олдики, беинтиёр бутун эътиборимни ўша ёққа қаратдим. Ховлига чиқиб, аста қулоқ солдим. Бир маҳал қий-чув овозларни ўткир пичноқдек кесиб, тўппонча панғиллади. Шу заҳоти ҳужрамни кесиб ўтиб, кичкина эшик сари чопдим. Эшик олдига етганимда, орқамда саройдаги яшикларнинг сирғаниб тушиб, шарақлаб сингани эшитилди. Бироқ мен ҳозир бунга эътибор берадиган аҳволда эмасдим. Эшикни даст очиб, ташқарига қарадим.

Қирғоқда, бандаргоҳ ёнида ёришиб келаётган хира осмон бағрига сон-саноқсиз учқун сачратиб, олов тиллари ўрларди. Гулхан теварагида қора-қура шарпалар гимирларди. Монтгомерининг мени чакиргани эшитилди. Тўппончамни маҳкам ушлаганча гулхан томон чопдим. Узоқда, деярли қум бағирлаб, Монтгомерининг тўппончасидан ўт чақнади. Демак, у йиқилган. Овозим борича бақириб, осмонга қаратा ўқ уздим.

Кимнингдир: "Хўжайин!", деб қичқиргани эшитилди. Тўп бўлиб гимирлаётган ола-ғовур оломон атрофга сочилиди, гулхандаги олов лоп этиб ўди. Саросимага тушган ҳайвонсифат одамлар қирғоқ бўйлаб тум-тарақай қоча бошлашди. Қизишиб, чакалакзор ичига ўзларини ураётган ҳайвонсифат одамлар ортидан ўқ уздим. Сўнг қумда чўзилиб ётган қора-қура шарпаларга қарадим.

Монтгомери чалқанча ағанаб ётар, кумушранг пахмоқ унинг устида, маҳкам чанглаб олганди. Алвости ўлган, бироқ ўткир

ўсиқ тирноқлари ҳамон Монтгомерининг бўғзида эди. Уларнинг шундоқ биқинида мук тушганча қимирламай Млинг ётар, елкаси аралаш бўйни нақ ўририб узиб олинган, қўлида синган бренди шишасининг бўғзи кўринарди. Яна иккита шарпа гулхан олдида чўзилиб қолган, бири қимир этмас, иккинчиси эса инграб, онда-сонда бошини кўтариб қўярди.

Кумушранг пахмоқни Монтгомеридан ажратар эканман, маҳлуқнинг тирноқлари рақиби кийимига қўйиб юборишини истамагандек илинарди. Монтгомерининг юзи кўкариб кетган, зўрга нафас оларди. Дарров юзига шўр сувдан сепдим, камзулумни таҳлаб, боши остига қўйдим. Млинг ўлган эди. Гулхан олдидаги ярадор маҳлуқ — башарасини ўсиқ қулранг юнг босган бўрисифат одам, кўкси билан ҳануз жизиллаб турган чўгни босиб ётарди. Шўрлик қийналиб, шу қадар азоб тортардики, чидаёлмадим — бориб, битта ўқ билан уни бу дунё азоб-уқубатларидан ҳалос этдим. Ёнидаги гавда оқ матога ўраб-чирмалган ҳўқизсифат одам экан. Унинг ҳам жони узилиб бўлганди.

Қолган ҳайвонсифат одамлар жуфтакни ростлашган эди. Яна Монтгомерининг олдига келдим, табобат илмидан бехабарлигимдан нолиб, ёнига чўқ тушдим.

Гулхан бутунлай ўчи, фақат яккам-дуккам ўтин майдаригина шамолда чўғланиб турар, чала куйик тарашалар тутамоқда эди. Монтгомери ўтинни қаердан олди экан, деб бошим қотарди. Тонг отиб қолган, ёришиб, оқариб келаётган осмон қўйнида ой хира тортиб, йўқолиб борарди. Шарқ томонда эса уфқ қизармоқда эди.

Баногоҳ орқамдан қасир-қусур ва пишиллаган овозлар эшитилди. Атрофга алангладиму даҳшатдан уввос солиб, ўрнимдан туриб кетдим. Тонги шафақ томон қароргоҳ узра бурқисиб, қуюқ қора тутун кўтарилар, унинг буралиб эшилаётган қуондек туфони ичра қизил аланг тиллари очкўзлик билан тамшанаради. Похол ёпилган томга ҳам ўт кетди. Аланганинг қайрилма учи суйри томдаги похолларни ямлай бошлагани аниқ қўриниб турарди. Ҳужрамнинг деразасидан ҳам шитоб билан алнга отилиб чиқди.

Нима бўлганини дарров фаҳмладим. Уйдан чиқаётганимдаги тарақлаган овоз ёдимга тушди. Монтгомерига кўмак бергани шошилиб, ҳужрамдаги керосин чироқни ағдариб юборган эдим.

Қароргоҳдаги ҳеч бир нарсани ёнғиндан қутқариб қолишнинг иложи йўқ эди. Миямга лоп бу ердан кетиш хаёли урилди, даст бурилиб, қирғоққа чиқариб қўйилган қайиқларга қарадим. Не қўз билан кўрайки, иккала қайиқдан асар ҳам йўқ эди. Қум устида болта ва майда тарашаю ёғоч бўлаклари сочилиб ётар, сал нарида гулхан кул тортиб тутамоқда эди. Монтгомери қайиқларни қасдан — ахир, ўзи қайтиб кетолмайди, — мени ҳам бу ердан қайтиб кетолмасин, деб ёқиб юборганини англадим.

Бирдан жиним қўзиди. Ўзи-ку, оёғим остида ётибди, бир

уриб бошини мажақлайми ҳам дедим. Бироқ шу лаҳза у қўлинни аранг, бирам аянчли қимирлатиб қолдик, беихтиёр дилимни раҳм-шафқат чулғади, унга нисбатан бор кек-адоватим сўнди. У инграб, бир дақиқа кўзини очди.

Дарҳол чўк тушиб, бошини кафтларим орасига олдим. У яна кўзларини очиб, жимгина субҳидамга термулди, сўнг аста нигоҳини менга қаратди ва бир лаҳза кўзларимиз тўқнашди. Унинг яна қовоқлари юмилди.

— Афсус, — деди у ниҳоят, бор кучини тўплаб. Афтидан, у фикрларини бир ерга жамлашга уринарди. — Тамом, — дея пицирлади у, — бу тентак дунёдан форигман... Ҳаммаси беҳуда экан...

Мен индамай тиз чўкиб турадим. Унинг боши бир томонга осилиб бормоқда эди. Зорманда, бир қултум сув бўлсами, у сал ўзига келармиди, деб ўйлардим мен. Яқин ўртадан сув олиб келай, десам, савил, бирор идиш ҳам йўқ. Монтгомерининг танаси бирдан оғирлашгандек бўлди. Этим жунжикиб кетди.

Юзига энгашиб, ёқасининг очиқ жойидан қўлимни суқдим. Унинг жони узилиб бўлган эди; шу сония шарқдан, бурун ортидан ярқ этиб илиқ қуёш баркаши балқиб чиқди, ўзининг беҳисоб нурлари билан қорамтирип дениз сатҳини кўзни қамаштиргудек жимирлатиб юборди. Офтоб Монтгомерининг ўлим даҳшати қотиб қолган юзини ҳам заркал гулчамбарга кўмди.

Бошини оҳиста қўлбola ёстиққа ётқизиб, ўрнимдан турдим. Кўз ўнгимда яна жимиirlаб ётган кимсасиз денизу аллақачон доғини тотиб кўрганим — ёлғизлик намоён бўлди; ортимда эса шафақ нурларига йўғрилмиш сокин орол ястанган, унинг ҳайвонсифат одамлари кўринмас, товуш беришмасди. Қарорроҳ барча озиқ-овқати ва омборлари билан бирга аланга олиб ёнар, гоҳ-гоҳ у ердан қасир-қусур, гумбурлаган товушлар эшитилиб қоларди. Тутам-тутам қуюқ қора тутун буралганча бошим узра ўтиб, қирғоқ бўйлаб таралар, дараҳтлар учини ялаганча унгурдаги уялар томон кетмоқда эди. Енимда эса қайиқлардан қолган тахта-тараша ва беш нафар жасад ётарди.

Мана, чакалакзор томонда учта ҳайвонсифат одам пайдо бўлди, елкалари туртиб чиқсан, буқрисифат, бошлари олдинга мункиган, беўхшов қўллари ерга теккудек осилиб тушган, кўзлари эса сергак, ола-кула, мен томон қўрқа-писа яқинлаша бошлиди.

## ХХ Б О Б

### МАХЛУҚЛАР ОРАСИДА ЁЛҒИЗ

Мен, бир қўлим чўлоқ, бўлғуси қисматимни уларнинг кўзидан уқиб олишга тиришиб, соҳилда ёлғиз қаққайиб турадим. Бисотимда фақат битта тўппонча, унинг ҳам учта ўқи кам.

Қирғоқ бўйлаб бетартиб сочилган тарашалар орасида қайиқларни бузишда ишлатилган иккита болта ётиди. Ортимда тўлқинлар шовиллайди.

Хуллас, ўз матонатимга таянмоқдан бошқа иложим қолмаган эди. Борган сари яқинлашиб келаётган махлуқларнинг башарасига тик қарадим. Улар шу заҳоти кўзларини олиб қочиши, бурун катаклари пирпираб титраб, мендан сал нарида ётган ўлик танаалар ҳидини олди. Дарров уч-тўрт ҳатлаб, бўрисифат одам жасади ёнига етдим ва энгашиб, ердан қон юқи қамчини олдим. Олдиму шу заҳоти ерга тарсиллатиб урдим.

Улар менга бақрайганча таққа қотиши.

— Тиз чўкинглар, — деб буюрдим мен. — Тиз чўкинглар, деяпман!

Улар каловланиб қолиши. Бириси дарҳол чўккалади. Юрагим қинидан чиқиб кетай-чиқиб кетай деб турганига қарамай, буйругимни такрорлаганча уларга яқин бордим. Яна биттаси тиз чўқди, кетидан қолган иккитаси ҳам таъзим бажо айлашди.

Шартта бурилдим-да, тиззалаб ўтирган ҳайвонсифат одамларни назардан қочирмай, худди актёrlар саҳнани томошабинга юзланиб кесиб ўтган каби, чўзилиб ётган ўликлар олдига бордим.

— Булар Қонунни бузиши, — дедим мен, бир оёғимни Қонун жарчиси устига қўйиб. — Улар ўз бошларига ўзлари етдилар. Ҳатто манави Қонун жарчиси ҳам. Ҳаттоки, иккинчи қамчидор оға ҳам. Қонун нақадар қудратли! Яқинроқ келиб кўринг.

— Шафқат йўқ, — деди улардан бири яқинроқ сурилиб, менга кўз қирини ташларкан.

— Асло, — дедим мен. — Шунинг учун энди менга қулоқ солинглар, фақат айтганимни қилинглар.

Улар аста ўринларидан туриб, бир-бирларига савол назари билан тикилиб қолиши.

— Қимирламанглар, — деб буюрдим мен.

Кейин иккала болтани ҳам ердан кўтариб, бош томони билан бўйнимга осиғлиқ латтага илдим, Монтгомерини тўнтариб, тўппончасини қўлимга ушладим, унда ҳали отилмаган иккита ўқ бор экан, ёнини тимирскилаб, чўнтагидан яна тўрт-бештacha ўқ тоғдим.

— Қани, кўтаринглар уни, — дедим қаддимни ростлаб, қамчи билан Монтгомерининг жасадига ишора қиласканман. — Олиб бориб денигизга ташланглар.

Улар Монтгомерининг жасадига қараб юрдилар, ҳануз ундан чўчиётгандари сезилиб турарди, бироқ қўлимдаги қон юқи қамчи бошлари узра тарсиллаб қолиши мумкинлиги ҳам уларга маълум эди. Бироз чўчиб, каловланиб тургач, қамчи овози ва менинг ўшқириғимдан сўнг, ниҳоят, уни авайлаб кўтариб, қирғоқдан пастга олиб тушиб кетиши, сувни шалоплатганча ялтиллаб, кўзни қамаштираётган тўлқинлар бағрига киртилар.

— Нарироққа, — дедим мен, — яна ҳам ичкарироққа олиб киринглар.

Улар сув қўлтиқларига етгунча юрдилар, сўнг тўхтаб, менга қарадилар.

— Ташланглар, — дедим мен. Монтгомерининг оғир жасади сувни бир шалоплатдию тўлқинлар қаърида кўринмай кетди. Чап кўкрагимни нимадир қаттиқ гижимлагандек бўлди. — Яхши! — дедим овозим титраб. Улар, юзларида ваҳима, шошилиб, кумушдек товланаётган денгиз сатҳида узун қора чизиқлар қолдирганча қироққа қайтишди. Соҳилга етгач, гўё Монтгомери қайтиб чиқиб, улардан ўч оладигандек, ортга ўгирилиб тўхтаб қолишли.

— Энди манавиларни олинглар, — дедим мен қолган жасадларни кўрсатиб.

Улар Монтгомерининг жасадини ташлаган жойларига қайта йўлашмади, узоқ бўлса ҳам, қирғоқ бўйлаб юз қадамча нарига тўрттала ўлик ҳайвонсифат одамни битталаб ташиб, денгизга ташлаб келишиди.

Млингнинг дабдала танасини сувга олиб бориб ташлаётгандарини кузатиб туарканман, орқамдан енгил оёқ шарпаси эшитилди, ўгирилиб қарасам, мендан ўн қадамча нарида баҳайбат чўчқа ва сиртлон қорищмаси турибди. Боши қуий солинган, келишмаган дағал қўллари мушт бўлиб тугилган, йилтироқ кўзлари менга томон бақрайган. Орқамга ўгирилганим ҳамон у таққа тўхтади, кўзи кўзимга тушиб, нигоҳини олиб қочди.

Бир дақиқа шундай юзма-юз туриб қолдик. Қамчини ташлаб, чўнтағимдаги тўппончани пайласладим, қулай имконият туғилган ҳамон уни отиб ўлдиришни кўнглимга тутдим, зеро, қолган ҳайвонсифат одамлар ичиди энг расвоси ҳам шу эди. Бир жиҳатдан, бу ваҳшийликдек туюлади, бироқ ўша топдаги қатъий қарорим шу бўлди. Унинг бир ўзи мен учун барча ҳайвонсифат одамлардан кўпроқ хавф туғдирарди. Токи у тирик экан, ўзимни хотиржам ҳис қилолмас эдим.

Ниҳоят, ўзимни қўлга олиб, унга қараб:

— Таъзим қил, тиз чўк! — дей бақирдим.

У тишларини иржайтириб қичқириди:

— Сен ўзи кимсан, менга...

Аъзойи баданим титраб, шартта тўппончамни чиқардим-да, унга қаратса ўқ уздим. У чинқириб, ўзини четга отди-да, ортига бурилиб қочди. Тушундимки, ўқ хато кетди, дарҳол бош бармоғим билан тўппонча лўқидонини орқага қайирдим. Яна мўлжалга олмоқчи эдим, қарасам, лапанглаганча қочиб боряпти, анча узоқлашиб кетган, қўй, ўқ зое кетмасин, деб фикримдан қайтдим. У бошини хиёл буриб, менга аланглаб қараганча қочиб борарди. Ёнаётган ҳовлидан ҳануз буралиб-буралиб чиқаётган қуюқ тутун пардаси панасига ўтиб, ниҳоят, кўздан йўқолди. Анча вақт унинг ортидан қараб турдим. Сўнг итоатгўй уч нафар ҳайвонсифат

одамимга ўгирилиб, ҳануз сувга ташламай, кўтариб турган қўлларидағи жасадни улоқтиришга ишора қилдим. Кейин гулхан ёнига, ўликлар уйилган жойга келиб, қорамтири қон доғлари кўмилиб, билинмай кетгунча қумни эзғиладим.

Қўл ишорам билан уч итоатгўй ҳайвонсифат одамга "Бўлди, бўйсизлар", деб, соҳилнинг юқори томонидаги тўқайзорга бурилдим. Тўппончам қўлимда, қамчи билан болталар чўлоқ қўлим илиғли бандга осилган. Шу дақиқа ягона хаёлим, қани энди менга ҳеч ким халақит бермаса-ю, хотиржам ўтириб, шароитни бир тарозига солиб олсан, дердим.

Шу дамда хаёлимга келиб, мени ўйлантириб қўйган яна бир даҳшатли нарса оролнинг бирор бурчидаги ҳам бамайлихотир оёқни узатиб, дам олиб ўтиришим ёки озроқ мизғиб олишим мумкин бўлган жойнинг йўқлиги эди. Тўғри, бу ерга келганимдан бўён ўзимни яхши ҳис этиб, анча кучга кириб қолдим, бироқ асабларим ҳануз чатоқ, сал нарсага бўғилиб, жигибийрон бўлаверардим. Оролнинг у томонига, ҳайвонсифат одамлар олдига кўчиб ўтишимга, уларнинг ишончларини қозонишимга тўғри келишини ич-ичимдан ҳис қилиб турардим. Бироқ бундай қилишга сира юрагим дов бермасди. Яна соҳилга қайтиб, шарқий йўналишга бурилдим-да, ёнгиг чулғаган қароргоҳ яқинидан ўтиб, маржон қояларга олиб борадиган, юзаси юпқа, йилтироқ қўм билан қопланган ёлғизоёқ йўлакка чиқдим. Айнан шу ерда денгизга орқа қилиб ўтириб, хавфу хатардан боҳабар, бемалол мулохаза юритса бўларди. Мен иягимни тиззамга тираганча ўтирас, офтоб бошним узра беаёв ўт пуркар, дилимда борган сари ваҳима кучайиб, бу балолардан қачон ҳалос бўларканман, умуман, ҳалос бўлиш насиб этармикан, деб хаёл сурардим. Мавжуд аҳволни хотиржам ўтириб, совуққонлик билан, бафуржа ўйлаб олишим керак эди, бироқ лаънати ваҳима бунга сира имкон бермасди.

Монтгомерининг умидсизликка тушиши сабабларини излардим. "Улар ўзгаришади, — деган эди у, — албатта ўзгаради". Моро-чи? Моро нима деган эди? "Улардаги ўжар ҳайвоний ҳис-туйғулар кун сайин уйғониб боради". Кейин сиртлон ва чўчқа қоришмасини ўйладим. Агар уни мен ўлдирмасам, у албатта мени бир куни ўлдириши аниқ эди. Қонун жарчиси ҳам ўлган, бу ҳам пешонамнинг шўрлигидан! Биз — қамчикдор оғаларнинг ҳам барча сингари ўлишимиз мумкинлиги уларга энди сир эмас...

Балки, ҳозир улар ҳув авави қирққулоқ ва палмалар панасиға бикиниб, туйқус човут солиши мақсадида яқин боришимни пойлашаётгандир? Ким билсин, балки менга қарши мутлақо даҳшатли, бошқа бирор чорани ўйлаб қўйишгандир? Сиртлон ва чўчқа қоришмаси уларга нима дейётгандан экан? Хаёл мени тинмай асоссиз ваҳималар ботқоғига тортқиласади.

Диққатимни ногоҳ қароргоҳ яқинида қирғоққа тўлқин сурини чиқарган қандайдир қорамтири нарсага дengiz қушларининг

чувиллаб ёпирилиши тортди. Унинг нималиги менга маълум ва равшан эди, бироқ бориб, қушларни ҳайдашга юрагим дов бермасди. Фордаги уяларга тузоқ эҳтимоли бор тўқайзордан эмас, оролнинг шарқий четидан боришга қарор қилдим ва қирғоқ бўйлаб қарама-қарши томонга йўналдим.

Ярим, милча юргач, тил топишганим — уч нафар ҳайвонсифат одамдан бирининг соҳилдаги тўқайзордан чиқиб, тўппа-тўғри мен томонга қараб келаётганини кўрдим. Миямда чарх урмиш ваҳимали ўй-хаёллар гирдобида, шу қадар асабим таранглашган эдикি, ўйлаб-нетиб ўтирамай, шартта тўппончамни чиқардим. Унинг раҳм-шафқатга ундовчи имо-ишоралари ҳам мени тинчлантиргади. У менга саросималаниб яқинлашарди.

— Йўқол, — деб бақирдим мен.

Унинг бошини солинтирганча таъзим қилиб туришида итга хос нимадир зоҳир эди. Бақиригимни эшишиб, худди ҳайдаб солинган ит каби нари кетди, сўнг тўхтаб, вафодор кўзлари билан ялинганнамо тикилди.

— Йўқол, деяпман, — дедим мен тағин. — Яқинлаша кўрма.

— Яқинлашиш мумкин эмасми? — деб сўради у.

— Мумкин эмас, жонингдан умидинг бўлса, яқин келма, — дэя забтига олдим мен қамчини тарсиллатиб. Сўнг қамчини тишлаб, ерда ётган тошга қўл чўзгандим, у қочиб қолди.

Айланма ўйлаб ёлғиз ҳайвонсифат одамлар яшайдиган дарага келиб, унгурдаги уялар ҳамда денгиз оралигидаги қамишзорга биқиниб олдим, мақсадим — уларни кузатиб, юз-кўзлари, хатти-ҳаракатларидан Моро ва Монтгомерининг ўлими, тош девор билан ўралган Уқубат уйининг куйиб кул бўлгани уларга қандай таъсир этганини билиш эди. Ахмоқ бўлмасам, шунчалик ҳам қўрқаманми? Эрта тонгдаги довю-раклигимда тураверсам, ваҳимали ўй-хаёллар, вавасаларга берилмасам, Моро салтанатининг бўш қолган тахти ўзимга насиб этармиди, ҳайвонсифат одамларга ҳукмрон бўлиб олармидим? Бироқ мен шундай имкониятни бой бердим ва энди уларга шунчаки бошман, холос.

Тушга яқин уларнинг беш-ўнтаси ташқарига чиқиб, иссиқ қумга чўнқайиб ўтирганча, офтобда исинишга тушишди. Бу пайтга келиб, очлик ва ташналик дилимни чулғамиш ваҳимадан устунлик қила бошлаган эди. Шартта биқиниб турган еримдан чиқдим-да, тўппончамни ўқталганча исиниб ўтирганларни кўзлаб боравердим. Улардан бири — бўрисифат хотин бошини бурди-да, менга синчков тикилиб қолди, сўнг бошқалар ҳам мен томон ўгирилишди. Тиз чўкиб таъзим қилиш у ёқда турсин, бирортаси жиллақурса қимир этиб ҳам қўймади. Менда эса бир ерга тўпланишиш шунча ҳайвонсифат одамни тиз чўкишга мажбур этишга на куч ва на бир ҳол бор эди, хуллас, қулай фурсатни бой беришга мажбур бўлдим.

— Қорним оч, — дедим мен айбдорларча ва аста яқин юрдим.

— Емиш ичкарида, — деди мудроқ оғушидаги хўқиз ва ўнғиз омиҳтаси терс бурилиб.

Уларнинг ёнидан ўтиб, юҳодай жарликнинг зим-зиё, бадбўй ғаърига йўналдим. Бўш уяларнинг биридан озроқ мева топиб, штаҳа билан туширдим, сўнг ифлос, ярим чирик шоҳ-шабба за новдаларни тўплаб, уя оғзини беркитдим, беркитдиму қўлимда тўппончани маҳкам тутганча тўсиққа бошимни қўйдим. Салкам ўтиз соатлик уйқусизлик азоби ўз хукмини ўтказди ва мен, уя оғзини номига тўсиб қўйганимга қарамай, бирор тегса, шоҳ-шаббалар шитирлаб, уйғотади, гафлатда қолмайман, деган умидда снгил уйқуга кетдим.

## ХХI Б О · Б

### ҲАЙВОНСИФАТ ОДАМЛАР АСЛ ҲОЛИГА ҚАЙТДИЛАР

Шундай қилиб, мен доктор Моро оролида ҳайвонсифат одамлар билан ёлгиз қолдим. Уйғонганимда, аллақачон атрофни қоронгилик чулғаганди. Майиб қўлим зирқираб оғририди. Уйқусираб, аввал қаердалигимни англаёлмай ўтирдим. Ташқаридан қандайдир ғўлдираган, қўпол овозлар келарди. Қарасам, уя оғзидағи тўсиқ йўқ. Тўппончам эса боягидек қўлимда.

Ёнгинамда кимнингдир нафасини туйдим, шундоққина биқинимда аллақандай гавда пайпаслангандек бўлди. Нима бало экан, деб, нафас ютиб ўша ёққа тикилдим. У жуда ҳам аста қимирларди. Сўнг қўлимни юмшоқ, илиқ, ҳўл нимадир ялагандек бўлди. Этим жунжикиб кетди. Шу заҳоти қўлимни тортиб олдим. Даҳшатдан бўғзимга бир фарёд келиб тиқилди. Шундагина гап нимадалигини англаб, ўқ узишдан ўзимни тийдим.

— Ким бу? — деб сўрадим мен хирқираб, тўппончамни ўқталганча.

— Мен, хўжайин.

— Кимсан?

— Улар, энди хўжайнимиз йўқ, дейишяпти. Лекин мен биламан, биламан. Ҳўв, мурдаларни денгизга ташидим-ку, ўша мурдаларни сиз ўлдиргансиз, о, денгиздан қўрқмаган оғам. Қулингизман, хўжайнин.

— Соҳида учратганим сен эмасмидинг? — деб сўрадим мен.

— Мен эдим, хўжайин.

У чиндан ҳам содиқ эди, акс ҳолда, ухлаб ётган пайтим ташланмасмиди.

— Яхши, майли, — дедим мен, у ўпиб яласин учун қўлимни

узатиб. Унинг нега бу ерда эканига энди ақлим ета бошлади, яхши, у дилимга анча далда бўлди.

— Бошқалар қаерда? — деб сўрадим мен.

— Улар фирт жинни, — деди итсифат одам. — Анави ерда ҳозир гаплашиб ўтиришибди. "Хўжайнимиз ўлди, иккинчи қамчидор оға ҳам ўлди. Анави денгиздан қўрқмаган оға бизга ўхаш оддий одам. Энди бизга хўжайин йўқ, қамчи йўқ, қутулдик, уқубат Уйи энди бўлмайди, ҳаммаси тамом. Биз Конунни суюмиз, унга риоя қиласиз; аммо уқубат Уйи энди йўқ, бизга хўжайин йўқ, қамчи йўқ", дейишяпти. Лекин мен биламан, хўжайнин, мен биламан.

Мен қоронғида итсифат одамнинг бошини пайпаслаб топиб, силаб қўйдим.

— Майли, ғам ема, — дедим унга.

— Энди уларни ўлдирасиз-а? — деди итсифат одам.

— Ўлдираман, — дедим мен, — ҳаммасининг адабини бераман ҳали. Лекин бир-икки кун ўтсин, бир нарсалар рўй берсинг, кейин. Ҳаммасининг, сен қолсин, деб айтганлардан ташқари ҳаммасининг қиронини келтираман.

— Хўжайнин кимни хоҳласа ўлдиради, — деди итсифат одам мамнун оҳангда.

— Гуноҳлари кўпайсин учун уларни вақтинча ўз ҳолларига қўямиз, — дея давом этдим мен. — Майли, кўнгилларига сиққанча қутураверишсин, менинг хўжайнин эканимни билишмасин.

— Хўжайниннинг айтгани қонун, — деди итсифат одам итларга хос сезгирилик билан.

— Биттаси катта гуноҳ қилди, — дедим мен. — Ўшани кўрсам, ўлдираман. Қачон, қаерда бўлмасин, сенга "Мана шу", десам, унга ташланасан, хўпми? Энди мен анави тўпланишиб ўтирганлар олдига чиқай.

Бир лаҳза ичкари қоп-қоронғи бўлиб қолди: итсифат одам чиқаётиб, гавдаси билан уя оғзини тўсади. Унинг ортидан мен ҳам чиқдим, тўхтаб, у ёқ-бу ёққа қарадим, кўрдимки, бир пайт Моро тозиси билан орқамдан қувиб келганда, овозини илк бор эшиштан ерда турибман. Бироқ ҳозир тун, сассиқ унгур зим-зиё қоронғи эди; ўшанда қўёш чараклаб, ям-яшил бўлиб товланиб ётган тўғридаги ёнбағирликда эса айни дам гулхан ловиллар, атрофида буқчайган, беўхшов шарпалар ҳаракати кўзга ташланарди. Ундан нарида юқоридан шоҳ-шаббалар билан чегараламиш қоронғи ўрмонзор ястанганди. Жар узра ой кўтарилиб келар, оролдаги ҳамиша тутаб турувчи вулқонлардан тараламиш тутун унинг юзини оҳиста сийпалаб, сузмоқда эди.

— Ёнимдан жилма, — деб бујурдим итсифат одамга, ҳарна далда бўлсин учун. Биз уялардан бош чиқараётган қора-қура шарпаларга аҳамият бермай, тор йўлакдан пастга эндик.

Гулхан олдидагилар мени кўриб, таъзим қилиш у ёқда турсин,

жойларидан қимирламадилар ҳам. Күпчилиги кўриб кўрмасликка олди. Мен аланглаб, сиртлон ва чўчқа қоришмасини қидирадим, бироқ у кўринмади. Ҳаммаси бўлиб, бу ерда йигирматача ҳайвонсифат одам чўк тушганча оловга тикилиб ёки гаплашиб ўтиради.

Бирдан ўнг томонимдан маймунсифат одамнинг:

— У ўлган, у ўлган, хўжайн ўлган, — деган овози янгради.

— Уқубат Уйи-чи, уқубат Уйи энди йўқ.

— У ўлгани йўқ, у ўлмаган, — дедим мен баланд овозда.

— Ҳозир, шу дақиқада ҳам у бизни кузатиб турибди.

Бу уларни эсанкиратиб қўйди. Йигирма жуфт кўз менга қадалди.

— Уқубат Уйи йўқ бўлди, — дедим мен. — Аммо у қайтиб бино бўлиши мумкин. Хўжайнини эса сиз кўрмайсиз, бироқ у ҳозир юқоридан ҳамма гапингизни эшишиб турибди.

— Тўғри, тўғри, — деб тасдиқлади итсифат одам.

Улар шошиб қолишди. Ҳайвонлар ёвуз ёхуд айёр бўлишлари мумкин, бироқ алдай олишмайди, алдашни, ёлғонни одамзотга чиқарган.

— Қўли боғлиқ одам ғалати гапиряпти-ку, — деди ҳайвонсифат одамлардан бири.

— Бор гапни айтяпман, — дедим мен. — Хўжайнин ва уқубат

Уйи яна қайтажак. Қонунни бузганинг ҳали ҳоли вой бўлади.

Улар ҳеч балони тушунмай, бир-бирларига ҳайрон қараб қолдилар. Мен эсам ясама хотиржамлик билан, эринганнамо қўйлимдаги болтани ерга ура бошладим. Улар чимда қолаётган чуқур болта изларидан кўз узишолмаётганини яққол сезиб турардим.

Гапларимга сатир одам шубҳа билдирганди, унга боллаб жавобини бердим. Сўнг олачипор маҳлуқлардан бири эътиroz билдириди ва баҳс авжга минди. Худога минг қатла шукрки, менга ҳеч қандай хавф таҳдид солмаётганига тобора ишончим ортиб бормоқда эди. Мен энди дамим ичимга тушмай, тутилмай, бошда қизиқонлик билан қандай дадил сўзлаган бўлсам, шундай гапирадим. Бир соатдан ортиқ уриниб, ниҳоят, ҳайвонсифат одамларнинг бир нечасини ҳақ эканимга ишонтиришга, қолгандарининг дилида эса озгина бўлса ҳам майл уйғотишга эришдим. Лекин бир дақиқа бўлсин, ашаддий душманим — сиртлон ва чўчқа қоришмасини ёддан чиқарганим йўқ, кўзим олма териб, уни ахтарардим, бироқ ундан сира дарак бўлмасди. Гоҳо шубҳали ҳаракат сезиб, юрагим бир шув этиб кетар, лекин илгаригичалик хавотир чекмасдим. Ниҳоят, ой оғди, суҳбатдошларим, бири олиб, бири қўйиб, эснай бошлишди (сўниб бораётган гулхан шуъласида уларнинг эсноқ тутган башаралари, қингир-қийшиқ тишлари яққол кўринарди), хуллас, навбатма навбат унгурдағи уларига кириб, тойиб бўлишди. Мен ҳам қўзғолиб, уларнинг изидан йўналдим, чунки тун ниҳоятда ваҳимали, бирортаси

билин бу ерда ёлғиз қолгандан, кўп ичидан бўлганим афзалроқ эди.

Доктор Моро оролидаги омонат ҳаётимнинг энг узоқ даври ана шу тарз бошланди. Ўша оқшомдан то охирги кунгача — беҳисоб майда-чуйда кўнгилсизлик ва сурункали бесаранжомликларни ҳисобга олмаганда, — айтишга арзигули фақат битта воқеа юз берди, холос. Инчунун, мен у даврни тўла тавсифлаб ўтирамайман, фақат чала одам, чала ҳайвон мавжудотлар билан бирга кечирилган ўн ой мобайнинда юз берган энг муҳим воқеа ҳақида тўхтамоқчиман. Хотирамда ёзишга туртки бериши мумкин бўлган тафсилотлар кўп, ёзиш не, агар уларни хотирадан ўчириб ташлаш имконияти бўлса, бутун мол-дунёмни ҳам аямас эдим. Бироқ айтмоқчи бўлган гапларимга уларнинг заррача дахли йўқ. Ўша кунларга хаёлан қайтиб, гоҳида ёқа ушлайман: қандай қилиб маҳлуқлар билан бу қадар тез тил топишдим, уларнинг муҳитига мослаша билдим, бунга қандай ўзимда куч топдим? Тўғри, улар билан жанжаллашган кунларим ҳам кўп бўлди, танамдаги чандиқлар, тиш излари бунинг исботи, лекин барибир секин-аста улар менинг тошотарлик уқувим ҳамда болтамнинг зарби билан ҳисоблашадиган бўлишиди. Айниқса, менга итсифат одамнинг вафодорлиги қўл келди. Тез орада шунга амин бўлдимки, улар олган жароҳатлари даражасига қараб бирорни иззат қилишаркан. Мақтаниш эмас-у, улар орасида нуфузим жуда баланд эди. Бир-икки тортишувда у ер-бу ери лат еган айримлари мендан аламзада, кўрганда, афтларини буриштиришар, лекин буни ҳам мендан яширин, ё бош буриб, ёки орқаваротдан қилишарди.

Сиртлон ва чўчқа қориҷмаси нуқул ўзини мендан олиб қочар, мен эсам унинг орқасидан пойлаганим пойлаган эди. Ажралмас дўстим — итсифат одам ҳам уни жинидан баттар ёмон кўрар, ҳам ундан қўрқарди. Мендан ажралмаслигининг боиси ҳам асли шу бўлса керак. Тез орада менга шу нарса аён бўлдики, у иблис аллақачон қон таъмини тотиб кўрган ва қоплонсифат одам куйига тушиб қолган экан. У ўрмоннинг қаеригадир уя қурган, ўша ерда ёлғиз кун кечиради. Бир ҳайвонсифат одамларни гиж-гижлаб, уни ушлайми ҳам дедим, бироқ уларнинг бошларини бир ишга қовуширишга ҳали обрўйим старли эмасди. Бир неча бор уясига бостириб бориб, кутилмагандан хужум қилмоқчи ҳам бўлдим, бироқ у номард ўта эҳтиёткор, қўриб ё сезиб қолар ва ўша заҳоти яширинарди. У ўрмондаги барча сўқмоғу йўлларда пусиб, биқиниб, менга ва иттифоқчиларимга таҳдид соларди. Итсифат одамнинг мендан ажраб, ёлғиз юришига сира йўл қўймас эдим.

Биринчи ой ҳайвонсифат одамлар кейинги даврга нисбатан ўзларини хийла инсонга яқин тутдилар ва мен итсифат одамдан ташқари яна уч-тўрттасининг ишончини қозондим. Ленивецга ўхшаш пакана маҳлуқ менга ажлботовур тарзда боғланиб қолди

— қаерга бормайин, изимдан соядек эргашгани эргашган эди. Маймунсифат одам-ку, асти қўявериз, ўлгудек безор қилиб юборди. "Иккимиз ҳам беш панжали, демак, баробармиз", дейдими-ей, бир бало, нуқул бидирлаб, бошимни қотиргани-қотирган. Ундаги бир хислат мени ҳайрон қолдиради: янги сўз топишга ниҳоятда устаси фаранг эди. Инсон учун тил тинимсиз сафсата сотиш учун берилган, деб ўйларди у чамаси. Оғзидан чиққан бу маза-бемаза сўзларни у "мислсиз фикрлар" деб атар, шу тахлит уларни кундалик муомаладаги сўзлардан, яъни "майда фикрлар"дан фарқларди. Оғзимдан унга тушунарсиз бирор гап чиққудек бўлса, дарров оғзининг таноби қочар, яна бир такорланг, деб оёқтираб туриб олар, ёдлаб олишга тиришарди, сўзларнинг оёғини осмондан қилиб бўлса ҳам, бориб, текин қулоқ биродарларига мақтанаради. Оддий, тушунарли нарсаларни у назарига илмасди. Ҳозир ўйласам, умрим бино бўлиб бунақа ахмоқни кўрмаган эканман; унда инсоний телбалик маймунга хос туғма фаросатсилик билан уйқашиб кетган эди.

Ҳайвонсифат одамлар орасида ёлғиз дастлабки ҳафталарни шу тарзда ўтказдим. Бу пайт улар ҳали Қонун ақидаларига бўйсинишар, бебошлиқ қилишмас, ахлоқ-одоб чегарасидан чиқишишмасди. Тўғри, бир кун яна битта қуённи ғажиб ташланган ҳолда топдик — шубҳа йўқки, бу сиртлон ва чўчқа қоришмасининг иши эди, бироқ бўлак бундай ҳодиса рўй бермади. Май ойларига келиб, уларнинг хатти-ҳаракати ва нутқида маълум ўзгаришлар юзага келди: товушлари ноаниқ чиқиб, кўп галиришни истамай қолишиди. Маймунсифат ошнам ҳануз ўша-ўша — жаги жагига тегмас, бироқ борган сари нутқи тушунарсиз бўлиб, кўпроқ маймуннамо тус олаётганди. Қолган маҳлуқлар худди тилларини йўқотиб, гунг бўлиб қолганга ўхашар, бироқ галирсам, ҳануз айтганимни уқишишарди. Бип-бинойи, равон нутқининг кутилмаганда ғализлашиб бориб, охири тушунарсиз, қўпол товушлар йигиндисига айланишини бир тасаввур қилинг-а?! Кундан-кунга уларнинг гавда тутишлари ҳам ўзгариб, тобора мункайиб боришарди. Бундан ўзлари ҳам уялиб, имкон қадар яширишга ҳаракат қилишса-да, айримларининг тўрт оёқлаб чопиб кетаётганини бир неча бор ўз кўзим билан кўрдим — улар энди тик юролмасликлари муқаррар эди. Бирон нарсани ушлайман, дейишса, қўллари қовушмас, сувни аллақачон тиллари билан чалпиллатиб ичишар, овқатни ҳам ҳайвончасига тановвул қилишарди, хатти-ҳаракатлари, тана тузилишлари кун сайин дағаллашиб бормоқда эди. Моронинг айтгани — "ўжар ҳайвоний ҳис-туйғулар"нинг амал қилаётганига сира шак-шубҳа қолмаганди. Улар ақл бовар қилмас даражада шитоб билан асл ҳолларига қайтишмоқда эди.

Айримлар — ҳайрон қоларли жойи шундаки, асосан аёл жинсидагилар — шарм-ҳаёни ҳам йигиштириб қўйишаётган эди, тўғри, кўп ҳолларда бу яширинча юз берарди. Айримлар сира

тортинмай сүққабошлик ҳақидаги қонунга оёқ қўйишмоқда эди. Умуман, вақт ўтгани сари Қонуннинг писта пўчогичалик қадри қолмай борарди. Бу ҳақда гапириш менга ниҳоятда оғир. Итсифат ошнам кўз ўнгимда росмана итга айланиб борарди: кундан-кунга гапдан қолиб, асосан тўрт оёқлаб юрар, аъзойи баданини жун қоплаётган эди. Туппа-тузук ёнимда юрган одамнинг кутилмаганда орқамдан эргашиб юрадиган итга айланиб бораётгани қизиқ эди. Кундан-кун авж олмиш бетартиблик ва ювиқсизлик боис, тор, диққинафас гор ҳавоси шу қадар айниб кетдикси, у ерни тарк этишига мажбур бўлдим, яна ўша эски тос, эски ҳаммом — келиб, Моронинг куйиб кул бўлган қароргоҳи ҳовлисида шох ва новдалардан ўзимга капа тикладим. Бу ернинг яна бир афзал томони шунда эдикси, ҳайвонсифат одамлар ҳали-ҳануз чеккан азоб-уқубатларини унугланларича йўқ, ҳовлига яқинлашишга ҳам кўрқардилар.

Одамсифат махлуқлар инқирозининг ҳар бир қадамини тасвириш, қай тахлит кунма-кун инсоний жиҳатларини йўқотиб боришганини батрафсил сўзлаш жуда қийин; уларнинг қай йўсинда ўраб-чирмалган латта-путталарини ечиб, шир яланғоч ҳолга келишгани, юз ва тумшуқлари бўртиб чиққани ва ўша, ёлғиз ўзим қолган биринчи ой уларнинг айримлари билан худди одамдек дўстлашиб, яқинлашиб кетганим — ҳамма-ҳаммасини ҳозир даҳшатли туш каби эслайман.

Аслига қайтиш жараёни аста-секин, бир маромда амалга ошди. Ҳеч бир ўзгариш кескин содир бўлгани йўқ. Мен анча вақтгача уларга аралашиб, бемалол юравердим, чунки ҳали уларда мавжуд инсоний хислатларни сиқиб чиқаришга қодир ҳайвоний унсурлар юзага қалқишига туртки етилмаган эди. Бироқ бу туртки эртами индин юзага чиқиши мұқаррар, мен шундан хавотирда эдим. Вафодор итсифат ошнам тош девор ортида уйқумни қўриқлар, шу сабаб анча тинч ухлардим. Пакана ленивецга ўхшаш махлуқ ўта ҳуркак, қуш пир этса, юраги шир этадиган бўлиб қолди ва мени тарк этиб, яна аслий ҳаёт тарзига — дараҳт шохларида яшашга ўрганди. Биз худди ҳайвон ўргатувчилар барчага кўз-кўз қилиш учун турли жониворларни бир қафасга тиқиб, сўнг уларнинг тенглигига эришган ва бунга “бахтиёр оила” деб ном берган, лекин кейин ўргатувчисиз қолган ҳайвонлар ҳолига тушгандик.

Албатта, бу махлуқлар китобхон ҳайвонот боғларида кўрган оддий айиқ, бўри, йўлбарс, ҳўқиз, чўчқа ва маймунга шунчаки айланиб қолишаётгани йўқ эди. Барчаларида ғалати хислатлар мавжуд эди; ҳар қайсинисини Моро қоришитириб, турли ҳайвонлардан ясаганди; бири айиқсимонлар асосида ясалган бўлса, иккинчиси мушуксимонлар, учинчиси эса ҳўқизлар асосида яратилганди, хуллас, ҳар бири бир эмас, бир неча ҳайвондан таркиб топганди, барининг ўзига хос жиҳатлари бўлса-да, лекин умуман ҳайвон эканлари аниқ кўзга ташланарди. Одам

ажабланадиган яна бир жойи, инсоний жиҳатлар ҳам туриб-туриб уларда юзага чиқаверарди; бирдан тиллари чиқиб, гапириб юборишлари, кутилмаганда олд оёқлари билан эпчил ҳаракат қилишлари, тик туриб юришга интилишларини кузатиш мумкин эди.

Менда ҳам ғалати ўзгаришлар юз бермай қолмади, албатта. Устимдаги кийимларнинг кийимлиги қолмаган, жулдур латтапутталар осиб қўйилган рўдапога ўхшаб қолгандим, тешикларидан офтобда қорайган баданим бемалол кўринарди. Сочим шу қадар ўсиб, ҳурпайиб кетдики, охири ўриб, кокил қилиб олдим. Кўзим эса қандайдир ғалати йилтиллаб, атрофга нуқул сергак, олазарак боқардик, буни менда ҳозир ҳам кузатишади.

Дастлабки кунлар кундузлари жанубий қирғоқда кўзим тешилгудек бўлиб, денгизга тикилиб ўтиредим, бирор кема ўтиб қолса-чи, деб ҳудонинг зорини қиласди. Мен "Ипекакуана"нинг қайтишига умид қиласдим, бироқ оролга тушганимга бир йил бўлибдик, ҳануз ундан дарак йўқ эди. Беш марта олисда елкан, икки марта тутун кўрдим, лекин оролга яқинлаб ҳеч нарса ўтмасди. Бирор кема кўринса, дарров ўт ёқиб, ишора беришга қирғоққа қуруқ шох-шабба ҳам жамлаб қўйгандим, бироқ оролда тутаб ётган вулқон қолдиқлари борлигидан хабардор денгизчилар бунга аҳамият бермасликлари ҳам мумкин эди.

Сентябр ё октябр ойлари эди чамамда, мен сол ясаш ҳақида ўйлай бошладим. Бу пайтга келиб қўлим тузалиб кетган, иккаласи билан бемалол ишлай олардим. Дафъатан ҳеч нарса қўлимдан келмай, роса куйиндим. Устачилик ҳунаридан мутлақо хабарим йўқ, ўрмонда кунларни беҳуда кеч қилас, куйиб-пишиб дараҳт кесиб, чопиб, уринганим-уринган эди. Ёғочларни бир-бирига боғлаш учун арқон мутлақо йўқ, қаердан топсан, ўрнига нимани ишлатсан экан, деб бош қотирганим қотирган эди; оролда тўлиб-тошиб ётган чирмовиқлар эгилувчан, пишиқ бўлса ҳам гўрга эди, чала-чулла илмим билан эса ўрнига бирор нарса кашф этиш қўлимдан келмасди. Икки ҳафтадан зиёд умрим куйиб кул бўлган қароргоҳ ҳовлисида, қайиқлар ёқилган қирғоқда тентираб, занг босган мих, темир-терсак бўлаклари қидириш билан ўтди. Гоҳи-гоҳида айрим ҳайвонсифат одамлар лип этиб кўзга ташланишар, чақирсан, шаталоқ отиб қочиб қолишарди. Бунинг устига, гумбур-гумбур момақалдироқ, ёғин-сочинлар вақти келиб, ишимнинг белига тепди, бироқ шунга ҳам қарамай, барибир солни ясаб битказдим. Севинчим ичимга сиғмасди. Буни қарангки, уқувсизликдан — бу менинг ҳаётдаги энг катта камчилигим эди — солни денгиздан бир чақиримдан ҳам узоқроқ жойда ясабман, эпини қилиб, қирғоққа судраб боргунимча бузилиб, бўлак-бўлак бўлиб кетди. Бир томондан, яхши ҳам бўлди, агар бу солни сувга солиб, йўлга чиққанимдан сўнг юз бергандачи? Аммо ишим юришмагани менга шундай қаттиқ таъсир қилдики, бир неча кун қирғоқда денгизга

термулганча караҳт санқидим, кўзимга фақат ўлим кўринди, холос.

Бироқ ўлимга ким ҳам осонгина рози бўларди, дейсиз? Бир воқеа юз берди-ю, пешонамга дўйқиллатиб уриб, кунларни бундай нодонлик билан беҳуда ўтказишнинг охиривой бўлиши ҳақида огоҳлантириди, чунки ўтаяётган ҳар бир кун ёввойи маҳуқлар томонидан хавфни кучайтироқда эди. Бир куни тош девор соясида оёғимни узатиб, денгизга тикилиб ётгандим, товонимга муздай нимадир теккандек бўлдию ҷўчиб ўрнимдан туриб кетдим. Оёғим остида ленивецга ўхашаш кичкина жониворнинг менга мўлтиллаб кўз тикиб турганини кўрдим. У аллақачон тилдан қолган, хатти-ҳаракатлари ҳам қўпполлашган, танасидаги юмшоқ, момик юнг кун сайин қалинлашиб борар, ўткир тирноқли қингир оёқлари эса борган сари йўғонлашмоқда эди. У жуда бир аянчли товуш чиқарди, ҳушёр тортганимни кўриб, бутазор томон юрди ва яна менга ўгирилди.

Дафъатан мен уни тушунмадим, сўнг бир гап бўлган шекилли, деб аста орқасидан юрдим. Кун ниҳоятда иссиқ эди. Бутазорга келгач, у дарахтга осилиб, чиқиб кетди, чунки ердан кўра, шоҳларда осонроқ ҳаракат қиласиди.

Тўқайзордаги роса пайҳон бўлган ерда даҳшатли ходиса устидан чиқдим. Шўрлик итсифат дўстим ўлиб ётар, жасади узра сиртлон ва чўчқа қоришмаси мук тушиб, ҳали совиб улгурмаган танани қўпол панжалари билан тутамлаб гажир, оғзидан сўлаги оқиб, ириллаб қўярди. Аста яқинлашар эканман, у бошини кўтариб, ийтиллаган кўзларини менга тикди, лаблари титраб, қон юқи сўйлоқ тишлари кўзга ташланди ва таҳдид солиб ириллади. Йиртқич шу тобда на қўрқар ва на қилган ишидан хижолат тортарди; унда инсонийликдан асар ҳам қолмаган эди. Олдинга яна бир қадам ташладим-да, тўппончамни чиқардим. Кута-кута, ниҳоят, бугун бу аглаҳ билан юзма-юз келгандим.

Иблис ўрнидан қимир этмади. Аксинча, қулоқлари диккайиб, юнги ҳурпайиб, ҳужумга хозирланди. Қоқ пешонасини нишонга олиб, шартта тепкини босдим. Ўқ варанглаганини биламан, у бир сакраб, мени чалқанча ағанатди. Беўхшов панжалари юзимга урилди. Бор кучи билан сакрагани боис устимдан ошиб, ўтиб кетди, кўзимни очсан, оёғи остида ётибман, бахтимга, ўқ нишонга тегибди, у жон талвасасида иргиган экан. Унинг ифлос, зилдек оғир оёқлари остидан чиқиб, титраб-қақшаганча, жон таслим қилаётган ўлаксага тикилдим. Ҳар тугул, бир хавф ариган эди. Бироқ бу хали таҳдид солиши муқаррар хавф-хатарлар олдида ҳолва эди.

Қуруқ шоҳ-шаббалардан гулхан ёқиб, иккала жасадни ҳам ёндиридим. Токи бу оролни тарқ этмас эканман, ўлимим муқаррар экани аниқ эди. Битта-иккитасини айтмаса, анави маҳлуқларнинг бари дарани тарқ этиб, ўрмон бўйлаб тарқаб кетган, тўқайининг

ҳар ер-ҳар ерида ўзларига ин қуриб олишганди. Фақат айримларигина кундуз кунлари инидан чиқар, аксарияти бу пайтда уйқуда бўларди; четдан қараган кишига орол дафъатан кимсасиздек туюлиши турган гап эди. Кечқурунлари эса еру кўк ҳар хил ёввойи товуш ва бақириқ-чақириқлардан ларзага келарди.

Баъзан, бу ярамасларни тузоқ қўйибми ёки бир бошдан пичоқлабми, қириб ташласаммикан, ҳам дердим. Ўқларим етарли бўлганда ҳам, ўйлаб ўтирамай, қиронларини келтирадим-ку. Ваҳшийларидан ҳозир қолган бўлса, йигирматача қолган, холос; энг ашаддийлари ўлиб бўлган. Вафодор итсифат дўстим ўлиб, мен ҳам фақат кундуз кунлари мизғишини одат этдим, тунда ўзимни қўриқламасам бўлмасди. Ҳовлидаги капамни ҳам бошқатдан қурдим, оғзини шу қадар тор қилдимки, кирмоқчи бўлган жонзотнинг товуш чиқариши тайин эди. Бахтимга, маҳлуқлар ўт ёқишини унугашган, ундан қўрқадиган бўлиб қолишганди. Мен яна гўла ва шоҳ-шабба йиғиб, янги сол ясашга астойдил киришдим.

Ҳар қадамда юзлаб қийинчилликларга дуч келардим. Ўзим асли нотавон, қўлидан ҳеч иш келмайдиган, уқувсиз одам эдим, аксига олиб, мен ўқиган мактабда меҳнат дарси ҳам ўтилмасди, шунга қарамай, сол ясаш учун зарур нарсаларнинг барини эплаб-сеплаб топдим, бу сафар асосий эътиборни унинг мустаҳкам, пишиқ бўлишига қаратдим. Ҳал этиш зарур ягона муаммо бу сув идиш масаласи эди, йўлга чиқсан, кимсасиз океанда чанқофимни қандай қондираман? Лойдан сопол идиш ясай, десам, бу лаънати оролда тупроқ ҳам йўқ. Бошим қотиб, нима қилсан экан, деб бутун оролни кезид чиқдим. Баъзан асабийлашиб, жазавам қўзир, чидаёлмай, бирор бечора дараҳтни майда-майда қилиб, хумордан чиқардим. Лекин барибир ҳеч қандай чора топилмасди.

Лекин барибир ахийри мен орзиқиб кутган кун келди. Хурсандчилигимнинг чеки йўқ эди! Жануби гарб томонда кема қўринди, кичкинагина шхунага ўхшаш кема. Дарҳол тўплаб қўйилган шохлардан катта гулхан ёқдим-да, ўзим ёнига туриб олдим, бир томонимдан гулхан қиздирса, иккинчи томондан офтоб ёндиради, бироқ мен бунга бепарво, икки кўзим ҳам кемада эди. Кун бўйи емадим, ичмадим, фақат ўша ёққа қараб серрайиб туравердим, охири кўнглим озиб, бошим айланаб кетди; ҳайвонсифат одамлар аста яқин келиб, менга ҳайрон тикилиб, сўнг қайтиб кетишарди. Қош қорайгач ҳам кема жойидан жилмади, бора-бора қоронғида қўринмай қолди, мен шўринг қурғур эса, кечаси билан ухламай, ўтин ташиб, гулханни ловиллатиб чиқдим. Гоҳ-гоҳ қоронғилик ичра ҳайрон боқаётган ҳайвонсифат одамларнинг кўзлари ҳам милт-милт ёниб, кўриниб қоларди. Ниҳоят, кема эрта саҳарда яқин келди, у ҳеч қанақа кема эмас, ифлос бир елканли қайиқ экан. Уйқусизликдан

толиққанинг ҳам қарамай, унга тикилар, сира кўзларимга ишонгим келмасди. Қайиқда икки киши бор эди, бирин қайиқ учидан ўтирас, иккинчиси пастроқдан, рул олдидан жой олганди. Қайиқ жуда ғалати сузмоқда эди. У шамол йўналишида эмас, оқимда сурилиб келарди.

Тонг ёришиб қолган эди; камзулімнинг эгнимда қолган парчасини ечиб, силкита бошладим. Бироқ улар менга эътибор беришмас, бир-бирларига қараганча қимир этмай ўтиришарди. Мен буруннинг ясси учига қараб чопдим, қўл силкитиб, бақиришда давом этдим. Улар жавоб беришмас, қайиқ эса ўз ҳолича кўрфазга секин-аста яқинлашиб келарди. Қайиқдан бир вақт пирр этиб каттакон оқ қуш ҳавога кўтарилиди, бунга ўтирганларнинг на униси ва на буниси парво қилди. Қуш улар узра бир чарх урди-да, бақувват қанотларини бор бўйи ёзиб, силкитганча учиб кетди.

Мен бақиришдан тўхтаб, ерга чўқдим ва қўлларимни иягимга тираганча олис-олисларга термулдим. Қайиқ имиллаб гарб томон йўналмоқда эди. Унгача сузиб етсан ҳам бўларди, бироқ қандайдир тушуниб бўлмас ваҳима бунга йўл бермасди. Чошгоҳга яқин дengиз кўтарилиб, уни гарбий соҳилга, тош девор вайроналаридан юз қадамча нарига келтириб қўйди.

Қайиқдагилар ўлик эди. Жонлари чиққанига анча бўлган экан, қайиқни ёнбошлатиб, бўшатаман, дегандим, тўкилиб тушишди. Бирининг сочи худди "Ипекакуана" капитаниники каби қизғиши, ҳурпайган эди, ифлос оқ фуражкаси қайиқ тубида ётарди. Қайиқ билан овора пайтим буталар орасидан пусиб уч нафар ҳайвонсифат махлук чиқди, бурун катаклари пирпираб, ҳид олганча мен томон кела бошлишди. Айни дам улардан шу қадар жирканиб кетдимки, асти қўяверасиз. Қайиқни шартта сувга туширдим-да, тирмашиб чиқиб олдим. Қирғоқча чиққанларнинг иккитаси бўри эди, бурун катаклари титраб, кўзлари ловуллаб ёнарди; учинчиси эса таърифлаб бўлмас даражада даҳшатли махлук — айнқ ва хўқиз қоришимаси эди.

Уларнинг бир-бирларига тишларини иржайтирганча, бошига абадий мусибат қўйниш мурдаларга яқинлашаётганларини кўриб, мендаги жирканиш яна даҳшат билан алмашди. Уларга орқа ўгириб, елканни туширдим-да, дengиз ичкарисига қараб эшкак эша кетдим. Ўлай агар, сира орқамга ўгирилиб қарай олмасдим.

Ўша оқшом маржон қоялар ва орол оралиғида тунадим, эртаси куни саҳарлаб жилға томонга айланниб ўтдим-да, қайиқдан топилгандан бўш бочкани сувга тўлдирдим. Сўнг бор матонатимни жамлаб, мева-чева тердим, қолган учта ўқим билан иккита қуённи отиб олдим. Бу юмушлар билан машғул эканман, қайиқни, эҳтиёт шарт, ҳайвонсифат одамлар тағин бузиб-нетиб қўйишимасин, деган ҳадикда маржон қоялардан бирининг ортига кўринмайдиган қилиб боғлаб қўйдим.

## ТАНҲОЛИККА МУБТАЛО

Кечга томон йўлга чиқдим; денгиз узра жануби гарбдан эсаётган енгил шамол қайиғимни оҳиста, бир маромда ҳайдаб борарди. Орол узоқлашганим сари тобора кичраяр, ундан кўтарилаётган билакдек тутун ботаётган қуёш шафағига нурсизланиб, сингиб кетмоқда эди. Қора нуқта кичрайиб-кичрайиб, охири кўздан йўқолди, тўрт томондан сув билан қуршалганча қолдим. Кундуз билан ҳамоҳанг, қуёшнинг ёйиқ шафағи худди юзига рангли парда тортилгандек, кўқдан сидирилиб, сўнди ва унинг ўрнини қуёш ортида пинҳон турган ҳадсиз, худудсиз милтиллаган юлдузларга тўла осмон эгаллади. Денгиз — жим, осмон — жим; бу сукут ва қоронгилик бағрида мен яккаю ёлғиз эдим.

Шу тахлит денгизда уч кун тентирадим, томофимдан овқат ҳам, сув ҳам ўтмади ҳисоб, фақат бошимга тушган савдоларни хотирлаб, ўй суриб ўтиравердим, негадир одамлар билан юз кўришишга унча ошиқмасдим. Устимда кийим-бош ўрнида фақат ифлос латта-путта, бошимда соч эмас, могор босган, чигал қора пўстак. Мени топганлар ҳам шубҳасиз жинни-пинни деб ўйлашар. Қизиқ, одамлар оламига сира қайтгим келмасди. Фақат ҳайвонсиғат махлуқлар исканжасидан қутулганимга шукр қиласдим, холос.

Хуллас, уч кун деганда Апиядан Сан Франсискога кетаётган кема мени топиб, олиб кетди. Ҳикоямга на капитан ва на унинг ёрдамчиси ишонса денг, ёлғизлигу ўлим даҳшати уни ақлдан озирибди, деб ўйлашди улар. Бошқалар орасида ҳам шундай гап чиқмасин, деб бу тўғрида бошқа оғиз очмасликка қарор қилдим, "Леди Вейн" ҳалокатидан бошлаб то кема топиб олган кунга қадар ўтган бир йил ичидаги нима бўлгани эсимда йўқ, деб қўя қолдим.

Бутунлай жиннига чиқариб қўйишмасин, деб ниҳоятда эҳтиёткорлик билан иш тутардим. Анави Қонун, иккала ўлик денгизчи, тундаги пиистирмалар, қамишзордаги мурда дам сайин кўзимга кўриниб, тинчлик бермасди. Тескари дунёни кўринг, одамларга қўшилгач, уларга иисбатан майл ва ишонч туйғулари пайдо бўлиши ўрнига, қандайдир фалати, худди анави машъум оролда бошдан кечирганимга ўхшаш ноумидлик ва ваҳима кучайди. Гапларимга ҳеч ким ишонмади, лекин мен аввал ҳайвонсиғат одамларга қандай муносабатда бўлсан, одамлар билан ҳам ҳозир шундай муносабатда эдим. Чамаси, улардаги ёввойилик менга юқиб қолганди.

Ваҳима ҳам касаллик, дейишарди, тўғри экан, мана, неча йилдирки, ўзим буни бошдан кечирман, миямга қўрқув муқим ўрнашиб қолган, бу шундай қўрқувки, уни, дейлик, қўлга яхши

ўрганмаган шерваччанинг оломон олдида қалтирашига қиёс этиш мүмкин. Дардимни ўзим яхши биламан-ку, бундай касаллик бошқа ҳеч кимда учрамасди. Мен билан мулоқотда бўлаётган эркагу аёллар инсон туисига омонат киритилган қандайдир ҳайвонсифат одамлар эмас, деб ўзимни сира ишонтиrolмасдим; худди улар ҳадемай асл наасбларига қайта бошлайдигандек, бирин-сирин ҳайвоний хислатлари намоён бўладигандек тюла-верарди. Охири бу ҳақда Морочи шахсан танийдиган ўткир бир олимга айтдим, у, ҳар тугул, гапларимга ишонгандек бўлди, ўзи асаб касаллклари бўйича мутахассис эди, менга кўп фойдаси тегди.

Бироқ ўғи машъум оролда кўрган даҳшатларим бир куни келиб бутунлай хотирамдан ўчишига умид ҳам қиломасдим; улар, худди узоқдаги майда булувларга ўхшаб, олис хотира, ўлимтик шубҳа ҳолида қалёим тўридан жой олган, шундай қунчлар бўлардики, майда булувлар катталашиб, бутун осмонни қеплаб оларди. Шунда атрофимдаги одамларга тикилар, дилимни таърифлаб бўлмас ваҳима чулғарди. Баъзи чехралар кўзимга юваш ва очиқ, баъзилари нохуш ва хавфли, яна бошқаси ўзгарувчан, носамимий кўринаверарди; бирортасида ҳам инсонга хос соғ оқиллик фазилатини сезмасдим. Ичларида худди ҳайвон яшириндек туюлаверар, оролдаги каби таназзул ҳадемай янада каттароқ кўламда такрорланади, деб ўйлардим. Биламан, бу ҳаммаси хом хаёл, атрофимдаги эркагу аёл бари росмана одам, ҳеч қачон ўзгаришмайди, ҳеч вақт уларни ақл-идрок, фаросат тарк этмайди, инсоний орзу ва интилишлари, меҳрибончиликлари босқий, қандайдир ҳайвоний туйгуларга, бўлмағур Қонунга ҳеч қачон қўл бўлишмайди — мен кўрган ҳайвонсифат одамлардан бутунлай фарқ қилишади. Лекин барибир улардан негадир ўзимни олиб қочганим-қочган, менга ҳеч нарса — уларнинг қизиқсиниб қарашгани ҳам, сўроқ-саволга тутишлари ҳам, ҳатто кўрсатган илтифотлари ҳам ёқмайди, ҳеч ким яқинлашмаса, ёлғиз ўзим бўлсан, дейман.

Шу сабабдан ҳам бепоён, кимсасиз адир яқинида танда қурганман, дилимни қоронғилик чулғади, дегунча ўша ёқларга чиқиб кетаман. Фақат шу кимсасиз яйдоқ адир жонимга оро киради, булуtsиз мусаффо гардиш остида роса хумордан чиқаман. Лондонда яшаган пайтим ваҳима туйгуси мазамни қочиради. Одамлардан қаерга қочиб яширинишни билмай қолардим, деразалардан ҳар хил овозлар, шовқин кираверарди; эшикни қулфласам ҳам барибир фойдаси тегмасди. Шунда васвасани енгаман, деб кўчага отилардим, хаёл оғушида кетиб борарканман, ортимдан хотинлар миёв-миёв қилишар, қонга ташна эркаклар тамшаниб, еб қўйгудек тикилишар, хориб-толган рангпар ишчилар "ўҳ-ҳў, ўҳ-ҳў" деб йўталганча ёнимдан ўтишар, кўзлари ҳорғин, сўниқ, худди қони томиб кетаётган ярадор оҳуларга ўхшашарди; мункайган, маъюс қариялар ўзларича бир нималар деб

личирлашар, саёқ болакайлар ҳиринглаб, ортимдан дум каби эргашишгани эргашган эди. Черковга кирсам (шу қадар кучли эди касалим), у ерда ҳам шу аҳвол, руҳоний ҳудди маймунсиғат одамга ўхшаб "улкан фикрлар"ни жавраётган бўларди; кутубхонага кирсам, китобга термулган одамлар сабр-тоқат билан ўлжаларига кўз тиккан маҳлуқларни эслатишарди. Айниқса, поезд ва автобуслардаги одамларнинг турқи совуқлигини айтмайсизми, улар одам эмас, ҳудди жонсиз жасалларни эслатишарди, шундан сўнг улар билан бирга кета олармидим, токи бўм-бўш улов учрамагунича кутиб ўтираверадим. Ҳатто ўзимни ҳам онги мавжудот сифатида эмас, қандайдир ғалати дардга чалинган ва шунинг оқибатида адашган қўй каби ёлғиз сарсон-саргарлон кезинишга маҳкум хаста бир қайвон деб ҳис қиласдим.

Бироқ, худога шукрки, бундай ҳолатга ҳозир кам тушаман. Катта шаҳарларга хос бесаранжомлик, оломон тўс-тўполонидан йироқдаман, кунларим қалби қуёш каби порлоқ аҳли дониш томонидан ёзилган, ҳаёт йўлларимизни нурафшон айлагувчи нодир китобларни мутолаа қилиш билан ўтмоқда. Нотаниш кимсаларни кам кўраман, турмушим ҳам одмигина. Кўп вақтимни китоб ўқишига, кимёдан ҳар хил тажрибалар ўтказишга бағишлийман, мусаффо оқшомлар илми нужум билан шуғулланаман. Нега, нима учун — билмадим-у, осмонда чарх урмиш юлдузлар чаманидан чексиз хотиржамлик ва ҳузур-ҳаловат тұяман. Менинг фикримча, биздаги жамики инсоний түйғулар таскин ва умидни айрим кундалик ғам-ташвишлар, құлмиш-қидирмишлардан эмас, балки оламшумул, боқий коинот сирларидан, қонуниятларидан ахтармоғи керакдир. Йнсон мудом умид билан яшайди, мен ҳам бундан мустасно эмасман, акс ҳолда, яшай олмас эдим. Ва ана шундай умид билан, яккаю ёлғизликда ҳикоямга нұқта қўяман.

Эдуард Прендик

**Изоҳ.** — Ҳикоянинг асл моҳиятини ифодаловчи "Доктор Моронинг тушунтиргани" дея номланиши боб мазмуни "Сәтиди Ревю" газетининг 1895 йил январ ойи сонида чиққан мақолани эсга солади. Бу бежиз эмас: бобдаги тағсилотлар айнан ўша мақоладан келтирилган, фақат ҳикоя услугига хос тарзда қайта ишиланган, холос. Илмий тайёргарлиги йўқ ўқувчига китобда тасвирланган бедаво маҳлуқлар — майли, уларни чала одам, чала ҳайвон деб атайд қолайлик, — ҳақидаги ҳақиқат, умуман, бундай жонзорларни яратиш мумкинлиги эриш туюлиши мумкин, бироқ шуни эътироф этмай иложимиз йўқки, бу ҳол асло вивисекция имкониятларидан йироқ ҳам эмас.

## ТАМОМ

## ФАНТАСТИКА ҚИРОЛИ

Одам ясаш! Ҳар хил ҳайвонларни қирқиши-қиймалаш, яна боз устига этни ўлдирмай, наркозсиз тана аъзоларини кўчириш! Тўрт оёкли жониворлардан икки оёқда гоз юрадиган инсонлар яратиш! Ҳаммаси мумкин, фақат бир нарса — онг масаласи ҳал этилса бўлгани! "Сизга менинг бу маҳлуқларим кўзингиз тушгани ҳамоноғаройиб, жирканч кўринади, менга эса улар яратилиши биланоқ сўзсиз одамга ўхшаб қолади. Фақат кейинчалик, уларни анча вақт кузатиб юрганимдан кейин ҳафсалам совийди. Бирин-кетин ҳайвонлик аломатлари қалқиб юзага чиқаверади, кўзга аниқ ташланаверади... Барибир мен ғалаба қозонишим керак..." Ҳар галтирик жонзотни ўт ловиллаб турган уқубат ўчогига ташлаганимда, ўзимга-ўзим шу сафар ундаги барча ҳайвоний сифатлар куйиб кул бўлди, лоқал шу гал ундан ўзим кўзлаган жонзотни бино қиласман, дейман, қани энди муддаом ҳосил бўлса! Бир томондан мундоқ ўйлаб кўриладиган бўлса, ўн йил муддат нима муддат? Инсон ўзи минг йиллар мобайнида инсон бўлган... ...Мақсадга етишимга ҳам оз қолди..." Мана, инсон ясашга аҳд қилган, ҳар галгидек ҳассос олим — Уэллс қаҳрамони доктор Моронинг ўқинчли сўзлари. Эҳ, инсон, хаёл, орзу, мақсад, интилиш! Нега инсон тафаккури унга бир дамгина тинчлик, хотиржамлик ато этмайди? Нега инсон яралибдики, у беҳаловат, интиқ, нега? Асли насли, яратилиши ҳали ҳамон муаммо инсон ўзи яна инсон яратмоқчи, фақат табиий йўл билан эмас, тафаккури билан. Доктор Моро фикр қаловига ёлқин илашган, энди уни бу қутқу сира тарк этмайди, ҳаётидан воз кечса кечадики, бу йўлдан қайтмайди. У энди ёлғиз ва дарбадар, кимсасиз оролда дўст-ёрсиз, аёл дунёси, оила ҳаловатларидан бегона, ушбу маслаги йўлида ўзини қурбон қиласми. Унга на лавозим, на илмий даражада керак. Ҳеч нарса! Маслак, мақсаду мурод. Номсиз-нишонсиз оролда у ўз

тажрибаларини бошлаб юборади ва одам ясашга жон-жаҳди билан киришиб кетади. Мана, унинг қўйидаги гапига қулоқ тутинг: "Ўша (ясалган жонзот. — Т.Ж.) қўлига тушган нарсанинг ҳаммасини бошини еди. Уни ушлаймиз деб икки кун овора бўлдик. Тасодифан занжирдан бўщаб кетган эди, қочади деб ким ҳам ўйлабди. Ўзи энди ясалётган нарса эди. Шунчаки тажриба қилаётувдик... Ўзиям шунақанги нарса бўлган эдики, оёқ-қўли йўқ, калласи ақл бовар қилмайдиган даҳшатнинг ўзгинаси, ерда илонга ўхшаб судралади, кучи танасига сифмайди, қимирилаган сари оғриқдан тўлғониб биланглайди, ернинг устида денгиз чўчқаси сузаётганга ўхшаб ҳаракатланади. У юрган йўлида нима тўғри келса, уйини куйдириб анча вақтгача ўрмонда яширин кун кечирди, изига тушганимиздан кейин оролнинг шимол томонига қараб қочди, уни ҳибсга олиш учун иккига бўлинишга тўғри келди. Монтгомери фақат сиз билан бораман теб туриб олди. Канакда эса милтиқ бор эди, қаранг, канакнинг ганасини топганимизда милтиқнинг стволи "S"га ўхшаб буқланган, бутунлай ғажиб ташланган эди... Иблисни Монтгомери отиб ўлдириди. Ўшандан кейин ясасам, майда-чуйда нарса-ю, фақат одам ясайнин деб қўйдим."

Бу инсон тафаккурининг парвози, албатта. Доктор Моро тимсолида буюк инглиз фантаст ёзувчиси Герберт Уэллснинг хаёлий парвози. Юқорида таъкидланганидек, ҳар қандай интиқ маслакли одам сингари Уэллс тафаккур "қанотлари" уни қаерларга олиб бормади, не тақдирлар билан тўқнаштирмади. У ойга парвоз этди, ерга ташриф буюрган марсликлар билан учрашди, улар ерни босиб олганларининг гувоҳи бўлдӣ, кўринмас ҳилқатга айланиб кундалик турмуш можаролари ва бани одам психологиясининг не томонларини каشف этмади, вақт машинасига ўтириб, неча минг йиллар олдинга, келажакка сафар этди... Албатта, буларнинг ҳаммаси хаёл, фараз. Ўз номи ўзи билан фантастика. У ҳеч қачон юз бермаслиги ҳам мумкин. Бироқ мазкур фикримиз бир томонлама бўлиб, у фантастиканинг асл моҳиятини очишга ёрдам қиласди, холос. Зеро, инсон ақл-заковати бир неча ўн йиллар олдиндан кўп нарсани башпорат қила олишга қодирлиги сир эмас. Фикримизнинг бир далили сифатида "Доктор Моро ороли" (The Island of Dr. Moreau, 1896) ёзилганидан атиги яrim аср ўтмай немис концлагерларида шафқатсиз жарроҳларнинг инсонлар устида олиб борган стерилизация, вивисекция, трансплантация сингари кўплаб ваҳшиёна гайриинсоний тажрибалари Уэллс башпорати, Уэллс ҳадиги, Уэллс огоҳи эмасмиди.

"Доктор Моро ороли" Уэллсга дунёвий шуҳрат келтирган "Вақт машинаси" (The Time Machine, 1895) романидан бир йил

кейин ёзилган бўлиб, кўпчилик адабий танқидчиларнинг, жумладан, Ю.Кагарлицкий фикрича, ёзувчи шуҳратини бирмунча "хиралаштирган" асардир. Шуни таъкидлаш лозимки, Доктор Моро қанчалик қонҳўр, жаллод бўлмасин, Герберт Уэллс табиий жараённи қанчалик инкор этмасин, унинг жиловини шафқатсиз олим қўлига топшириб қўймасин, унга ҳар ким ҳар қандай ёрлиқлар тақамасин, оламшумул аҳамиятга эга бўлган буюк фалсафий асар дунёга келтан эди.

"Доктор Моро ороли" моҳият эътибори билан 1896 йилдаёқ Дарвин таълимоти беҳуда зоҳир бўлмаганлиги, инсон ва ҳайвонлар ўртасида маълум муштараклик мавжудлигини, табиатни бир бутун тизим сифатида тушуниш лозимлигини, инсон устида эмас, балки ҳайвонлар устида олиб бориладиган ҳар қандай тажриба гайриқонуний эканлигини, олий мақомга эришиб келаётган инсон фақат ўзини эмас, балки табиатни, унинг жами ҳилқатларини севишини, уларга жабр, зулм ўtkазиш мумкин эмаслиги, ҳар қандай зулмнинг охиривой эканлигини исботлаган эди. Роман танқидчиларининг бирига ёзган мактубида Уэллс асарни "даҳшат уйғотувчи роман" деб ҳисоблашдан кўра моҳиятига чуқур ёндошмоқ лозим, деб ёзгани ҳам бежиз бўлмаса керак.

"Доктор Моро ороли" яна бир жиҳати билан Г.Уэллснинг бошқа фантастик романларидан фарқ қиласди. Худди "Доктор Моро ороли" романидаги Г.Уэллс инглиз фантастикасида тасвирийликнинг кучини кўрсатган эди... Маълумки, фантастик асар табиатига ҳамда воқеа-ҳодисаларнинг макон ва замондаги муносабатларига кўра, майший романлардан фарқ қилиши турган гап. Ушбу фарқ ўз навбатида асар қаҳрамонларининг майший роман образларидан ўзгачалигида, сунъийлигида, метафорик характерда эканлигида, макон ва замоннинг ўта шартлилигида ўз аксини топади. Хусусан, "Доктор Моро ороли" ушбу ўлчовда мутлақо хаёлий асарга ўхшамайди. Аслида фантастик асар бош қаҳрамон Эдуард Прендик тўғрисидаги саргузашт романга ўхшаб қолган. Асар бошдан оёқ қаҳрамон тилидан ҳикоя қилинади. Барча воқеа- ҳодисалар китобхонга Прендик нигоҳи ва гувоҳлигида етказилади. Асарни ўқиши давомида китобхон гайриоддий қаҳрамонлар, тақдирлар, воқеалар билан юзма-юз келса-да, уларнинг гайритабиийлигини ҳис қилмайди. Г.Уэллснинг фантастикани реаллаштира билиш иқтидори худди ана шунда ўз аксини топади. Бунга у фантастикада майший ҳаёт талқинини бера билиш, фантастик қаҳрамонлар образини реал инсон образига яқинлаштириш, майший деталлардан унумли фойдаланиш орқали эришадики, аслида ёзувчи маҳсули бўлган

фантастик қаҳрамони — тип ҳақиқий, росмана одамга айланади, китобхонда унинг мавжудлигига, ўзига ўхшаган одамлигига заррача шак-шубха қолмайди.

Үэллс деталлар шунчаки зохир бўлмай, бир-бирини тўлдиради. Ушбу изчиллик асосида тасвирий образ эмас, реал ҳаётий образ вужудга келади. Асар учун характерли бўлган деталлар бир қарашда асар давомида сочилиб ётгандек кўринса-да, аслида бир бутунликни ташкил этади. Бундай деталлар асар бошидаёқ учрайди, китобхонни асарга ишонтиради, қизиқишини орттиради, асарни қўлдан қўймай ўқишга мажбур этади.

Уэллс асарларидан қаҳрамон ички дунёсини очиб бериш, қаҳрамон фикр-мулоҳазаларига ҳам катта ўрин берилади. Бироқ қаҳрамонларнинг тафаккур ҳаракати асосий ўринда турмайди, балки асар мақсадига бўйсундирилган ҳолда учрайди. Уэллс XIX аср бошларида адабиётга янги кириб келган "тафаккур оқими"ни ҳайриҳоҳлик билан кутиб олди. Модернистик оқимнинг оталидан бири Жеймс Жойснинг илк нашрларига кўрсатган беадад ёрдамлари ҳам фикримизнинг ёрқин далилидир. Бироқ кўпчилик замондошлари қатори Уэллс ҳам "тафаккур оқими" адабиётини ўзига тўлақонли сингдира олмади. Ж.Жойснинг "Улисс"и билан танишиб чиққач, у шундай фикрга келган эди: "Сиз асли католиксиз, бошқачароқ қилиб айтганда, Сиз борлиқقا бутунлай қарама-қарши нуқтаи назардан боқасиз. Сизнинг онгингиз мудҳиши инкорлар гирдобига тушиб қолган. Сиз аҳлоқий софликка, шахсий худонгизга шубҳасиз инонасиз, шу боис доимо оҳу воҳ чекасиз... Сизнинг асл иddaонгиз — қарши турмоқ ва орани очиқ қилмоқ. Менга келганда мутлақо бундай эмас. Энди Сизнинг адабий фаолиятингизга келсак, бу билан Сиз бирон нарсага эришасиз, дея олмайман. Сиз оддий, одми фуқародан юз ўтиргансиз, уларнинг кундалик турмуш эҳтиёжлари Сиз учун аҳамиятсиз; уларнинг замонга нисбатан, идрок қобилиятига нисбатан чекланганлиги Сиз учун бефарқ. Сиз эса бор иқтидорингизни ишга солдингиз. Хўш, натижаси? Турган-битгани топишмоқ, бошқотирма. Ким билади, Сиз ҳақдирсиз. Ахир орқангизда жойсчиларингиз бор. Майли, ўшалар Сизни давом эттирсинлар. Менга эса бу — боши берк кўча."\*

Ҳар бир соҳада ҳам биргина муваффақиятли "ярқ" этган топилманинг яралиши унинг эгасига дархол шуҳрат келтиради. "Доктор Моро ороли"га қадар атиги бир йил олдин ёзилган "Вақт машинаси" Герберт Уэллс ижодидаги ана шундай тақдирли асар эди. "Вақт машинаси" журналистликка боши билан шўнғиган

\*Вопросы литературы, 1959, N8.

Уэллснинг шу соҳадаги изланишлари самарасидир. Г.Уэллс нуфузли матбуотларнинг биридан қатор илмий оммабоп қиссалар учун буюртма олади ва бунинг натижаси ўлароқ "Вақт машинаси" дунёга келади. Г.Уэллснинг ушбу илк романини адабий жамоатчилик шов-шув билан кутиб олади ва у тез орада Уэллс номини машҳур этади. Асар қаҳрамони Уэллс учун типик бўлган илмга ташна, шаддод олим вақт машинаси ихтиро этади ва эрамиздан 802701 йилга, келажакка парвоз этади. Дастреб қаҳрамон кўзи ўнгига ажойиб, башарият ҳамиша орзу этган жаннатмакон олам, ўта чиройли ва келишган соғ, бироқ майда ва мўрт жамоа — элойлар намоён бўлади. Кишилик жамиятининг баҳтли интиҳоси. Воқеалар ривожлана боргач, Уэллс учун характерли бўлган контраст юз беради. Қаҳрамон — олим саодатли жамиятнинг яширин ва қора томонлари гувоҳи бўлади. Ер юзидаги тўкин-сочин ҳаёт ер остидаги манқуртлар — марлоклар меҳнати эвазига амал қилинишини кашф этади. Рамзий маънодаги элойлар ва марлоклар, биринчидан, Уэллс яшаб турган жамиятдаги социал табақаланишни чуқур ифода этиб, ижтимоий антагонизм объектив-тарихий категория, ҳар қандай жамият структурасининг таркибий қисми эканлигини исбот этса, иккинчи томондан XX аср инглиз буржуазиясининг кайфиятини, яратувчи оммага муносабатини акс эттиради.

"Доктор Моро ороли" романидан бир йил кейин яратилган "Кўринмас одам" (The Invisible Man, 1897) 31 ёшли Г.Уэллс адабий шуҳратининг боқийлигини яна бир карра исботлади. Мазкур асар қаҳрамони энди вақт машинасини ихтиро этган физик, узоқ ва кимсасиз оролдаги иқтидорли жарроқ доктоқ Моро эмас, балки илмий гояси сира ўзига тинчлик бермаган тажрибасини ўзида синааб кўрган ва натижада кўринмас одамга айланган Гриффин эди. Бир қараганда, мавзу янгилик эмас Халқ орасида кўринмас руҳлар, уларнинг сезилмас ҳаракатлари. Эртакларда жинларнинг тўсатдан кўздан йўқолиши ва ҳок. тез-тез учраб турадиган ҳодисалардир. Иложи бўлса, кўзга кўринмай гойибона не-не ишларни қилишни орзу этмайди одам! Уэллс тасвирийлиги бу ерда ҳам ўз қудратини намойиш этади. "Бироқ Уэллс, — деб ёзади Б.А.Гиленсон, — ҳақиқий табиий илмий иқтидорга эга бу ёзувчи гипотетик саробий характердаги пуч хаёлга ҳам росманалик касб эта олган".\*

Гриффин мashaққатли уринишлари эвазига машҳур физик постулатни амалга оширади ва ўзида синааб кўради: унинг танаси

\*Б.А.Гиленсон. Предисловие к сборнику Г.Уэллс. Избранное. На анг.яз. М.:Прогресс, 1981. 16-17 стр.

ёруғликни акс эттиrmай, ўзига сингдирмай ва ютмай қўяди, натижада Гриффин кўринмас одамга айланади.

"Кўринмас одам" яна шуниси билан диққатга сазовор эдики, олдинги романлардек энди воқеа-ходисалар аллақандай сунъий жойларда эмас, китобхонга қадрдон, уни бевосита ўраб турган муҳитда содир бўлади. Энди нозиктаъ ва ўжар, эгоист ва қасоскор Гриффин гаройиб имкониятларга эга бўлади ва ўзининг манфур ниятларини амалга ошира бошлайди. Шаҳарчада гаройиб шарпа пайдо бўлади, Айтнинг аҳолиси ёхуд меҳмонхона хўжайини, ёхуд руҳоний, муаллим фақат кийим-бошнинг жонли одамдек ҳаракатланаётганини, ёхуд бирон нарсага жон кириб кетганини, ёки ўзига нимадир тегинганини, гоҳида йўқ ердан зарба еганини ҳис қиладилар. Кулгили ҳолатлар, ур-сур тўполон, қоч-қоч... Охир-оқибатда гаройиб "ажина" жамиятда бегоналигича қолади ва безор бўлган оломон томонидан калтакланиб ўлдирилади.

Романда Уэллснинг яна илмга бўлган интиқлиги, илм, ҳар қандай илмий янгилик шахс манфаатига эмас, балки кўп эхтиёжига хизмат қилиши лозимлиги, акс колда фожиагз олиб келиши очиқ-оидин ўз аксини топган. Илмда ғаразлик, манфаат йўлида фойдаланиб бўлмасликка, у эзгуликка қаратилган бўлишига яна бир карра имон келтирамиз. Асар ниҳоясида қувлаб, калтаклаб ҳаллослаган таъқибчилар кўзи ўнгидаги юзтубан ётган ўттиз ёшлар чамасидаги йигитнинг яланғоч пажмурда гавдаси аста-секин шамойилга кираркан, оломон иблис эмас, оддий, ўзи сингари инсоннинг фожиаси гувоҳи бўлади.

"Кўринмас одам", — деб ёзади Ю.Кагарлицкий, — чуқур социал-психологик романдир".\* Дарҳақиқат, фантастиканинг уэллсчасига реализмга айланиб кетиши, Уэллс ипидан-игнаси гача биладиган ва ҳис қиладиган майший турмуш икир-чикирлари, ҳалқ психологияси фантастика билан шу қадар уйғунлашиб кетганки, асарни ўқиганда китобхон унинг фантастик роман эканини бутунлай унутиб қўяди. Ушбу асари билан Уэллс фантастика осмонида эмас, шубҳасиз ёнимизда, кўз ўнгимизда эканини исбот этади.

Кўринмас одамдан сўнг "Дунёлар жанги" (The War of the Worlds, 1898) дунёга келди. Мазкур романда Г.Уэллс ўзини ташвишга солаётган муаммо — жамиятда борган сари ривожланиб бораётган шахс дегуманизми масаласини кўтаради. Асарга космик

\*Ю.Кагарлицкий. Великий фантаст. Вступительная статья к сборнику Г.Уэллс "Машина времени, Война миров. Рассказы". М.:Худ.лит. 1983. 12

сюжет асос қилиб олинган, деярли одам тушунчасига сифмайдиган жинссиз сунъий марсликлар ерга тушадилар ва одамзот билан улар ўртасида ҳаёт-мамот жанги бошланади. Насл-насаби узоқ ерлик бўлган марсликлар ўз аждодларидан ўта узоқлашиб кетганлар, уларга ҳис-ҳаяжон аллақачон ёт, ҳатто одамнинг қонини вампирдек сўриб, азоб бериш ва ўлдириш улар учун ҳаётий лаззат. Шуниси диққатга сазоворки, Уэллснинг бу қармонлари ҳам худди кўринмас одам каби оддий бандаларга қондош ва жондош. Бинобарин, ушбу холат одамни ҳар қандай бало инсоннинг ўз оёги остидан чиқади, жамиятдаги салбий табақаланиш пировардида ҳалокатга олиб боради деган фалсафий фикрга унрайди.

Модомики, "Дунёлар жанги" мавзуси ва ғояси Уэллсда анча илгари, талабалик чоғларидаёқ туғилган эди. 1885 йили у студентлар жамияти йигинларининг бирида "Инсон ирқининг ўтмиши ва келажаги" номли рефератини ўқииди, бироз муддат кейинроқ "Миллионинчи йиллар кишиси" очеркини ёзади. Ю.Кагарлицкийнинг ёзишича, Уэллс ўша даврларда эволюция муаммолари билан қизиқади, эволюция аллақачон барҳам еди, деган қарашларга қарши туради. Худди шу аснода у миллионинчи йил кишиси қиёфасини чизади: у бизга мутлақо ўхшамайди, эволюция инсон тана қисмларининг деярли ҳаммасига таъсир кўрсатади, аъзолар ўзгаришга юз тутадилар. Масалан, инсон қўли янада кучли ва ихчамликка томон ривожланади, нозик ҳаракатларга мослашади. Бошқа мускуллар эса кучлизланиб, бир-биридан деярли фарқи қолмайди. Ўта ривожланган миянинг қутиси — бош ғайритабии катталашади, олдингига ўхшамай қолади: юз ифодалари йўқолади, қулоқлар, бурун, қош таги ёйлари бўртиклигини йўқотиб, текисланиб кетади, оғиз билан жағ кичкина бўлиб қолади. Тараққий этган кимё озиқ-овқатни таблеткаларга айлантиради, улар тайёр озуқа холида бўлгани учун ошқозон фаолиятига эҳтиёж қолмайди, ошқозон барҳам ейди, ҳатто одам нафас олгани сингари озиқ моддаларга атроф-муҳитдан тўйинаберади, миллионинчи йиллар "ошхона-ресторанлари" улкан ҳавзалардан иборат бўлади, озиқланиш учун ҳавзаларда чўмилишнинг ўзи кифоя қиласди.

Вақт ўтган сайин инсон ҳайвонлар дунёсидан узоқлашиб борар экан, унда ҳис-ҳаяжон барҳам топади, мантиқий, ҳис-ҳаяжонсиз тафаккур қобилияти ривожланади. Буларнинг барчаси аллақачонлар Уэллс онгидан ўрин олиб, сўнг марсликлар тимсолида "Дунёлар жанги" романига айланди. Таъкидлаш лозимки, ушбу муаммолар мазкур роман мундарижасидан четга чиқиб ўзга

асарлар саҳифаларида ҳам турли хилда акс этади ва ўзининг мантиқий чўққиси томон ривожлантирилади.

Келажак учун қайғуриш, башарият тақдиридан хавотирлик "Ухлоқ одам уйғонса" (When the Sleeper Wakes, 1899) романида яна ўзгача оҳангда жаранглайди. Бутун борлиқнинг ягона эгасига айланәётган йирик монополистик капитал диктатураси ҳалқ қаршилигига учраб дарз кетади. Сўнгра эса "Ойга чиққан биринчи одамлар" (The First Men in the Moon, 1901) яратилди ва унда меҳнат тақсимотининг ғайриинсоний томонлари очиб берилди. Кейинги фантастик асарларида Г.Үэллс алоҳида қувватдори кашф этилгани, уни истеъмол қилган одамнинг бўйи ақл бовар қилмас даражада ўсиб кетиши, жисмоний ва ақлий жиҳатдан ривож топган дёвсифат одамлар ҳақида ҳикоя қиласиди ("Худолар таоми", "The Food of the Gods and How it Came to Earth, 1904). Сирли комета пайдо бўлгани, унинг одамларга самарали таъсири ҳақида "Комета кунида" (In the Days of the Comet, 1906), ҳарбий авиация ривожи ва келажаги, atom уруши ҳақида эса "Ҳаводаги жанг"(The War in the Air and Particularly How Mr. Bert Smallways while it Lasted, 1908)да ўқиймиз, гаройиб фан ютуқлари, яна ўша Уэллс тасвирийлигининг асосий унсурларидан бири контраст образлиникнинг гувоҳи бўламиз.

Юқорида санаб ўтилган асарлар Герберт Уэллс номини буюк фантаст сифатида кишилик тарихига абадий муҳрлади ва инсон заковатининг қанчалик шиддат билан олдинга интилишини, башорат қудратини исбот этди. Чунончи, Уэллс башоратлари ҳозирги авлод учун мўъжиза эмас. Ҳарбий техниканинг инсон ақли бовар қилмайдиган даражадаги ривожи, стратегик ракеталар, юлдуз мудофааси, космик парвозлар, ойга қўниш, нурли қуроллар, тиббий ютуқлар кечагина Уэллс хаёли эди.

Гарчанд фантастик асарлар Уэллс номини оламга ёйган бўлса-да, бу кучли ва кенг иқтидор эгаси ушбу адабий мерос билан чегараланиб қолмайди, майший романлар бобида ҳам баракали ижод этади. Майший асарларида у ўз даври ҳаётининг кенг ижтимоий манзарасини яратди. Ҳаётни ҳар томонлама чуқур идрок қилган, ўрта табақага мансуб Уэллс болалик кезларida гувоҳи бўлган қадрдан жойлар, сиймолар, воқеа-ҳодисалар, тақдирилар чизгиларини барпо қиласиди. Шу боис унинг майший мавзудаги романлари автобиографик характерга эгадир.

Герберт Уэллс 1866 йили Лондоннинг биқинидаги Бромли шаҳарчасида боғбон оиласида дунёга келди. Аввалда боғбонлик билан шугулланган отаси Жозеф Уэллс спортга қизиқар ва эмадини крикет ўйинида синаб кўрмоқчи бўлади. Даастлаб крикет унга яхши даромад келтира бошлайди ва у тез орада бутунлай

профессионал крикетчига айланади. Аммо бу ҳам узоққа бормайди, Жозеф идиш билан савдо қилувчи дўкон очади, омадсиз Жозеф нима ишга қўл урса, охири муваффақиятсиз тугайди. Уэллснинг онаси Сара Уэллс рўзгор юкини енгиллаштириш учун туну кун ишлайди, ўзига тўқ оиласларнинг бирида иқтисодчилик қиласди. Ушбу хонадон кейинчалик Уэллснинг "Тоно Бенге" (Topo-Bungay, 1909) романида ўз аксини топади. Болалар тақдирига Жозефга нисбатан Сара кўпроқ қайғурар, хаёлан оила мануфактура билан шугулланса, болалар унга жалб этилса, гўё ҳаётй муммолосар, турмуш ташвишлари барҳам топадигандай, Бертидан (Гербертни қисқача шундай атар эдилар) ҳам биноийдек мануфактурачи чиқадигандай кўринарди. Нима деган гап, олдин шогирд тушишади, кейин бошқарувчи, қарабсанки, мануфактура эгалари. Бироқ онаизорнинг бу орзулари рўёбга чиқмайди. Ўн уч ёшидан ишлашга мажбур бўлган Берти вазифасидан кўра китобни кўпроқ ўйлар, имкон топди дегунча ёлғиз, яширин ўқиш, хаёл суриш билан машғул бўларди. Китобга муҳаббат Бертининг ёшлигига оёғи синиб узоқ вақт кўрпага қадалиб қолган чоғида уйғонган эди. Кўп ўқиган Берти тенгдошлари ичидан ақлан етук, билагон ва ҳушёр эди, мануфактурага ишга кириши боис узилиб қолган мактабда ҳам энг аълочилардан бири саналарди. Онасининг раъйини қайтара олмаган Герберт мануфактурага кассир бўлиб ишга ёлланади, бироқ дилига ўтиргаган бу ишда узоқ ишлай олмайди. Мактабда муаллимлик қиласдиган тоғаси Алфред Уилямсга шогирдликка тушади. Гербертда ўчмас из қолдирган ўша давр ҳаёти ва тоғаси Алферд Уилямс "Севги ва мистер Люишем" (Love and Mr. Lewisham, 1900) романидан ўрин олган. Мазкур асарни ёш Уэллснинг пессимитик руҳдаги биографияси, десак ҳам янгишмаймиз. Люишем образи балки худо ёрлақаган Уэллснинг умр бўйи тирикчилик ташвишида меҳнатдан бош кўтартмаган омадсиз, қадрдон тоғасига қўйган ҳайкали бўлса ажаб эмас. Кейинча дорихонада, тижорат дўконларида ишлаган Уэллс ўзининг меҳнат мashaққатларини "Киппс" (Kipps, the Story of a Simple Soul, 1905) романида қаламга олади. Ота-онаси ва ўз ҳаёти чизгиларини "Мистер Полли тарихи" (The History of Mr. Polly, 1910) романида яна бир бор учратамиз. Худди шу даврларда у маиший характердаги "Анна Вероника" (Ann Veronica. A Modern Love Story, 1909), "Уйланиш" (Marriage, 1912), "Сер Айзек Харманнинг рафиқаси" (The wife of Sir Isaac Harman, 1914) асарларини ҳам ёзди.

Илмга ташна, тиришқоқ Уэллс турмуш оғирликлари, тақдир ўйинларига қарамай, Лондонга келади ва Нормал мактаб

талабасига айланади. У табиий фанлар билан шуғулланиб, физиология, анатомия, биологияни қунт билан ўрганади, илмий лабораторияларда тажрибалар ўтказади. Тақдир бу ерда уни машҳур табиатшунос, тугма олим Томас Хаксли (Thomas Huxley 1825—1895) билан учраштиради ва у Хакслига шогирд тушади. Истеъодли олим ёш Уэллс талантини дархол ҳис қиласди ва унга "олим ва гуманистнинг ўта камчил пайванди" деб баҳо беради. Маълум фурсат кейин Уэллс олимлик унвонига эришади ва иккита мактаб дарслиги чоп эттиради.

Бироқ ёзувчиликка бўлган интилиш барча мақсадларидан устун келади ва у 1893 йиллариёқ ўзининг илк эссе ва новеқлаларини нашр эта бошлайди. Уэллс новеллалари ўта серқирига, юмор ва лиризмга бойдир. Уларнинг асосий хусусиятларидан бири кундалик майший турмуш мавзусининг фантастика билан уйғуналашиб кетишидир. Уэллс новеллалари ва ҳикоялари унинг фантастик шоҳ асарлари билан бир даврда ёзилган ҳамда чоп этилган. "Вақт машинаси" билан бир пайтда "Ўғирланган бацилла ҳамда бошқа воқеалар" (The Stolen Bacillus and Other Incidents, 1895), ундан сўнг эса қатор шингил ҳикоялар тўпламлари — "Платтер тарихи ва бошқалар" (The Plattner Story and Others, 1897), "Макон ва замон ҳикоялари" (Talers of Space and Time, 1899), "Ўн икки ҳикоя ва туш" (Twelve Stories and a Dream, 1903), "Кўзи ожизлар мамлакати ва бошқа ҳикоялар" (The Country of the Blind and Other Stories, 1911) босмадан чиқди.

Герберт Уэллс машҳур ёзувчигина бўлиб қолмасдан, балки ўз замони ижтимоий ҳаётида ҳам фаол иштирок этди. Қозонган эътиборини, иқтидори ва кучини ўз қарашларини ҳимоя этишга, жамият ҳаётига ижобий ҳисса қўшишга сарфлади. У дунёning барча узоқ-яқин нуқталарида юз бераётган ижтимоий-сиёсий воқеаларга хушёр муносабатда бўлди. Авж олиб келаётган фашизмга қарши ҳаракатнинг энг асосий ташкилотчи ва курашчиларидан бирига айланди. Қатор ижтимоий-публицистик асарлар, роман-трактатлар битди. Жумладан, "Башоратнома" (Anticipations of the Reaction of Mechanical and Scientific Progress upon Human Life and Thought, 1901), "Башариятнинг туғилиши" (Mankind in the Making, 1903) фикримизнинг далилидир.

Деярли барча жанрларда ижод этган шоир ва романист, фантастик ва майший романлар устаси, қиссанавис ва новеллист, киносценарий ҳамда мемуарлар муаллифи, публицист ва ҳужжатнавис, илмий трактат ва дарсликлар автори, адабий танқидчи ва фаол жамоатчи, буюк иқтидор эгаси Герберт Уэллс

Эллик йилдан зиёд адабий фаолияти давомида авлодларига 110 та ўлмас асар қолдирди.

Уэллс автобиографик асар ёзишда ҳам ақлни лол қолдирди. 1934 йили у ўз биографиясининг икки томлигини чоп этди, учинчиси эса 1984 йили чиқди. Биринчи икки томликда Уэллс 1930 йилгача бўлган ҳаётини қамраб олади, сабаб, ўз фикрига кўра ёзмоқчи бўлган одамларининг ҳаётлиги эди. Ю.Кагарлицкийнинг келтиришича, Уэллс учинчи томни ҳам ёзади, бироқ ундаги энг сўнгти тилга олинган аёл дунёдан ўтмагунча китобни нашр этмаслик талабини қўяди. Бу "сўнгти тилга олинган аёл" — таниқли адиба Ребекка Вест эди.\*

Буюк фантаст 1946 йили дунёдан кўз юмган бўлса, ўз ортида уч томлик биография қолдирган бўлишига қарамай, унинг ҳаёти ва ижодига қизиқиш, ўрганиш, уни атрофлича кашф этиш бир дақиқа сўнганий йўқ. 1973 йили турмушдош Маккензиларнинг "Вақт сайёҳи" китоби босмадан чиқди. Улар Уэллс ҳаётини ипидан игнасиғача чуқур самимият ва садоқат билан ўргандилар, ҳатто ёзувчи ўз биографиясида йўл қўйган хатоларни ҳам тузатишига муваффақ бўлдилар. Қолаверса, Ребекка Вест ҳам Уэллс билан ораларидаги муносабатни узоқ яшириб ўтиради. 1984 йили адабанинг ўғли Энтони Вест ҳам Уэллс ҳақидаги биографик китобни нашр этди. Кўриниб турибдики, бор иқтидори ва салоҳиятини авлоди учун сарф этган сермаҳсул табаррук инсоннинг қадр-қиймати асрлар оша устивор бўлажак.

Тилаволди ЖЎРАЕВ

\*Ю.Кагарлицкий. Послесловие к сборнику Г.Уэллс "Колесо фортуны, Любовь и мистер Люшем, История мистера Полли". М.:Правда, 1987, 625 стр.

Герберт Уэлс. Доктор Моро ороли. Фантастик қисса. "Наврӯз"  
нашриёти — 1993 йил, 128 бет.

Машҳур инглиз фантаст ёзувчisi Герберт Уэлс номи  
китобхонларга яхши таниш. Унинг "Вақт машинаси", "Кўринмас  
одам" номли қиссалари жаҳон адабиёти дурданалари қаторида  
туради. "Доктор Моро ороли" асари әдибнинг учинчи машҳур  
қиссаси. Мазкур асарда табиат қонунларига қарши бориб, инсонни  
ҳайвон билан қўшиш ва шу асно янги бир маҳлуқ яратишга  
аҳд этган ёвуз олимнинг фожиаси бутун даҳшати билан ўз  
ифодасини топган.

**"Меъроj" кичик корхонаси буюртмасига биноан  
1993 йилда қуийдаги китоб чоп этилди:**

**КЎЗ — КЎРМАГАН, ҚУЛОҚ — ЭШИТМАГАН.**  
"Гиннеснинг рекордлар китоби" — Ўзбекистонда! Faфур  
Ғулом номидаги Адабиёт ва санъат нашриёти, 1993  
йил. 80 бет. 50.000 нусхада чоп этилган.

"Гиннеснинг рекордлар китоби" ҳақида ўқимаган ёки  
эшитмаган одам топилмаса керак. Мазкур маълум ва  
машҳур китобдаги энг беқиёс, ақлни шоширувчи  
маълумотлар жамланган ушбу мажмуани биз "Кўз —  
кўрмаган, қулоқ — эшитмаган" деб номладик. Маъ-  
лумотлар мажмууда ўзига хос, ниҳоятда ўқишли тарзда  
истифода этилганки, бу жиҳатдан у нафақат мамла-  
катимизда, балки бутун дунёда беқиёсdir.

Ниҳоят, "Гиннес рекордлар китоби" — Ўзбекистонда!  
Зоро, ушбу мажмуани "Рекордлар китоби"нинг ўзбекча  
нашри сари ташланган илк қадам сифатида баҳоламоқ  
жоиздир.

"Меърож" кичик корхонаси буюртмасига биноан  
1993 йилда қуийдаги китоб чоп этилади:

Тўхтамурод Рустам. СЕВГИНИНГ СУВРАТИ.  
Ҳикоялар. "Ёшлик кутубхонаси". 128 бет. Жами 20.000  
чусхада.

Инсон инсон бўлибдики, нурга интилади. Умид, ишонч, муҳаббат — ушбу заррин туйғулар унга ҳамиша йўлдош. Албатта, баҳт аталмиш олий манзил сари йўл доим ҳам текис кечавермайди. Бу йўлда қоқилишлар ҳам, туйқус тойиб ийқилишлар ҳам рўй бериши табиий. Аммо қандай тўсикларга дуч келмасин, қандай азобларга гирифтор этилмасин, инсон барибир олға интилади. Бильвакс, яшашнинг маъноси қолмаган бўлурди.

"Севгининг суврати" тўпламидан ўрин олмиш аксарият ҳикояларнинг ҳаҳрамонлари катта ҳаётга қадам қўяётган, Баҳт йўлида эндиғина атак-чечак қилаётган ёшлар. Адаб нозик адабий умумлашмалар, топилмалар, бадиий сўз воситасида уларнинг ажиб, бетакрор оламини чизади, қувонч ва ташвишларига бизни ошно этади. Илк муҳаббат изтироби, биринчи бўса тоти, эҳтирос, хиёнат, алам... буларнинг барчаси яхлит, бир бутун СЕВГИНИНГ СУВРАТИни ташкил этади.

Ўзининг гўзал ҳикоялари билан китобхонлар қалбидан жой олган бу истеъододли ёш адабнинг янги китоби шубҳаси ҳеч бир ўқувчини бефарқ қолдирмайди.

ГЕРБЕРТ УЭЛЛС

ДОКТОР  
МОРО  
ОРОЛИ

Рисола "Меърож" корхонаси ижодий жамоаси  
буюртмаси асосида нашр этилди.

Тақризчи Эркин АЗИМОВ  
Нашр учун масъул Эркин АБДУРАҲМОН  
Муҳаррир Тўхтамурод РУСТАМ  
Бадиий муҳаррир Фофур УСМОН ўғли  
Мусаввир Владимир ШУМИЛОВ

ИБ

Босишга 22.05.93 да рухсат этилди. Бичими 60x90 1/16 1-босма қогозга  
оффсет усулида босилди. Нашр табоги 7,0. Тиражи 35.000 Буюртма **7684**.  
Шартнома 29—93. Баҳоси шартнома асосида.

"НАВРЎЗ" нашриёти, 700129, Тошкент, Навоий кўчаси, 30.

Ижара пурратидаги Тошкент полиграфия комбинати, 700129, Тошкент,  
Навоий кўчаси, 30.